



(ষ্টার থিয়েটারে অভিনীত)

শ্রীকীরোদপ্রসাদ বিদ্যাভিনোদ এম্, এ, প্রণীত ।

কলিকাতা ;

২০১নং কর্ণওয়ালিস্ স্ট্রীট, "বেঙ্গল মেডিকেল লাইব্রেরী" হইতে

শ্রীগুরুদাস চট্টোপাধ্যায় কর্তৃক প্রকাশিত ।

আম্বিন, ১৩১১ মাল ।

মূল্য—১/ এক টাকা মাত্র ।

৩৯নং সিম্‌লা ষ্ট্রীট, "সাহিত্য-প্রেসে".
শ্রীমলিনীনাথ ঘোষ কর্তৃক মুদ্রিত।

কি ! যৌবনের যে শক্তি বলে আমি মল্লভূমে স্বাধিকার প্রতিষ্ঠা ক'রেছি, যে সমস্ত বিপদ আপদের মধ্য দিয়ে একটা দীন অনার্য্যপালিত ক্ষত্রিয় বালক এই বিষ্ণুপুরে রাজধানী স্থাপিত ক'রেছে, সে শক্তি জন্মের মত অস্তুর্হিত ।

পদ্মা ।—একা যখন কেউ রমাইকে দমন ক'রতে পারছে না, তখন সবাই মিলে দমন করুক না কেন ।

বীর ।— একজন রাজার শত্রুকে সাধারণের শত্রু মনে ক'র্বে, দেশের শত্রু জ্ঞানে একত্র হয়ে তার দমনে অগ্রসর হবে, বাঙ্গলায় সে মহাপুরুষ আর নাই । বহুদিন ধ'রে ধারায় ধারায় প্রবাহিত শাস্তি জল, বাঙ্গালীর বীরত্ব ফুলিঙ্গের চিহ্ন পর্য্যন্ত নিভিয়ে দিয়েছে । বাঙ্গালী শক্তি হারিয়ে এখন শুধু কল্পনার কুহকে নিশ্চিন্ত । স্ত্রীজাতির মত শুধু কলহে আর বাক্বিতণ্ডায় পারদর্শী । কি আর বল্ব পদ্মাবতী ! চিন্তায় আমার শরীর জর্জরিত । সামান্য রমাই ঘোষের উৎপাতেই বাঙ্গলা যদি এত ব্যতিব্যস্ত, কোন প্রবল শত্রু যদি দেশ আক্রমণ করে,— করে কি নিশ্চয়ই ক'র্বে, তা হ'লে এ বাঙ্গালার কি হবে ? যাক্ সে পরের কথা । এখনকার চিন্তা যে আরও বিষম । শুনলুম, উদ্ধত রমাই আমার রাজ্যের সীমায় এসে উৎপাত করে গেছে । এখন যদি সে আমার বিষ্ণুপুরই আক্রমণ ক'রে বসে, তা হ'লে রক্ষা করবার উপায় কি ?

পদ্মা ।—আপনার ঐ এক কথা, ক্ষুদ্র রমাই বিষ্ণুপুর আক্রমণ ক'রতে সাহস ক'র্বে ! এ আপনি মনেও স্থান দেন ?

বীর ।—স্থান দিতে আর অপরাধ কি ? সে যখন আমার প্রজার ওপর অত্যাচার ক'র্ছে, তখন আর বাকী রেখেছে

কি? আমার বিষ্ণুপুর আক্রমণের সঙ্গে তার আর প্রভেদ
কি? সে ত আমাকে এক রকম যুদ্ধে আহ্বানই ক'রেছে।
কিন্তু আমি হাজার হাজার সৈন্য নিয়ে ঘরে বসে আছি।
তোমার ভাই সেনাপতি এই শুভ সংবাদ প্রতিদিন স্বকণে
শুনছেন, আর মনের দুঃখে মদনমোহনের প্রসাদের ভূমীষ্ঠ নাশ
করছেন।

পদ্মা!—এই আরম্ভ হ'ল! আপনি অবকাশ পেলেই
আমার ভাইকে নিয়ে রহস্য করেন মহারাজ। তাকে এই
গৌরবান্বিত পদ দেওয়াই বা কেন, আর দিয়ে রহস্য করাই বা
কেন? এর পর আপনি যে বলবেন, আমার ভাই হতে
আপনার রাজ্যের অনিষ্ট হ'ল, সেটা হবে না। আপনি এই
বেলা মানে মানে তার পদ অপর কাউকেও প্রদান করুন।

বীর।—ভাইয়ের কথা তুললে তুমিই বা ক্রোধ কর কেন?
যদি বিষ্ণুপুর দুর্ভাগাবশে শত্রুহস্তগত হয়, তখন কি তারা
তোমার ভাইয়ের মুখে চুধের বাটা তুলে সিংহাসনে বসিয়ে,
মেহনত হয়েছে বলে বাতাস করতে থাকবে।

পদ্মা।—তখন সকলকার যা দশা তারও ভাই হবে।

বীর।—বেশ, বেশ এইটে ভেবে চুপ করে বসে থাকলেই
আমিও নিশ্চিন্ত।

পদ্মা।—ভাইটেকে মিছেমিছি একটা গয়লার সঙ্গে যুদ্ধে
পাঠিয়ে মেরে ফেলতে পারলেই আপনি নিশ্চিন্ত।

বীর।—বস্ বস্ আর কথায় কাজ কি, বিষ্ণুপুর থাক আর
ন্যাক আমি আর দ্বিতীয় কথাটা কইবো না। এবারে যদি

আমি কোনও কথা কই, তা হ'লে তোমরা ভাই ভগিনীতে
মিলে আমার হাত পা বেঁধে বিড়াই নদীতে ফেলে দিও ।

পদ্মা।—বালাই, আমরা অমন কাজ ক'রতে যাব কেন,
তার চেয়ে আপনি আমাদের ভাইবোনকে বিসর্জন দিন ।
সকল আপদ চুকে যাক্ ।

বীর।—তোমরা ছ'জনে, না তার সঙ্গে রঞ্জাবতী ?

পদ্মা।—তাকে ফেলতে যাবেন কেন ? সে সরলা বালিকা,
সে কি অপরাধ ক'রেছে ?

বীর।—তাই বল—এই বৃদ্ধ বয়সে একেবারে গৃহশূণ্য—
পাকাচুল তুলে দেবারও তো লোক চাই !

পদ্মা।—সে আর বলছেন কেন ? আপনার মতলব কি
আর বুঝতে বাকী থাকে ? মেয়ে হ'লে কি এতদিন তার বিয়ে
পড়ে থাকতো ? এ যে বুঝতী শালী ।

বীর।—দেখ, তোমার মতন বুদ্ধিমতী যদি আর একটা
এই বৃদ্ধো বয়সে আমার পাশে থাকে, তাহ'লে আমি ঘরে
বাসে শুধু বৃদ্ধাঙ্গুষ্ঠ নেড়ে ছ'শো রমায়ের মাথা কেটে ফেলতে
পারি ।

পদ্মা।—নিশ্চয়—তামাসা রাখুন—রঞ্জাবতীর পাত্রের সন্ধান
করুন ।

(কঞ্চুকীর প্রবেশ)

কঞ্চু।—মহারাজ ! গৌড়েশ্বর তাঁর পুত্রের সঙ্গে রঞ্জাবতী
দেবীর বিবাহের জন্ত আপনার কাছে নারিকেল পাঠিয়েছেন ।

পদ্মা।—মহারাজ ! মদনমোহনের কৃপায় আপনার ছলী
পাশ আর পূরণ হ'লনা । প্রজাপতি এইবারে মুখ তুলে

চেয়েছেন । গোড়েশ্বরের পুত্র যদি রঞ্জাবতীর বর হয় ত এ হ'তে সৌভাগ্যের কথা আর কি আছে ।

বীর ।—যথার্থই পদ্মাবতী, এ শুভ সংবাদ । গোড়েশ্বরকে যদি কুটুম্ব করতে পারা যায়, তাহ'লে রাজ্যের ভবিষ্যৎ সম্বন্ধে অনেকটা নিশ্চিত্ত ।

পদ্মা ।—মহারাজ আর বিলম্ব ক'রবেন না, আপনি শুভ সংবাদটা নিয়ে এলে, আমি মঙ্গলচণ্ডীর পূজো দিই, মদন-মোহনের পূজো দিই ।

(রাজার প্রশ্নান ও রঞ্জাবতীর প্রবেশ)

রঞ্জা ।—হ্যাঁ দিদি ! সবাই রমাই ঘোষ রমাই ঘোষ করছে, রমাই ঘোষটা কে ?

পদ্মা ।—রমাই হচ্ছে 'নগরের' জায়গীরদার । তার বাপ হরি ঘোষ গোড়েশ্বরের বাড়ীতে রাখালি কর্ত । বর্তমান গোড়েশ্বরের বাপ হরি ঘোষকে বীরভূম জেলার ময়ূরাক্ষী নদীর ধারে নগর নামে একখানা গ্রাম জায়গীর দিয়েছিল । তারই বেটা রমাই ঘোষ ।

রঞ্জা । তা তার এত প্রতাপ, যে সমস্ত বাঙ্গলার লোক তার নামে কাঁপে !

পদ্মা ।—আজ কাল তার আশ্পর্কা বড়ই বেড়েছে বটে ।

রঞ্জা ।—তাকে কেউ দমন ক'রতে পারেনা ?

পদ্মা ।—কই নেকরূপ লোক ত দেখছিনি ! এক পারেন তোমার ভগিনীপতি । তা তাঁকে এই বৃদ্ধ বয়সে একটা তুচ্ছ রমাই ঘোষের বিরুদ্ধে পাঠিয়ে, মিছামিছি একটা বিপদ ডেকে আনবো ।

প্রথম অঙ্ক ।

রঞ্জা ।—দিদি ক্রোধ করোনা—এটা বিষ্ণুপুরের রাণীর যোগ্য কথা নয় ।

পদ্মা ।—রমাই আমাদের ত কোন অনিষ্ট করেনি ।

রঞ্জা ।—যদি করে ? যদিই সে বিষ্ণুপুর এসে আক্রমণ করে ?

পদ্মা ।—বল কি ভগিনী ! বিষ্ণুপুর আক্রমণ করাকি রমায়ের কাজ । গড়ের মুখের দল-মাদল কামানের স্রুমে স্বয়ং সমরাজই উপস্থিত হ'তে সাহস করেনা, তা সে কোথাকার তুচ্ছ রমাই ।

রঞ্জা ।—কথাটা শুনে সন্তুষ্ট হ'লুম না দিদি ! রমায়ের শুল্কম অদ্ভুত সাহস । লোকে তার ভয়ে বড়ই ভীত হ'য়েছে । বিষ্ণুপুরের অনেকেই ঘর ছেড়ে পালাবার কথা ক'চ্ছে । রমাই আমাদের ক্ষতি করেনি কি, যথেষ্ট ক্ষতি ক'রেছে । মহারাজের অনেকগুলি প্রজার ঘর লুটে নিয়েছে । আজ আবার শুল্কম গড় মান্দারণ অবরোধ ক'রেছে ।

পদ্মা ।—এ সব খবর তুমি কোথা থেকে পেলেন ? মহারাজ পেলেন না । আমি পেলুম না ।

রঞ্জা ।—শীঘ্রই এ সংবাদ পাবে । আমি মদনমোহনের মন্দিরে গিয়ে এ সংবাদ পেয়েছি । কোথা থেকে নারিকেল নিয়ে মহারাজের কাছে ভাট এসেছে ?

পদ্মা ।—আরে পাগলী ! সে কিসের জ্ঞান ! সে তোমার জ্ঞান ভাট নারিকেল এনেছে । তুমি নিশ্চিত থাক, আর দু'দিন পরে আমরা এমন শক্তিমানের সঙ্গে সম্মুখবন্ধনে আবদ্ধ হচ্ছি, যে শত রমাইও আর বিষ্ণুপুরের ত্রিসীমায় আসতে সাহস ক'রবে না ।

রঞ্জা ।—পরের অনুগ্রহ ভিক্ষারই বা প্রয়োজন কি ?

পদ্মা।—এমন পাগল মেয়ে ত আমি কখন দেখিনি ।
পরকি ? সে যে দুদিন পরে নিজের হতেও আপন হবে । বর
পেয়েই তুই পর হয়ে যাবি নাকি রঞ্জাবতী ।

রঞ্জা।—দাদা ত সেনাপতি তা তিনি এত সৈন্য নিয়ে চুপ
করে আছেন কেন ?

পদ্মা।—আ হরি ! তোমার দাদা কি মানুষ ! তা হ'লে
ছঃখ কি ! সে রাজার শালা বলে সেনাপতি, যুদ্ধের কি জানে !
(বীরমলের প্রবেশ) কি সংবাদ মহারাজ !

বীর।—সংবাদ ভাল । আমি ত স্বীকার করে সওগাত দিয়ে
গোড়ে লোক পাঠিয়ে দিলুম । কিন্তু এ দিকে যে বিপদ উপ-
স্থিত রমাই যে মান্দারণ আক্রমণ ক'রেছে । একেবারে বিষ্ণু-
পুর ডিঙ্গিয়ে মান্দারণ আক্রমণ, এত ভাল কথা নয় ।

পদ্মা।—কোন পথ দিয়ে মান্দারণ গেল ?

বীর।—তা কেমন ক'রে বলব । কিন্তু তার মতলব ভাল
নয় । মান্দারণ-পতি লক্ষণ সেন আমার সহায় ছিলেন । তাকে
আক্রমণ করবার অর্থ ত আর কিছু নয়, আমাকে হীনবল করা ।
এতে বোঝা যাচ্ছে বিষ্ণুপুর আক্রমণ করবারও তার উদ্দেশ্য
আছে ।

(সকলের প্রস্থান)

দ্বিতীয় দৃশ্য ।

—*—

অস্থিকা—রাজবাটী প্রাঙ্গণ ।

(নয়ন ও প্রজাগণ)

১ম প্রজা।—দয়াময় বহুদূর থেকে আপনার নাম শুনে এসেছি ।

২য় প্রজা।—কোনও জায়গায় আশ্রয় পাইনি, মহারাজ !
তুলুম আপনি দয়ার সাগর । আপনি না রক্ষা করলে দেবতা,
আমরা যে সব ধনে প্রাণে মারা যাই ।

৩য় প্রজা।—ঘর বাড়ী, ধন, দৌলত, স্ত্রী-পুত্র, সব যমের
মুখের কাছে রেখে এসেছি ।

নয়ন।—আগে স্থির হও, এমন ব্যস্ততা দেখালে ত আমি
কিছুই বুঝতে পারবো না । স্থির হয়ে বুঝিয়ে বল ।

৪ম প্রজা। মহারাজ ! রমাই ঘোষের দৌরায়ে আমা-
দের প্রাণ যায় যায় হ'য়েছে ।

নয়ন।—রমাই ঘোষ ! সে ত বীরভূম জেলার জমীদার ।

৫ম প্রজা।—আজ্ঞা হাঁ মহারাজ !

নয়ন।—তা সে এখানে এলো কেমন করে ! তোমরা
কার প্রজা ?

৬ম প্রজা।—আজ্ঞে গড় মান্দারগের রাজার ।

নয়ন।—লক্ষ্মণ সেনের ! তা তিনি তো একজন বীরপুরুষ
তিনি কি ঘোষের পোকে দমন করতে পারলেন না ?

৭ম প্রজা।—তিনি কি আছেন ?

রঞ্জাবতী

নয়ন ।—লক্ষ্মণ সেন নেই ?

১ম প্রজা ।— তিনি রমায়ের সঙ্গে যুদ্ধে মারা প'ড়েছেন । তাঁর স্ত্রী এক শিশু পুত্র নিয়ে নগর রক্ষা ক'রছেন । কিন্তু তিনি আর কয়দিন রমায়ের সঙ্গে যুদ্ধে পারেন হ'জুর ! তাই আপনার শরণাপন্ন হ'য়েছেন । এই পত্র দিয়েছেন (পত্রদান) আপনি তাঁর পিতৃস্বরূপ হ'য়ে তাঁর, ধর্ম, মান, শিশুপুত্র, রক্ষা করুন ।

নয়ন ।— ভাল, তোমরা বিশ্রাম করগে ।

১ম প্রজা ।—দয়াময়, আশ্রয় দিন্ অভয় দিন্ ।

নয়ন ।— কোথায় বীরভূম, আর কোথায় মানভূম, এর ভেতরে কিছু না হয় ত ছোট বড় একশো জমীদার । মাঝখানে বিষ্ণুপুর সে সমস্ত ডিঙ্গিয়ে রমাই ঘোষ কেমন ক'রে মান্দারণে এসে উপস্থিত হ'লো !

১ম প্রজা ।—কিছুই বলতে পারছি না মহারাজ ।

নয়ন ।—বেশ, তোমরা বিশ্রাম ক'রগে ।

উভয়ে ।—মহারাজ নিশ্চিত হব ?

নয়ন ।—হঠাৎ আমি একটা জবাব দিতে পাচ্ছিনে । বুঝতেই ত পার্ছ বাপু ! আমি বুদ্ধ । যৌবনের শক্তির কথা মাত্রও আমাতে অবশিষ্ট নেই । তাঁর পর বাঙ্গলার কোন রাজাই তাঁর সঙ্গে প্রতিদ্বন্দ্বিতা করতে সাহস করেনি । আমি একটু দেওয়ানের সঙ্গে পরামর্শ না ক'রে কিছু বলতে পার্ছ না । ভাল গড়ের এখন অবস্থা কি ?

১ম প্রজা ।—আজ কালের ভেতরে সাহায্য না পেলে, গড় শত্রু হস্তগত হবে ।

নয়ন ।—যাও, একটু বিশ্রাম করগে । কে আছে—
দেওয়ানজীকে ডেকে দাও ।

(প্রজাগণের প্রস্থান)

(বলাইয়ের প্রবেশ)

বলা ।—মহারাজ ! গোলামকে তলব ক'রেছেন কেন ?

নয়ন ।—তোর বাপ চ'লে গেছে ?

বলা ।—হাঁ মহারাজ, বাবা ও মা দুজনেই ত কাল রাত্রে
চ'লে গেছে !

নয়ন ।—কোন পথে গেছে ব'লতে পারিস্ ? মেদিনী-
পুরের পথে না তমলুকের পথে ?

বলা ।—তা তো ব'লতে পারি না মহারাজ ! জগন্নাথে
যাবে এইমাত্র জানি ।

নয়ন ।—তা তো যাবেই । কিন্তু কালীঘাট হয়ে যাবে
শুনেছিলুম ।

বলা ।—আমি তা জানি না । কেন মহারাজ ! তাঁকে
কি দরকার আছে ? দরকার থাকে ত বলুন না । যেখানে
থাকে ধরে নিয়ে আসি । হুকুম করুন, লাঠীতে ভর দিয়ে
একেবারে উড়ে যাই ।

নয়ন ।—না তা আর ক'রতে হবে না । তারা স্বামী
স্ত্রীতে, পুরুষোত্তম দর্শনে চ'লে গেছে, তাদের আর বাধা দিয়ে
কাজ নেই । দেখি তুই এক কাজ কর, তাদের দলবল, যে
যেখানে থাকে, সব এক জায়গায় জড় হ'য়ে থাকতে বল ।
আমার দোসরা হুকুম না হ'লে, যেন কোথাও না যায় ।

বলা —যে আজ্ঞে ।

(প্রস্থান)

(দেওয়ানের প্রবেশ)

নয়ন ।—মান্দারণের কতকগুলি প্রজা শরণার্থী হয়ে আমার কাছে এসেছে । মান্দারণের রাজা লক্ষ্মণ সেন জীবিত নাই । তার এক মাত্র শিশু সন্তান এখন মান্দারণের অধিপতি । রমাই ঘোষ তার রাজ্য আক্রমণ করেছে । তার হাত থেকে সে শিশুর প্রাণরক্ষা করে, এমন শক্তিমান মান্দারণে কেউ নাই । এরূপ অবস্থায় কি কর্তব্য দেওয়ান ।

দেও ।—মহারাজ চিরদিনই আর্তব্রাণ । কিন্তু রমায়েরও অসীম প্রতাপ ।

নয়ন ।—সেই জন্মই তো তোমাকে জিজ্ঞাসা করছি কর্তব্য কি ?

দেও ।—বিশেষ আয়োজন না করে, তার সঙ্গে যুদ্ধ করতে পরামর্শ দিতে আমি সাহস করি না ।

নয়ন ।—তার ওপর দলু সর্দার এখানে নেই । সে তীর্থ করতে স্বস্তীক পুরুষোত্তমে চ'লে গিয়েছে । অস্থিকায় রমায়ের সমকক্ষ যোদ্ধার অভাব । আমার ছেলেরা শান্তির সময়ে জন্মগ্রহণ করেছে, প্রকৃত যুদ্ধ কখনো দেখেনি । আমি বৃদ্ধ যৌবনে যে শক্তির প্রভাবে আমি অস্থিকার গৌরব প্রতিষ্ঠা করেছি, আর তা আমাতে নেই ।

দেও ।—তুমি এ বিষয়ে চিন্তা না করলে ত আমি কিছু বলতে পারছি না মহারাজ ।

নয়ন।—চিন্তা। দেওয়ান চিন্তার অবসর নাই। আজ যদি মান্দারণ রক্ষার্থ সৈন্ত না পাঠাই, কাল লক্ষণ সেনের ক্ষুদ্র শিশু শত্রুহস্তগত হবে।

দেও।—তাহ'লে, আমি ভৃত্য—আমি মহারাজের যশঃ শরীরেরই স্বাস্থ্য কামনা করি। এ যুদ্ধের পরিণাম কি বুঝতে পারছি না। তথাপি আমি আপনাকে এ মহৎ কার্য হ'তে নিবৃত্ত হ'তে বলতে সাহস করি না। কেননা শরণাগত প্রতিপালনই রাজধর্ম।

নয়ন।—দেওয়ান! এই কথা শোনার জন্মই আমি তোমাকে ডাকিয়েছিলুম। তাহ'লে তুমি এখন থেকেই রাজ্যভার গ্রহণ কর।

দেও।—তা আপনিই বা একাধে অগ্রসর হবেন কেন মহারাজ! চিরকালই যে অস্থিকায় শাস্তি থাকবে তারই বা মানে কি? এইত অশান্তির সূচনা—আপনার চার উপযুক্ত পুত্র। এই অবসরে তাদের রাজ্যরক্ষার উপযোগী করলে হয় না?

নয়ন।—বেশ বলেছ। রাজপুত্র যদি রাজধর্মের উপযুক্ত না হয়, তাহ'লে তাদের জীবনের মূল্য কি! আমার অস্থিকা তাদের জন্ম নয়। শত বৎসর কাপুরুষ রাজার অধীন থাকার চেয়ে, একদিনের বীরত্ব স্মৃতি বুকে ধ'রে যদি আমার অস্থিকা রসাতলে যায়, তাও অস্থিকার গৌরবের কথা।

দেও।—ভৃত্যেরও তাই মত মহারাজ!

নয়ন।—বেশ, তুমি এখন এস। (দেওয়ানের প্রস্থান)
মহীধর! (রাজপুত্র চতুষ্টয়ের প্রবেশ) মান্দারণের শিশুরাজা বড়ই বিপন্ন। নগরের এক জমিদার, তাঁর রাজ্য আক্রমণ

ক'রেছে । তোমরা সেই শিশুটীকে রক্ষা ক'রতে পারবে ?

১ম পুত্র ।—মহারাজ ! শিশু রাজার বিপদের কথা শুনে আমরা সকলেই রমাই ঘোষের সঙ্গে যুদ্ধ ক'রবার অনুমতি নিতে এসেছি ।

নয়ন ।—বড়ই সস্তুষ্ট হ'লুম । তাহ'লে আজই তোমরা রক্ষিণী দেবীকে প্রণাম ক'রে যাত্রা কর । সময় বড়ই সংক্ষিপ্ত, দিন ক্ষণ দেখে যাত্রা ক'রবার পর্য্যন্ত অবকাশ নাই ।

সকলে ।—যথা আজ্ঞা ।

(প্রস্থান)

তৃতীয় দৃশ্য ।

—*—

বিষ্ণুপুর—রাজবাটী ।

(মণিরাম)

মণি ।—রমাই ঘোষের দমন ক'রতে আমি যাব ! পাগল আর কাকে বলে । যা শত্রু পরে পরে । রমাই ঘোষ লক্ষ্মণ সেনকে মেরে ফেলতে পারলেই ত আমি নিশ্চিত । আমি রমাইকে মারি, আর উনি অপুত্রক বিষ্ণুপুর রাজ, তার একটা ছেলেকে পুষ্টিপুত্র নিয়ে রাজ্যটী তাকে দান করেন । এ রকম কাজ না ক'রলে ঠ'র সুখ হবে কেন ! একটা একটা ক'রে রাজ্যের সবাইকে তাড়িয়ে আমিই রাজ্যের এক রকম কর্তা হ'য়েছি । সমস্ত সৈন্ত এখন আমার বশে, আর আমাকে পায় কে ! কালে আমিই বিষ্ণুপুরের রাজা । লক্ষ্মণ সেন ম'লে শর্মা একেবারে নিশ্চয় রাজা । এখন আমি তাকে রক্ষা

ক'রে আপনার পায়ে কুড়ুল মারি । আরে আমিই ত রমায়ের পেছনে আছি,—তাকে বিষ্ণুপুরের ধার দে নির্ঝিল্লি যাতায়াত ক'রতে দিচ্ছি । আমি শক্রহ'লে সে বিষ্ণুপুর ডিঙ্গিয়ে যায় কেমন করে ? সেই রমাইকে মারতে আমি যাব ।

(বীরমল্লের প্রবেশ)

বীর ।—রমাই ঘোষ নাকি গড় মান্দারণ অবরোধ ক'রেছে !

মণি ।—তাইত শুন্ছি মহারাজ !

বীর ।—শুনে কি ক'রছ !

মণি ।—কি ক'রব ঠাওর ক'রতে পারছি না ।

বীর ।—লক্ষ্মণ সেন আমার হিতৈষী বন্ধু । তার বিপদের কথা শুনে তুমি চুপ ক'রে আছ ?

মণি ।—আজ্ঞা মহারাজ আমি তো চুপ ক'রে নেই । রমাই ঘোষের কি ক'রে দমন হয়, এই ভাবনায় আমি ছটফট ক'রে বেড়াচ্ছি ।

বীর ।—ছটফট ক'রে বেড়ালে ত আর সে নেমকহারামের দমন হবে না, মান্দারণের সাহায্যে সৈন্ত পাঠাও ।

মণি ।—পাঠাবার ব্যবস্থা ক'রছি । কোন্ দিক দিয়ে কত সৈন্ত নিয়ে গেলে চট করে রমাইকে গ্রেপ্তার ক'রব তারই চিন্তা ক'রছি ।

বীর ।—চিন্তা ক'রতে ক'রতে যখন রমাই এসে তোমাকে চট ক'রে গ্রেপ্তার ক'রে আমার রাজ্য আক্রমণ ক'রবে, তখন কি ক'রবে !

মণি ।—আপনার রাজ্য আক্রমণ করা কি রমায়ের সাধ্য ! মান্দারণের ক্ষুদ্র জমীদারের সঙ্গে কি আপনার তুলনা । আপনি

পশ্চিম বঙ্গের রাজা। আপনার দল-মাদল কামানের স্রুমুখে
স্বয়ং সমরাজ ঘেসতে পারেন না ; আপনার রমাইকে ভয় কি
মহারাজ ?

বীর।—ও সব স্তোক বাক্যে আমায় ভোলাবার চেষ্টা
ক'রোনা মণিরাম ! সংসার সম্বন্ধে তুমি আমার আত্মীয়ই হও,
আর যেই হও, রাজ্য সম্বন্ধে যদি তোমা হ'তে সামান্য অনিষ্টও
হয়, তাহ'লে আমি তোমাকে শত্রু বলেই মনে ক'রব।

মণি।—সে কি মহারাজ ! আমি আপনার ভৃত্য, আমা
হ'তে আপনার অনিষ্ট হবে, একি কথা ! আমি মহারাজের
মঙ্গলের জন্তই যুদ্ধে যেতে ইতস্ততঃ ক'রছি।

বীর।—আর ইতস্ততঃ ক'রতে হবে না, এখনি সৈন্য নিয়ে
মান্দারগে যাও। ছুরাখা রমাইকে শাস্তি দাও। যদি এই
বৃদ্ধ বয়সে আমাকে অস্ত্রধারণ করাবার ইচ্ছা না থাকে, তা হ'লে
আজই সৈন্য নিয়ে যাত্রা কর। সে নেমকহারামকে বেঁধে
নিয়ে এস।

(প্রস্থান)

(রঞ্জাবতীর প্রবেশ)

রঞ্জা।—হাঁ দাদা ! মহারাজ আপনাকে বার বার রমাইকে
দমন ক'রতে ব'লছেন, আপনি ইতস্ততঃ ক'রছেন কেন ?

মণি।—আরে থাম্, জেঠাম করিস্নি। মেয়ে মানুষ মেয়ে
মানুষের মতন থাক্। তোর এ সব কথায় দরকার কি ?

রঞ্জা।—আমাদের যে গুন্তে হয়।

মণি।—গুন্তে হয় ত নিজে লড়াই করগে যা না।

রঞ্জা।—কাজেই, আপনি না পারলে, আমাদের ঘেতে হবে বই কি ।

মণি।—আরে ম'ল ! বলে কি !

রঞ্জা।—বাবা আমার খুঁজে খুঁজে লোকের উপকার ক'রে আসতেন, তাঁর পুত্র হ'য়ে আপনার একি আচরণ ?

মণি।—ভারী কাজ ক'রেছে ! দান ধ্যান, লোকের উপকার এ সব ক'রে ত সব হ'ল । পৈত্রিক বাস্তুভিটে যেখানে যা ছিল, একদিনে দামোদর সব পেটে পুরে ফেললে । শুধু লোকের উপকার ক'রলেই যদি ছনিয়া চ'লত, তাহ'লে তোমার বাপের ভিটেয় আজ চেউ খেলত না । আর অমন বংশের মেয়ে এই বাগ্‌দী রাজার ঘরে প'ড়তো না । বাপ যদি আমার বোকা না হ'ত, তাহ'লে কি পরের উপকার ক'রতে গিয়ে, নিজের এত বড় একটা অনিষ্ট ক'রে বসে ! আমাকে কি ভগ্নীপোতের চাকরী ক'রে খেতে হয় । না তার মুখ নাড়া সহিতে হয় ।

রঞ্জা।—এ আপনি কি ব'লছেন দাদা ?

মণি।—ব'ল্ব আবার কি ! বলবার আর আছে কি ! তুই যা আপনার কাজ দেখ'গে যা ।

রঞ্জা।—আপনার জন্তে সবাই আমার সাধু বাপের নিন্দে ক'রছে । শুনে আমার কান্না পাচ্ছে ।

মণি।—কে নিন্দে ক'রেছে বলত ? তাকে একবার নিন্দা করবার মজাটা দেখিয়ে দিই ।

রঞ্জা।—কার নাম ক'র্ব্ব, নিন্দার কাজ ক'রলেই নিন্দে করে । আপনি বাঙ্গালার রাজার মহাপাত্র আপনার অধীনে

হাজার হাজার সৈন্ত, আপনি একটা তুচ্ছ জায়গীরদারের ভয়ে ঘরে লুকিয়ে র'ইলেন ।

মণি ।—ভয়ে, কে এ কথা ব'লে ?

রঞ্জা ।—বেশ ত, আপনি রমাই ঘোষের সঙ্গে লড়াই দিন । আপনার সৈন্ত বলের ত অভাব নেই ।

মণি ।—আমি আজই সৈন্ত সামন্ত নিয়ে রমাই ঘোষকে বেঁধে আনছি ।

রঞ্জা ।—তাই যান । বাবার আমার মুখ রক্ষা হোক ।

মণি ।—রমাই ঘোষকে ধরে আনবো, এত ভারী একটা কথা ! ধরে আনবার গা করিনি, এতদিন এলা কাড়ি দিয়ে রেখেছিলুম । তাই রমাই ঘোষ লাফালাফি ক'রে বেড়াচ্ছে ।

রঞ্জা ।—এখনি যান । বঙ্গেশ্বরের সেনাপতি আপনি, পদ-গৌরব রক্ষা করুন । মহারাজের মান রক্ষা করুন ।

মণি ।—আচ্ছা তা করা যাচ্ছে, তুই এখন যা ।

রঞ্জা ।—আর না পারেন, যোগ্য পাত্রের ভার দিন । এমন সর্বশ্রেষ্ঠ পদের গৌরব হানি ক'রবেন না । আপনার জন্ম লোকে যে আমার দেবতা পিতার ছুঁয়াম রটনা ক'র্বে । তা আমরা সহ্য ক'র্তে পারবো না । রানী পর্যন্ত আপনার আচরণে অসন্তুষ্ট হ'য়েছেন । দিদির যদি ছেলে থাকতো সেকি কখন তার বাপের অপমান সহ্য ক'র্তে পারত ! আপনাকে অনু-রোধ ক'র্ছি, পায়ে ধর্ছি আপনি বিলম্ব ক'রবেন না । বিষ্ণুপুরের সকল লোক ভীত হ'য়েছে । তারা স্ত্রী পুত্র নিয়ে বিষ্ণুপুর ছেড়ে পালাবার বন্দোবস্ত ক'র্ছে । দোহাই দাদা তাদের অভয় দিন ।

মণি ।—আচ্ছা তুই যা না। আমি এখনি রমাইয়ের মুণ্ড-পাতের ব্যবস্থা ক'রছি। তুই যারাজাকে অভয় দিগে যা। বাপের নাম ডুবে যাচ্ছে, এ কথা আমায় আগে ব'লতে হয়। তাহ'লে এতদিন কোনকালে আমি রমাইকে জাহান্নমে পাঠিয়ে দিতুম।

রঞ্জা ।—তাই যান। শুধু মুখে গর্ক দেখাবার সময় গেছে দাদা! গর্কের কাজ করুন, আমাদের মুখ উজ্জ্বল হোক।

মণি ।—আচ্ছা যা। পৈত্রিক ভিটে দামোদরের জলে ডুবে গেল, আমি জান্তুম বাপের নাম সেই সঙ্গেই ডুবে গেছে। সে যে আবার মাঝখান থেকে বুড়'বুড়ি কেটে ভেসে উঠেছে, তা কেমন ক'রে জানবো। বস, আর তাকে ডুবতে দিচ্ছিনি যা—(রঞ্জাবতীর প্রস্থান) সৃষ্টিধর—

(সৃষ্টিধরের প্রবেশ)

সৃষ্টি !—হজুর।

মণি ।—সব সৈন্ত সামন্তদের প্রস্তুত হ'তে বল। আমি যুদ্ধে যাব।

সৃষ্টি ।—তারা প্রস্তুত হ'য়ে আছে।

মণি ।—কি করে জানলি ?

সৃষ্টি ।—আজ্ঞা তারা কণ্ঠায় কণ্ঠায় ছাতু খেয়ে হামাগুড়ি দিচ্ছে—

মণি ।—হামাগুড়ি দিচ্ছে কি ?

সৃষ্টি ।—আজ্ঞে, তারা জানে যুদ্ধে গেলে ত মরতেই হবে, তা হ'লে আর তীর খেয়ে মরি কেন, একপেট ছাতু খেয়েই মরি।

মণি ।—নে আমার সঙ্গে চলে আয়, আমাদের লড়ায়ে যেতে হবে।

সৃষ্টি ।—আজ্ঞে, তাহ'লে—ছাতি—পাখা—গাড়ু গামছা
গুলো সঙ্গে নিই—

মণি ।—তুই বেটা বড়ই বেয়াদব ।

সৃষ্টি ।—হুজুরের ভাল ক'রতে গেলেও যদি বেয়াদবী হয়
তা হ'লে সূয়াদবী হয় কখন । হুজুর লড়াই ক'রবেন, আর
আমি পেছন থেকে মাথায় ছাতি ধ'রে থাকবো আর বাতাস
ক'রবো । যুদ্ধ করতে করতে যখন মুখ শুথিয়ে যাবে, তখন
গাড়ুর জলে কুল্কুচো ক'রবেন আর গামছায় মুখ মুহবেন ।

(প্রশ্নান)

চতুর্থ—দৃশ্য ।

—*—

পুরুষোত্তম—পথ ।

(দলু সর্দার ও লক্ষ্মী)

দলু ।—হাঁ লক্ষ্মী ! বাড়ী থেকে বেরিয়ে অবধি মনটা কেমন
কেমন ক'রছে কেন ?

লক্ষ্মী ।—ঘর থেকে বেরুলি, সংসার ফেলে চ'লে এলি
একটু মন কেমন যদি করে তাতে আর আশ্চর্য্য কি ?

দলু ।—আরও কত দিন ত ঘর ছেড়ে বেরিয়েছি, সংসার
ফেলে কত দিন ত বাইরে বাইরে কাটিয়েছি, কিন্তু এমন ত
কখন হয় নি ।

লক্ষ্মী ।—অবাক ক'রলে বাবু ! তখন যদি নাই করে, তা
ব'লে এখন কি ক'রতে নেই ।

দলু।—তখন বরং মন খারাপ হওয়া উচিত ছিল। তোরে ঘরে রেখে বাইরে বাইরে একা ঘুরতুম, কত বিপদ আপদের অব্যাদিয়ে পথ চলতুম, এখনকার মতন অবস্থাও তখন ছিল না। সে সময় মন কেমন করলে না, আর এখন মনিবের সোণার সাজান সংসার, মনিবের রূপায় আমারও সুখের সংসার, তুই আমার সঙ্গে—চলেছি জগবন্ধু দেখতে, তবু আমার প্রাণটা থেকে থেকে কেঁদে উঠছে কেন? দেখ লক্ষ্মী! আর আমার যেন এক পাও এগুতে ইচ্ছা ক'রছে না।

লক্ষ্মী।—ছি! ওকথা ব'লতে নেই। পূর্ব জন্মে কত পাপ ক'রেছি, তাই এ জন্মে নীচ ঘরে জন্মেছি। আবার কি নরক ভুগতে আসবি? শুনেছি রথে জগবন্ধু দেখলে আর জন্ম হয় না। একটু মন বেঁধে চল। আর কিছুদূর গেলেই মন আবার ভাল হয়ে যাবে এখন। একি, পথের মাঝে বসে পড়লি যে!

দলু।—লক্ষ্মী পা আমার যেন অবশ হ'য়ে আসছে।

লক্ষ্মী।—দেখ, পথের মাঝে ঢলান দেখ।

দলু।—চল এইখান থেকে জগবন্ধুকে নমস্কার ক'রে বাড়ী ফিরে যাই।

লক্ষ্মী।—বলিস্ কি? পাগল হ'লি নাকি মিন্সে! নে ওঠ। আর পোটাক পথ গেলেই চটী পাওয়া যাবে, সেইখানে একেবারে বসবি চল। আজকে চলতে না পারিস্, রাত্রির মতন বিশ্রাম ক'রে কাল রওনা হওয়া যাবে এখন।

দলু।—না লক্ষ্মী—সত্যি বলছি লক্ষ্মী—এদিকে আর এক পাও চলতে ইচ্ছা ক'রছে না। মনে হচ্ছে, যদি পাখী হই ত এই দণ্ডে পাখায় ভর দিয়ে বাড়ী ফিরে যাই।

লক্ষ্মী ।—যদি এতই তোর মনে ছিল, তাহ'লে ঘর থেকে বেরুলি কেন ড়াক্ৰা মিন্‌সে ! আর যদি বেরুলি ত প্রথম দিন কেন ব'ল্লিনি—আজ তিন দিন পথ চ'লে ঢলাতে বস্‌লি কেন ? দেশে কি তুই লোক হাসাতে চাস্‌ । নে ওঠ্ —

দলু ।—টানিস্‌নি লক্ষ্মী ! আমার প্রাণ যথার্থই কেঁদে কেঁদে উঠ্‌ছে । মনিবের আমার কোন অমঙ্গল হলনা ত লক্ষ্মী ?

লক্ষ্মী ।—বালাই—শক্রর হোক ।

দলু ।—নইলে প্রাণ আমার এমন করে কেন ? পথ চল্‌ব কি, স্নুমুখে যেন কি একটা অন্ধকার—আকাশে যেন কি একটা অন্ধকার ! তোর ঐ চাঁদ মুখ সাক্ষাতে অসাক্ষাতে দেশে বিদেশে, যা আমি চোখের কাছ থেকে ছাড়াতে পারিনি, সেই চাঁদ মুখ আমার চোখের সামনে, আমি চেয়ে আছি, কিন্তু দেখছি কি যেন একটা অন্ধকার—লক্ষ্মী সমস্ত সংসারে কে যেন কালী মাথিয়ে দিয়েছে ।

লক্ষ্মী ।—ওমা—এসব কি কথা !

দলু ।—যথার্থ বলছি লক্ষ্মী, কখনত আমার এরূপ অবস্থা ঘটেনি ! কতদিন পথে পথে ঘুরেছি, কত বিপদে বুক দিয়েছি, তোর জন্তু, বলার জন্তু কত দিনত মন কেমন করেছে, কিন্তু এমনত কখন হয়নি লক্ষ্মী—! মনিবের জন্তুও ত কত দিন মন কেমন করেছে, কিন্তু এমনত কখন হয়নি লক্ষ্মী ! যখনই মনিবের জন্তু মন কেমন করেছে, তখনই গিয়ে মনিবের কোন না কোন একটা অসুখ দেখেছি ; কিন্তু একি ! প্রাণের ভেতর এ কি যাতনা !

লক্ষ্মী ।—তবে এক কাজ কর, আজ রাত্রে মতন এই কাছের চটিতে বিশ্রাম করে, কাল গঙ্গাচান করে ফিরে যাই চন্ । হাঁগা বাছা—! (জনৈক পথিকের প্রবেশ) মা গঙ্গা এখান থেকে কতদূর হবে ?

পথি ।—তোমরা কোথা থেকে আস্ছ ?

লক্ষ্মী ।—আমরা অনেক দূর থেকে আস্ছি বাছা ।

পথি ।—শুনেছি গঙ্গা এখান থেকে পাঁচ দিনের পথ ।
আমি কখনও গঙ্গা দেখিনি ।

দলু ।—লক্ষ্মী ! গয়া, গঙ্গা, কাশী, জগন্নাথ সমস্তই আমার মনিব । চল আগে বাড়ী ফিরে যাই । গিয়ে যদি দেখি মনিব আমার ভাল আছে, তাহ'লে বুঝব মন আমার কিছু নয় । তাহলে সত্যি করে বলছি বলার মা, অমনি অমনি ধুলো পায়ে অস্থিকা থেকে ফিরবো । আর জানিসত দলুই সর্দার মিথ্যে কথা কয় না । চল, একবার ঘরে ফিরে চল ।

লক্ষ্মী ।—নে তবে চল, এখনি চল ।

পথি ।—তোমাদের বাড়ী কি অস্থিকায় ?

দলু ।—হাঁ ভাই ! কেমন করে জানলে বল দেখি ?

পথি ।—এই একটা ছোকরা তোমাদের খুঁজছিল ।

উভয়ে ।—কই—কোথায় সে ? কোন পথে ?

পথি ।—এই একটু আগে চৌমাথার মোড়ে তাকে দেখেছি ।

দলু ।—ভাই আমাকে রক্ষা কর, কোথায় তাহাকে দেখেছ
আমায় দেখিয়ে দাও ।

পথি ।—এস আমার সঙ্গে—

(প্রস্থান)

দলু ।—লক্ষ্মী কিছুক্ষণের জন্য এই গাছ তলাতে বসে থাক ।

(বলাইয়ের প্রবেশ)

লক্ষ্মী ।—এই যে বলাই ! কি বলাই ! কি বাবা !

বলা ।—মা মা, বাবা কই ! এই যে বাবা ! সর্কনাশ হয়েছে । শিগ্গির আয় বাবা শিগ্গির আয়—লাঠিতে ভর দিয়ে ছুটে আয় । দোহাই বাবা দেরি করিস্নি—নইলে পালাবে, সব নিকেশ করে পালাবে ! হাঁ বাবা, তুই অস্থিকায় থাকতে, মনিবের সর্কনাশ করে পালাবে !

লক্ষ্মী ।—কে পালাবে রে ! সব শেষ কিরে ?

বলা ।—মা ! সব শেষ ! অস্থিকার সব শেষ ! কি বলব মা ! মুখে যে কথা আসছে না—বুক যে ফেটে যায় মা—রাজপুত্র মহীধর—গুণধর—ভূধর—শ্রীধর—কেউ নেই ।

উভয়ে ।—এঁয়া !

।।—ওরে কি বল্লিরে !

বলা ।—ও বাবা ! শয়তান কাজ শেষ করে যে চলে যায় বাবা ! তুমি বেঁচে থাকতে তার গায়ে আচড় লাগবে না—

দলু ।—বলাই তোর মাকে সঙ্গে নিয়ে আয়—লক্ষ্মী আমি চলুম ।

(প্রস্থান)

লক্ষ্মী ।—কি কথা কইলি বলাই !

বলা ।—আমি রাজাকে বলেছিলুম মা যে, বাবা বেশীদূর যায়নি ডেকে আনি । রাজা শুনলেনা, কিছুতেই শুনলেনা ছেলে পাঠালে । মা ! একটা একটা করে রাজা সব ছেলে ঘরের

মুখে দিলে । রাণী ছেলের শোক সহিতে পারলে না, আছাঁড়
থেয়ে সেই যে পড়ল, আর উঠলো না ।

(উভয়ের প্রস্থান)

পঞ্চম—দৃশ্য ।

—*—

অম্বিকা—দুর্গ সম্মুখ ।

(দেওয়ান ও প্রহরী)

দেও ।—মহারাজ কোথায় গেলেন, মহারাজ কোথায়
গেলেন ? রাজা ?

প্রহরী ।—কই হুজুর, আমি ত তাঁকে দেখিনি ।

দেও ।—দেখিস্নি, তবে কি পাহারা দিচ্ছিস্নি ! রাজা গড়ের
বাইরে গেছেন—শিগ্গীর যা শিগ্গীর যা,—তাঁকে ফিরিয়ে
আন ।

প্রহরী ।—আজ্ঞে হুজুর, এ পথে ত রাজা আসেন নি,
আমি ত বরাবর এখানে খাড়া আছি ।

দেও ।—দেখ্ দেখ্ খুঁজে দেখ্ তাহ'লে এই গড়ের ভেতর
চারিদিক খুঁজে দেখ । গোল করিস্নি, কেউ যেন জানতে না
পারে । চুপি চুপি তল্লাস কর । যা—যা—চ'লে যা—ছুটে
যা । (প্রহরীর প্রস্থান) হা ভগবান, এমন ধার্মিক রাজারও
সর্বনাশ হয় । আমি ব'লে সর্বনাশ ক'ব্লুম ! আমিই বংশ
লোপের কারণ হ'লুম । তা যা হোক, এখন খুঁজি কোথায় ?
এই ঘোর অন্ধকার—কালের মানুষ দেখা যায় না, এমন

সময় কি ক'রে তাঁকে খুঁজে বার করি। এ কথা ত কাউকে প্রকাশ ক'রতে পারছি না। রাজা গৃহ ত্যাগ ক'রে চলে গেছেন এ কথা প্রচার হ'লে অশ্বিকার বড়ই বিপদ। রাজা কি সত্য সত্যই গৃহত্যাগ ক'রে চ'লে গেলেন। যদি চ'লেই না গিয়ে থাকেন, তাহ'লে গেলেন কোথায়? এই যে আমার সঙ্গে কথা কইলেন এইযে—আমাকে বোঝালেন, রাজার সন্তান যদি যুদ্ধে মরে ত তার চেয়ে বাপের গৌরব করবার কি আছে! কে ও?

(দলুর প্রবেশ)

দলু।—কেও দাওয়ান মশায়!

দেও।—কেও? দলু?

দলু।—আজ্ঞা হাঁ!

দেও।—রাজার অবস্থা শুনেছ কি?

দলু।—শুনেছি। কিন্তু বলার কথা ভাল বুঝতে পারিনি।

দেও।—একদণ্ড অশ্বিকা ছেড়ে গেছ, আর অমনি দারুণ কাল এসে অশ্বিকা গ্রাস ক'রেছে। এক মুহূর্তে মহারাজ পুত্রহীন।

দলু।—তাহ'লে বলা যা বলেছে সব সত্য! সব ছেলেই গেছে।

দেও।—কেউ নেই। রাণী পর্য্যন্ত পুত্রশোকে প্রাণত্যাগ ক'রেছেন।

দলু।—আর রাজা?

দেও।—পুত্রদের মৃত্যু সংবাদ শুনে, রাজা পুত্র হত্যার প্রতিশোধ নিতে মান্দারণে ছুটে গিচ্ছিলেন।

দলু।—মান্দারণে গিচ্ছিলেন কেন?

দেও।—তাহ'লে দেখছি তুমি সব কথা শোনুনি। কিন্তু

সব কথা ত এখন বলবার অবকাশ পাচ্ছি না ভাই । আগে রাজাকে অন্তর্দৃষ্টি কর ।

দলু ।—কোথায় খুঁজবো !

দেও ।—রাজা পুত্রহত্যার প্রতিশোধ নিয়ে মান্দারগ থেকে ফিরে এসেছেন । যার জন্ত এই সর্বনাশ সেই রমাই ঘোষকে মেরে মান্দারগের শিশু রাজাকে উদ্ধার করে এনেছেন । এনে আমার হাতে দিয়েছিলেন । আমি সেই শিশুকে আমার ঘরে রাখতে গিয়েছিলুম । ফিরে এসে দেখি মহারাজ নেই । সেই অবধি অন্তর্দৃষ্টি করছি তবু তাঁকে দেখতে পাচ্ছি না ।

দলু ।—রাজা রাজা কোথায় রাজা ?

দেও ।—চিন্তা করোনা, সর্বনাশ হবে ।

দলু ।—আবার সর্বনাশ হবে, এর চেয়ে আর কি সর্বনাশ হবে, অধিকার আর কি আছে দেওয়ান মশাই, অধিকার সর্বশূন্য গেছে, আর অধিকার কি আছে ? রাজা—রাজা—কোথায় রাজা !

(সকলের প্রস্থান)

ষষ্ঠ—দৃশ্য ।

—*—

বিষ্ণুপুর—রাজ-অস্তঃপুর ।

(রঞ্জাবতী ও বীরমল্ল)

বীর ।—কি গো সুন্দরী !

রঞ্জা ।—কি আজ্ঞা মহারাজ !

বীর ।—দাঁড়িয়ে দাঁড়িয়ে হচ্ছিল কি ?

রঞ্জা।—মালা গাঁথছিলুম ।

বীর।—ক'র জন্তে গো ?

রঞ্জা।—হাঁ মহারাজ ! আপনি যখন তখন দাদার কথা নিয়ে রহস্ত করেন, কিন্তু রমাই ঘোষ ত ম'ল ।

বীর।—রমাই ঘোষ ম'ল বটে । কিন্তু সেকি তোমার দাদার হাতে ম'ল ! তাহ'লে আমার দুঃখ কি ! এত বড় রাজ্যের সর্কপ্রধান পদে তাকে নিযুক্ত ক'রেছি, সে কেবল পদের গৌরবেই উন্নত । পদের মর্যাদা রাখতে পার্ত তবে না আমার আক্ষেপ যেত ।

রঞ্জা।—তবে রমাই ঘোষকে মারলে কে ?

বীর।—যেই রমাইকে বিনষ্ট করুক না কেন, তাতে ত আমার গৌরব বৃদ্ধি হ'ল না । একটা অতি তুচ্ছ জায়গীরদারের বিদ্রোহ, আমার হাজার হাজার সৈন্ত থাকতেও ত রমাই ঘোষের দমন হ'ল না ! কাপুরুষের মত আমার সেনাপতি, আমার অস্ত্রে পুষ্ট হয়ে মাথায় কলঙ্কের পসরা চাপালে, আর একজন সানাত্ত ভূমাধিকারী কিনা তাকে বিনষ্ট ক'রে মুষণ কিনলে ?

রঞ্জা।—কে সে মহারাজ ?

বীর।—আজ রাঢ়ের এক প্রান্ত থেকে অন্য প্রান্ত পর্যন্ত কেবল নয়ন সেনের নাম । প্রতি গৃহস্থ, যারা দু'দিন আগে সময়ে অসময়ে আমার অখ্যাতি রটনা ক'রছিল, রমায়ের অত্যাচারে জর্জরিত হয়ে, আমাকে কেবল গাল দিচ্ছিল । আজ তারা সকলে এক বাক্যে নয়ন সেনের প্রশংসা ক'রছে । হাজার হাজার সৈন্তের অধিপতি হয়েও, আমার ত সে সৌভাগ্য হ'ল না রঞ্জাবতী !

রঞ্জা ।—কে তিনি মহারাজ ?

বীর ।—তিনি যেই হোন, তাঁর কথা মুখে আন্লেও পুণ্য
সঞ্চয় হয় । ছাপরে কর্ণসেন একটা শিশুপুত্রকে দেবতা অতিথির
জন্ত স্বহস্তে বলি দিয়ে দাতাকর্ণনামে জগতে অভিহিত হ'য়ে
ছিলেন । আর এ মহাপুরুষ শুধু একটা পিতৃ মাতৃহীন রাজ্য
কুমারকে রক্ষা ক'রতে, দেশের অক্ষম গৃহস্থের মান ধন্য রক্ষা
ক'রতে চার চার পুত্রকে রণদেবীর মন্দিরে বলি দিয়েছে, একপ
লোকের কি অভিধান হ'তে পারে সুন্দরী !

রঞ্জা ।—মহারাজ ! তিনি নিজেই অজরামর দেবতা !
তাঁকে আমি এই খান থেকেই উদ্দেশে প্রণাম করি । তাঁর
পত্নী ইন্দ্রের শচী হতেও ভাগ্যবতী ।

বীর ।—তাতে আর অনুমাত্রও সন্দেহ নাই রঞ্জাবতী !
কিন্তু দেখ এ সৌভাগ্য পেতে রমণী মাত্রেই ইচ্ছা হয় কিনা ।
কিন্তু তোমার ভগ্নী সেটা বুঝতে পারলেন না । যখন একটা
দীন অনার্য্য-পালিত ক্ষত্রিয় বালক, এই পশ্চিম বঙ্গের রাজাদের
ওপর আধিপত্য প্রতিষ্ঠা ক'রতে প্রাণপণে চেষ্টা করেছিল,
তখন তোমার ভগিনী আমার একমাত্র সহায় ছিল । আর
এখন, আমার বহুদিন থেকে অর্জিত সুখশ অল্পে অল্পে বিনষ্ট
হচ্ছে দেখেও তিনি নিশ্চিন্ত হয়ে বসে আছেন । ভাইকে
তাঁর কোন কথা বললেই তিনি দুঃখিত । অনার্য্য জাতির
সংস্পর্শে থাকবার জন্ত, রাজ্য জয় ক'রে শুধু আমি বাগ্দী রাজা
অভিধান পেয়েছি । কিন্তু রাজার যা কার্য্য দীন শরণাগতের
প্রতিপালন, তা ক'রে ক্ষত্রিয় নাম ত গ্রহণ করতে পারলুম না ।

(পদ্মাবতীর প্রবেশ)

পদ্মা।—আপনার মর্যাদা নষ্ট দেখতে, আমি ভাইয়ের উপর এই ক্ষেপ দেখাই নি মহারাজ ! পিতা আমার মৃত্যুকালে হতভাগ্যকে আপনার হাতে সমর্পণ করে যান, আপনি ও পুত্র ক্ষেপে তাহাকে পালন করেছেন। কিন্তু ভাই হ'তে যে মহারাজের মর্যাদা নষ্ট হবে তাতো জানতুম না।

বীর।—যাক ও কথা ছেড়ে দাও। এখন রমাই ঘোষের যে ধ্বংস হয়েছে এইতেই ভগবানকে ধন্যবাদ দাও। আর ভাই এলে বল, যে সেনাপতি হওয়া তার কাজ নয়। যোগ্যপাত্রেরে তার সমর্পণ ক'রে, সে শুধু নিশ্চিত হয়ে, সুখ সন্তোষ করুক। নইলে যুদ্ধের যে কিছু জানে না, সে ব্যক্তি সেনাপতি হ'লে, রাজ্যরক্ষা হয় না। রাজ্যের ত আরও অনেক কাজ আছে। যেটা তার পছন্দ হয়, তাই করুক না। শুধু যুদ্ধ নিয়েই যে রাজ্য তাতো নয়, শুধু যে যুদ্ধই করতে হবে তারই বা মানে কি ? তাতে তার মর্যাদা বৃদ্ধি ভিন্ন হ্রাস হবে না।

পদ্মা।—সে যা আপনি ইচ্ছা করেন করবেন। আমার তাতে কোন আপত্তি নেই। তা যা হোক, এ মহৎকার্য্য কে করলে মহারাজ, রমাই ঘোষকে কে বিনাশ করলে ?

রঞ্জা। কে এক নয়ন সেন তাতে বিনাশ করেছেন।

বীর।—নয়ন সেন কে বড় নয়, তিনি অম্বিকানগরের রাজা। অবশ্য তাঁর সঙ্গে আমার বড় জানা শোনা নেই—তাতে আমাতে দেখা শোনার কখন অবকাশ হয়নি। তবে শুনেছি তিনি আমারই মতন, শুধু পুরুষত্ব বলে অম্বিকার প্রতিষ্ঠা করেছেন। তাঁর সুশাসনে অম্বিকা এখন সমৃদ্ধিশালী নগর।

রঞ্জা।—এমন লোকেরও সর্বনাশ হয় !

পদ্মা ।—সর্বনাশ কিসে বোন ?

রঞ্জা ।—বড়ই দুঃখের কথা দিদি ! রমাইয়ের সঙ্গে বৃদ্ধ
ক'রতে তাঁর চার সন্তান প্রাণত্যাগ করেছে ।

পদ্মা ।—চার সন্তান মারা গেছে ?

রঞ্জা ।—একটা ও নেই কেমন না মহারাজ !

বীর ।—শুনেছি রাজা নিকংশ ।

পদ্মা ।—বলেন কি মহারাজ ! পরোপকার কার্যে এমন
সাধু পুরুষেরও সর্বনাশ হ'ল !

রঞ্জা ।—রাজার কত বয়স হবে মহারাজ !

বীর ।—শুনেছি রাজা আমারই মতন বৃদ্ধ ।

পদ্মা ।—তা হ'লে দেখছি তাঁহাতেই অধিকার প্রতিষ্ঠা,
আবার তাঁর সঙ্গেই অধিকার শেষ ।

(কঞ্চুকীর প্রবেশ)

কঞ্চু ।—মহারাজ ! একজন সন্ন্যাসী শ্রীযুতের সঙ্গে সাক্ষাৎ
করতে এখানে এসেছেন ।

বীর ।—সন্ন্যাসী ? আমার সঙ্গে সাক্ষাৎ করতে ?

কঞ্চু ।—আজ্ঞা হাঁ মহারাজ !—এক বৃদ্ধ সন্ন্যাসী ।

পদ্মা ।—দেখে আসুন মহারাজ ! শ্রীমদনমোহনের কৃপায়
আমাদের ঘরে কোন্ মহাপুরুষের পদধূলি পড়ল ।

রঞ্জা ।—দেখুন মহারাজ তাঁর আশীর্বাদ লাভ করুন,
দিদির পেটে যেন একটা ছেলে হয় ।

বীর ।—সে কামনা আর নেই রঞ্জা ।—এখন তোমা হ'তে
যদি একটা পুত্র পাই, তাহলে আমরা সেটাকে রাজ্য দিয়ে
নিশ্চিত হই ।

পদ্মা।—আমার ও সে কামনা নেই ভগিনী ! সামান্য
মাত্র যা ছিল, তাও আজ নিবে গেল । মহারাজ, নয়ন সেনের
পরিণাম শুনে পুত্রলাভের আর আমার ইচ্ছা নেই ।

বীর ।—কোথায় তিনি রয়েছেন ?

কঞ্চু ।—বহির্কীর্টিতে আছেন । আমরা তাঁকে বসুতে
আসন দিয়েছি ।

বীর ।—সন্ন্যাসী ! তাঁর সর্বত্র অব্যাহত দ্বার । বহির্কীর্টিতে
কেন, তুমি তাঁকে এই স্থানেই নিয়ে এস । (কঞ্চুকের প্রস্থান)
প্রাণ আমার একটা অপূর্ক উল্লাসে পুলকিত হয়ে উঠছে কেন
পদ্মাবতী ! সন্ন্যাসী ! কে সন্ন্যাসী ? এ অধমের এখানে !
কেন ? আমি কি এমন ভাগ্য করেছি !

রঞ্জা ।—সে কি মহারাজ ! মদনমোহন ষাঁর ভক্তিতে
আবদ্ধ, তাঁর ঘরে সন্ন্যাসী সাধু আসবেন, এতে আর আশ্চর্য্য
কি মহারাজ !

(সন্ন্যাসীবেশে নয়ন সেন ও কঞ্চুকের প্রবেশ)

কঞ্চু ।—এই সম্মুখে মহারাজা, ঐ পার্শ্বে রাণী । আর যিনি
মালা হাতে অবস্থান করছেন, তিনি মহারাজের শ্যালিকা ভুবন-
প্রসিদ্ধা সুন্দরী রঞ্জাবতী ।

(কঞ্চুকের প্রস্থান)

নয়ন ।—মহারাজ আমার নমস্কার গ্রহণ করুন ।

বীর ।—কে আপনি ? এই না শুনলুম আপনি সন্ন্যাসী !

নয়ন ।—অন্তঃপুরের মর্যাদা নষ্ট হবে জানলে, আমি
আসতুম না । তবে আমি ও বৃদ্ধ । বৃদ্ধ জেনে মহারাজ !
আমাকে ক্ষমা করুন ।

বীর ।—এসেছেন, বেশ করেছেন—লজ্জিত হবার কোনও কারণ নেই। সম্মুখে এই যে যুবতী দেখছেন, ইনি অবিবাহিতা। আপনি যদি সন্ন্যাসী নন, তবে আপনি কে ?

নয়ন ।—আমি গৃহী ; অঙ্গে সন্ন্যাসীর আবরণ। আমার নাম নয়ন সেন ।

বীর ।—আপনি !

পদ্মা ।—আপনিই অধিকার অধিপতি !

রঞ্জা ।—আপনিই সেই মহাপুরুষ !

নয়ন ।—আমি অতিহীন, মহাপুরুষের সামান্য মাত্র লক্ষণ ও আঘাতে নেই। মহারাজ ! এদীন হতভাগ্য বৃদ্ধ আপনার কাছে কি নিবেদন করতে এসেছে শুনুন। আমি যৌবনে নিজ বাহুবলে একটি রাজ্য প্রতিষ্ঠা করি। অবশ্য মহারাজের রাজ্যের তুলনায় সেটা অতি তুচ্ছ। তথাপি সেটা আমার প্রাণ। মহারাজ বলতে আমার কণ্ঠরোধ হ'য়ে আস্ছে—আমি এই বৃদ্ধ বয়সে বিশ ক্রোশের ও অধিক পথ পর্য্যটন ক'রে আসছি। পথে মূর্ত্তের জন্ত ও বিশ্রাম করিনি।

বীর ।—রাণী ! ক্লান্ত মহাপুরুষের সত্বর সুশ্রম্বার ব্যবস্থা কর। আপনি উপবেশন করুন। (রাণী কর্তৃক আসন প্রদান)

নয়ন ।—না মহারাজ ! আমাকে বসতে অনুমতি ক'রবেন না। আমি সব কথা শেষ না করে বসছি না। তারপর শুনুন আমি কোন দৈবঘটনায় পুত্রহীন হয়েছি। চার পুত্রকেই জলাঞ্জলী দিয়েছি। একদিনে আমি নিরক্ষণ, আমার স্ত্রী, পুত্রশোকের প্রবল আঘাত সহ করতে না পেরে দেহত্যাগ করেছেন ! তাই আমি আজ মহারাজের আশ্রিত। আমার

সঙ্গে আমার অধিকার নাম না লোপ হয়, তাই আমি অধিকাকে আপনার পদাশ্রয়ে রাখতে এসেছি। আপনিই অধিকা রক্ষার উপযুক্ত পাত্র। মহারাজ! কি বলব! আপনি আপনার বিষ্ণুপুরকে যে চক্ষে দেখছেন, আমার দরিদ্রা নগরীকেও দয়াকরে সেই চক্ষে দেখবেন। এই নিন—অধিকার ধনাগারের চাবী গ্রহণ করুন। এ ছাড়া আমি একটি ক্ষুদ্র বালককে আশ্রয় দিয়েছি। সেটী লক্ষ্মণ সেনের পুত্র। আপনি সেটীকে আনিয়ে তার পিতৃত্বের ভার গ্রহণ করুন।

বীর।—অপেক্ষা করুন। আপনি হতাশ হচ্ছেন কেন? আর একবার সংসার করুন না! দেখুন মদনমোহনের মনে কি আছে?

নয়ন।—সংসার! কি বলেন মহারাজ! এই বৃদ্ধ বয়সে মৃত্যুর দ্বার সমীপে এসে, আমি আবার সংসার করব!

বীর।—ক্ষতি কি মহারাজ! ভগবানের আশার রাজ্যে এসে এত নিরাশ হবার প্রয়োজন কি? যিনি অজ্ঞাত নামা নয়ন সেনকে অধিকার অধীশ্বর ক'রেছেন, তাঁর মনে কি আছে কে ব'লতে পারে?

নয়ন।—এ আপনি কি ব'লছেন?

পদ্মা।—হতাশ হবারই বা প্রয়োজন কি? যদি অধিকার জীবন রক্ষাই আপনার একমাত্র উদ্দেশ্য হয়, তাহ'লে তাকে সহজে সেন বংশের আশ্রয় থেকে দূরীভূত ক'রতে যাচ্ছেন কেন?

নয়ন।—দোহাই জননী! আমাকে আর, ও অনুমতি ক'রবেন না। আমি পুত্রবিয়োগকাতর, পত্নীবিয়োগবিধুর—যথার্থ কথা ব'লতে কি মহারাজ, যাতনায় আমার অন্তর দগ্ধ হ'চ্ছে।

বীর।—আপনি বিজ্ঞ। শোকের কথা তুললে, আমার আর কোন কথা বলবার শক্তি নেই। তবে স্বদেশের গৌরব রক্ষার চেষ্টা আমার মতে মনুষ্যমাত্রেয়ই কর্তব্য, তা দাঁটেরপি কি ধনৈরপি—

নয়ন।—এ বয়সে কোন অভাগিনী সরলার সর্বনাশ করবে! গুরুজন কর্তৃক নিযুক্ত হ'য়ে নিজের অনিচ্ছায় সে যখন আমাকে বরণ করতে চক্ষুজলে ধরলী সিক্ত করবে, তখন কোথায় থাকবে আমার ধর্ম, কোথায় থাকবে আমার মনুষ্যত্ব!

রঞ্জা।—যদি কোন ভাগ্যবতী স্বেচ্ছায় আপনাকে বরণ করে মহারাজ!

পদ্মা।—রঞ্জাবতী! যদি ক্ষণস্থায়ী যৌবনের পরিবর্তে, অনন্ত দেবজীবন লাভের বাসনা থাকে, ত এই শুভ অবকাশ ত্যাগ করোনা।

নয়ন।—রক্ষা করুন, রক্ষা করুন। এ অপূর্ব লাবণ্যময়ী কাঞ্চন-লতা, শুষ্ক শমীরক্ষে জড়িত করবেন না।

রঞ্জা।—মহারাজ! আমি আপনার শরণার্থিনী।

(প্রণাম করণ)

নয়ন।—এঁয়া! একি! এ কি করলে মদনমোহন! এ আমি কোথায়! কোন দেবরাজ্যে উপস্থিত হ'য়েছি। কে তুমি— কি তুমি রঞ্জাবতী?

রঞ্জা।—তুচ্ছ বালিকা। বীরের পূজা করতে দেবতা কর্তৃক আদিষ্ট—(রাজার গলদেশে মালা প্রদান)

পদ্মা।—একি মহারাজ! এমন শুভরূপে আপনি নীরব, কেন? রঞ্জাবতীকে আশীর্বাদ করুন।

বীর ।—আশীর্বাদ করি, তুমি অরুন্ধতীর গায় স্বামী-
সৌভাগ্য লাভ কর, ভগবতীর গায় দেব-সেনাপতির জননী
হও । তোমার পুত্রের যশঃ সৌরভে অধিকার, আর অধিকার
অস্তিত্বে বঙ্গভূমি পবিত্র হোক ।

(কঞ্চুকীর প্রবেশ)

কঞ্চু ।—মহারাজ ! গোড়েশ্বরের মহাপাত্র শ্রীযুতের সঙ্গে
সাক্ষাৎ ক'রতে এসেছেন ।

বীর ।—তাঁকে অপেক্ষা ক'রতে বল, আমি যাচ্ছি ।

নয়ন ।—তবে আপনি মহাপাত্রের সঙ্গে কথা ক'ন, অনুমতি
করুন আমি অন্তত যাই ?

বীর ।—কেন যাবে ! কি এমন গোপন কথা কইব যে,
তোমাকে স্থান ত্যাগ করতে হবে ! মহাপাত্র কি বলে একটু
আড়ালে দাঁড়িয়ে শুনবে এস । মহাপাত্র বস্তুটা কি একবার
দেখবে এস ।

(সকলের প্রস্থান)

সপ্তম—দৃশ্য ।

—*—

বিষ্ণুপুর রাজবাটী—অলিন্দ ।

(মহাপাত্র, বীরমল্ল, কঞ্চুকী)

মহা ।—মহারাজ ! প্রণাম । আপনার চেহারাটা বড়
দুর্বল বোধ হচ্ছে ।

বীর ।—হওয়ার আর অপরাধ কি ! বয়স যাচ্ছে বইত
হচ্ছে না ।

মহা।—তাতো বটেই তাতো বটেই । তা আপনার দল-মাদলের অমন দুর্দশা হ'ল কেন ? গা ময় মরচে ধ'রে গেছে !

বীর।—ব্যবহার না হ'লেই মরচে ধরে । দল-মাদল ব্যবহার করবার লোক নেই ।

মহা।—যা বলছেন মহারাজ, লোক নেই । এ বাঙ্গলায় যা যাচ্ছে তা আর হচ্ছে না । আমরা ম'লে এরপর কি হবে মহারাজ ?

বীর।—বিছুটী গাছ হবে ।

মহা।—ঠিক বলেছেন, ঠিক বলেছেন, বাঙ্গালার অবস্থা এই রকমই হয়ে আসছে বটে । এমন আম কাঁটালের দেশ, কালে দেখছি বিছুটীতেই ভ'রে যাবে । এতটুকু ফল,—তার ভেতরে আবার পিপড়ের ডিমের মতন শাঁস—তুলতে মেহনত পোষায় না—উলটে এতখানি জালা । আপনার সৈন্ত যে দেখতে পাচ্ছি না—তারা গেল কোথায় ?

বীর।—তারা ঘাস খেতে বেরিয়ে গেছে ।

মহা।—ঘাস খেতে ! কেন বিষ্ণুপুরের রাজার ঘরে কি অন্ন নেই ।

বীর।—কাজেই, যুদ্ধ ক'রতে না জানলে, শুধু শুধু অন্ন যোগায় কে ! বাঙ্গালী যোদ্ধার ঘাসই হচ্ছে রসদ ।

মহা।—আপনার সৈন্ত যুদ্ধ ক'রতে জানে না, এও কি একটা কথা হ'ল ।

বীর।—আমার সৈন্ত কি ! সবার সৈন্তেরই ঐ এক অবস্থা । বলি গোড়েশ্বরের সেপাই গুলোই বা কি ?

মহা।—সেকি ! গোড়েশ্বরের সেপাই এক একটা বৃকোদর ।

বীর ।—সে কেবল ঘাস খাবার বেলা—কাজের বেলাত নয় ।

মহা ।—বলেন কি, কাজে নয় ! কাজে কি, তারা এখানে এলেই জানতে পারবেন । এসেই আপনার দল-মাদলে—মেজে ঘসে—বারুদ ঠেসে—গমাগম্ আওয়াজ করে দেবে ।

বীর ।—বাঙ্গালীর গলার আওয়াজ তার চেয়েও বেশি । তাতে বেঙাচির ও ল্যাজ খসেনা । কই তোমার প্রভুর যদি এতই সৈন্তবল, ত রমাই ঘোষের কিছু করতে পারলেনা কেন ?

মহা ।— (হাস্ত) তা বলতে পারেন বটে ! কিন্তু হয়েছে কি জানেন, রমাই রাজার ঘরে খেয়ে মানুষ । তার সঙ্গে লড়াই করতে যাওয়ায় গোড়েশ্বরের একটু লজ্জার কথা । তবে যদি রমাই একান্তই বাগে না আসে, তাহলে কাজেই তাঁকে রমাই দমনে যেতে হবে ।

বীর ।—আর তাঁকে কষ্ট করে যেতে হবে না, সে কাজ হয়ে গেছে ।

মহা ।—হয়ে গেছে ! বলেন কি, রমাইয়ের দমন হয়ে গেছে !

বীর ।—হয়েছে বইকি, তোমার সঙ্গে কি আর তামাসা করছি ।

মহা ।—তামাসা করবেন কি ! তাহলে রমাই জ্বল হয়ে গেছে । বেঁচে আছে না মরেছে !

বীর ।—মরেছে ?

মহা ।—বেশ হয়েছে । জানি বেটা মর্বে—অত বাড় বিদাতা সইবে কেন ? যাক নিশ্চিত । যুবরাজ ও রমাইকে মারতে চ'লে ছিলেন । রমায়ের অত্যাচারের কথা শুনে রেগে কাঁই । এই মারতে যান ত এই মারতে যান । আমরা কেবল

হাত ধরে টেনে রেখেছিলুম। যাক শ্রীধুং গোড়েশ্বরের পুত্র আগমন ক'রছেন, আপনি তাঁকে আগ বাড়িয়ে আনবার ব্যবস্থা করুন। আপনার খুব অদৃষ্টের জোর, স্বয়ং সম্রাটের সঙ্গে কুটুস্থিতা করছেন।

বীর।—আমার কি আর সে অদৃষ্ট যে, গোড়েশ্বরের সঙ্গে কুটুস্থিতা ক'রব! তাতে বাধা পড়েছে।

মহা।—বাধা পড়েছে!

বীর।—যুবরাজের সঙ্গে আমি কি বলে কথা কইব তাই ভাবছি। তবে তিনি সম্রাট পুত্র, আমরা তাঁর আশ্রিত এই ভেবে যদি দয়া করে তিনি রঞ্জাবতীর বিবাহে যোগদান করেন।

মহা।—এ আপনি কি বলছেন মহারাজ! রঞ্জাবতীর বিবাহ কি! কার সঙ্গে?

বীর।—যিনি রমাইকে বধ করেছেন, তাঁর সঙ্গে। তিনি অশ্বিকার অধিপতি নয়ন সেন।

মহা।—তবে কি আমার প্রভুকে অপমানিত করতে তাকে নিমন্ত্রণ করে আনছেন!

বীর।—আমার শালীর সঙ্গে তাঁর বিবাহ দেবো বলেই তাঁকে আমি নিমন্ত্রণ করেছিলুম। অপমানের জন্তে নয়, কিন্তু দৈব ঘটনায় এরূপ কার্য হয়ে গেছে। নয়ন সেন বিষ্ণুপুরে এসেছিলেন, রঞ্জাবতী তাঁর গলায় মালা দিয়েছে। এমন অবস্থায় দিয়েছে যে, আমি বাধা দেবারও অবকাশ পাইনি।

মহা।—তারপর?

বীর।—তারপর কি ক'রব বল।

মহা।—যুবরাজ যে আসছেন, তার কি।

বীর।—আসেন বহুমানের তাঁকে আমি বিষ্ণুপুরে নিয়ে আসি। আমার গৃহ পবিত্র হবে।

মহা।—ওসব কথা শুনতে চাই না মহারাজ, বিবাহের কি ?

বীর।—গৌড়ের রাজা তাঁর কাছে কি তুচ্ছ বিষ্ণুপুরের রাজার শালী। তাঁর বিবাহের ভাবনা কি ?

মহা।—কাজটা কি ভাল করছেন মহারাজ !

বীর।—ভাল নয়ত বুঝতে পারছি। কিন্তু কি করব ভাই, উপায় নেই। কণ্ঠা স্বয়ম্বর !

মহা।—গৌড়েশ্বরের সঙ্গে শক্রতা করে, আপনি কি রক্ষা পাবেন বুঝেছেন।

বীর।—তা কেমন করে পাব। তিনি রাজকুবতী আর আমি হচ্ছি ক্ষুদ্র ব্যক্তি ; মদনমোহনের দাস।

মহা।—এ জেনেও ত আপনি তাঁকে প্রত্যাখ্যান করছেন।

বীর।—প্রত্যাখ্যান করছেন বিধাতা—আমার কি সাধ্য।

মহা।—আপনি তাঁকে বিবাহ দেবার জন্ত নিমন্ত্রণ করে আনিয়েছেন। মহারাজ বিষ্ণুপুরের মঙ্গলের দিকে চেয়ে বলছি আপনার শালিকাকে দান করুন।

বীর।—শালী নিজে নিজে কেই দান করে ফেলেছে ; সে কারও অপেক্ষা রাখেনি।

মহা।—তাহলে আমার প্রভু শুধু অপমানিত হয়েই ফিরে যাবেন, বিবাহ হবে না ?

বীর।—পাত্রী মেলে বিবাহ হবে—না মেলে হবে না।

মহা।—ওসব কথা আমি শুনতে চাইনি—আমি পাত্রী চাই।

বীর ।—পাত্রী ত বড় একটা দেখতে পাই না । তবে
ঘয়োবার্ককে আমার পাত্র হইবে । যদি তোমাদের যুবরায়
আমায় বে করতে চান ; তাহলে আমি না হয় গাঁটচূড়ো বেঁধে
দাঁড়িয়ে থাকি ।

মহা ।—তাহ'লে আমার প্রভুকে এই কথাই বলিগে ।

বীর ।—কাজেই বলবার আর কোন কথাও পাচ্ছি না ।

মহা ।—যে আছে ।

(প্রস্থান)

(নয়ন সেনের প্রবেশ)

নয়ন ।—তার পর ? মহারাজ কি স্থির করলেন ?

বীর ।—কিছুই করিনি, নিশ্চিত ।

নয়ন ।—আপনার সৈন্য ?

বীর ।—সে তোমার আমার সম্বন্ধী কোন দেশে নিয়ে
গেছে ।

নয়ন ।—আপনার গড়ের বাইরে ছোটো কামান আছে ত ?

বীর ।—আছে কিন্তু ছোঁড়ে কে ? যারা ছুঁড়তো তারা
মরে গেছে । আমি ত বৃদ্ধ ।

নয়ন ।—তবে ত এ বৃদ্ধ বয়সে আপনার সর্বনাশ করলুম
মহারাজ !

বীর ।—হয়ত করব কি ? পঞ্চাশ বৎসর পূর্বে রাখালী
করেছিলুম । রাখালী ত আমার কেউ ঘোচাবে না । নাও
চল । এই অবকাশে যদি রঞ্জাবতীকে নিয়ে দেশে যেতে পারি,
তাহ'লেই মঙ্গল । নতুবা ওরা যে তোমাকে নিয়ে যেতে দেবে
এরূপত বোধ হয় না ।

নয়ন ।—আমি আপনার চক্ষে অজ্ঞাত কুলশীল, আমার সাহসে আপনার সন্দেহ হতে পারে, কিন্তু যে তেজোময়ী বীরাসনা বৈধব্য শিয়রে বেঁধে, আমাকে পতিত্বে বরণ করেছে, সে আমার সঙ্গে পালাবে কেন ?

বীর ।—বেশ, তবে যতক্ষণ বেঁচে থাকা যায়, ততক্ষণ মদন-মোহনের ঘরে আনন্দ করা যাক্গে চল ।

(সকলের প্রশ্নান)

অষ্টম দৃশ্য ।

—*—

বিষ্ণুপুর—রাজপথ ।

(সৃষ্টিধর, মণিরাম)

সৃষ্টি ।—লোকে বলে ধর্মের জয় । কই তার ত কিছুই দেখতে পেলুম না । রমাই ম'ল বটে, কিন্তু নয়ন সেনও নিরক্ষণ হ'ল । তবে জিত্বে হ'ল কার ? মাঝখান থেকে মণিরাম রায় ত ডকা রাজাতে রাজাতে আসছে । ম'লে স্বর্গ সে চোরে বাটপাড়েও পায় । আর পায় না পায় তাতে সৃষ্টিধরের কি ব্যয়ে যায় । চোখের উপর ধর্মের জয় দেখতে পাই, তবে না মজা ।

মণি ।—বাঁড়ের শত্রু বাঘে মেরেছে । রমাই ও ম'ল মান্দারগও ধ্বংস হ'ল । মাঝখান থেকে নয়ন সেন নিরক্ষণ । আমি যুদ্ধ না করেও জয় পতাকা ঘাড়ে করে আসছি । এর চেয়ে মানুষের সুখের অবস্থা আর হ'তেই পারে না । একি ! আমার আসবার আগেই যে, সহরে ধুম লেগে গেছে । তাহ'লে

ত দেখছি আমার আসবার আগে বিষ্ণুপুরে খবর এসেছে
বা বা ! এই যে সৃষ্টি ! হাঁরে সৃষ্টি !

সৃষ্টি ।—কি হুজুর !

মণি ।—সহরে এত আনন্দ লেগে গেছে কেনরে !

সৃষ্টি ।—বলেন কি হুজুর ! আমোদ লাগবে না । আপনি
এত বড় একটা যুদ্ধ জয় করে এলেন, তাতে আমোদ লাগবে না !

মণি ।—তাহ'লে আমার জয় সংবাদ বিষ্ণুপুরে এসে
পৌঁছেছে !

সৃষ্টি ।—ঝড়ের আগে এ খবর চলে এসেছে ।

মণি ।—ভাল তুই একবার জেনেই আয় দেখি । খবরটা
ঠিক কিনা ?

সৃষ্টি ।—ও ঠিকই জেনে এসেছি । না জেনে কি আর
হুজুরকে বলছি ।

মণি ।—লোকে কি বলছে ?

সৃষ্টি ।—বলছে, হুজুরের মতন বীর আর পৃথিবীতে নেই ।
বলে আপনি হাতে মাথা কেটেছেন । রমাই ঘোষকে দেখে
যেমনি আপনি চড় উঁচিয়েছেন, অমনি ঘোষজার মাথা কেটে—
মাটীতে গড়াগড়ি ।

মণি ।—হাতে মাথা কাটলুম, এ খবর এল কিরে ! লড়া-
ইয়ের খবর এলো না !

সৃষ্টি ।—আজ্ঞে তা কেমন ক'রে আসবে ? রমাই ঘোষের
মাথাই যখন রইল না, তখন লড়াইয়ের খবর কে দেবে ?

মণি ।—যা যা বেটা, সহর শুদ্ধ লোক আমোদ ক'রছে কেন,
খবর নিয়ে আয় ।

সৃষ্টি।—আপনি যখন বলছেন, তখন যাই, কিন্তু খবর একেবারে চূড়ান্ত হয়ে গেছে।

মণি।—বলি নয়ন সেন কি বেঁচে আছে, তোর বিশ্বাস হয় ?

সৃষ্টি।—বাপ্! চার চারটে বেটার শোক, তার ওপর স্ত্রী, কেমন করে বাঁচবে?

মণি।—আর যদি বেঁচে থাকে, তাহলে সে কি বিষ্ণুপুরে এসে খবর দিতে পারবে!

সৃষ্টি।—রাম রাম! সত্তর আশী বছরের বুড়া, লাঠী ধরে চলে, সে এতপথ কেমন করে আসবে!

মণি।—আর এখানকার লোক ও কিছু অধিকায় নেতে যাচ্ছে না যে, যুদ্ধের আসল খবরটা জেনে আসবে।

সৃষ্টি।—সাধ্য কি, আপনি নিশ্চিত থাকুন।

মণি।—খবরদার তুই যেন বলিস্ নি!

সৃষ্টি।—আমি ? বাপ! প্রাণ গেলেও না!

মণি।—তাকে আমি যথেষ্ট বক্‌সিস্ করবো।

সৃষ্টি।—সে হুজুরের দয়া!

মণি।—আচ্ছা তুই একবার ঠিক খবরটা নিয়ে আয়। তাহলেই আমি সমারোহের সঙ্গে নগরে প্রবেশ করি।

সৃষ্টি।—যে আছে, আমি এখন যাচ্ছি।

(সৃষ্টিধরের প্রস্থান)

মণি।—কোথায় অধিকা, আর কোথায় বিষ্ণুপুর! নয়ন সেন যে রমাই ঘোষকে পরাস্ত ক'রেছে, এ খবর বিষ্ণুপুরে কেমন ক'রে আসবে? তাহলে আমি নিশ্চিত হয়ে বলতে পারি, যে আমিই রমাই ঘোষকে বধ করেছি। নয়ন সেনকে

কোন রকমে বধ ক'রতে পারতুম, তাহ'লে আমার আর চিন্তা
করবার কিছু থাকতো না। তাহ'লে আমি রমাই বিজয়ী নাম
নিয়ে মহাদর্পে বিষ্ণুপুরে প্রবেশ ক'রতুম। আমার সেপাই
গুলো বসে বসে খেয়ে যে একেবারে অকর্মণ্য হয়ে গেছে।
নয়ন সেনের প্রাণ বিনাশ ক'রতে কেউ যে সাহস ক'রলে না,
বলে অশ্বিকার দুর্কর্ষ ডোম সৈন্ত, বিশেষতঃ রমাই ঘোষের দমন
করে তারা আবার আরও বলদৃপ্ত হয়ে পড়েছে। কোন
সৈন্তই অশ্বিকা মুখো হতে সাহস ক'রলে না। যাক, আমার
ভাববার যে এখন আর বিশেষ প্রয়োজন তা বড় দেখিনা।

(নাগরিকদ্বয়সহ সৃষ্টিধরের প্রবেশ)

স্ব।—এই—এই ইনিই এখন আমাদের হর্তাকর্তা বিধাতা।
মদনমোহন তা বারমাসই আছেন। তাঁকে যখন ইচ্ছে দর্শন
ক'রতে পারবে। কিন্তু এংকেত ইচ্ছে করলেই দেখতে পাবে
না। এই বেলা দর্শন ক'রে নাও। মদনমোহন দর্শনের চেয়ে
যে ফল কিছু কম হবে, সেটা মনে করো না।

১ম না।—তাতো বটেই—তাতো বটেই। উনি যখন
প্রাণরক্ষা কর্তা, তখন দেবতার সঙ্গে গুর প্রভেদ কি ?

স্ব।—এই যা ব'লেছ। প্রাণ না বাঁচলেত আর ধর্ম হ'ত
না। আর রমাই ঘোষ না ম'লেত কারও প্রাণ বাঁচতো না।

১ম না।—সে কথা আর বলতে—উনিই আমাদের সব—
উনিই আমাদের মদনমোহন।

স্ব।—এই হজুর ! এরা আপনাকে দর্শন ক'রতে এসেছেন !

মণি।—কে তোমরা ?

১ম না।—আজ্ঞে হজুর, আমাদের বাড়ী জালন্ধর। আমরা

মহারাজের গুণগ্রাম শুনে, সেই দূরে দেশ থেকে আপনাকে দর্শন করতে এসেছি ।

২য় না। রমাই ঘোষের অত্যাচারে আমাদের ঘরে বাস করা দায় হয়েছিল মহারাজ ! স্ত্রী পুত্র নিয়ে আমরা এতকাল পালিয়ে পালিয়ে বেড়িয়েছি ।

১ম না।—আপনি এতকাল পরে আমাদের গৃহবাসী ক'রেছেন ।

মণি।—আমি কে, আমি তুচ্ছ ব্যক্তি ! মদনমোহন ক'রেছেন ।

১ম না।—আজ্ঞা হাঁ মদনমোহনই সব করেন বটে তবে তিনিত আর হাতে কলমে কিছু করেন না, ছজুরই উপলক্ষ ।

উভয়ে।—আপনিই আমাদের চক্ষে মদনমোহন ।

স্ব।—নিশ্চয় - নিশ্চয়—

মণি।—দেখ সৃষ্টিধর ! এঁরা যখন অনেক দূর থেকে এসেছেন, তখন বিষ্ণুপুরে এসে যাতে এদের খাওয়া দাওয়ার কোন কষ্ট না হয়, তা তুমি নিজে দেখবে ।

স্ব।—যে আজ্ঞে, যে আজ্ঞে ছজুর ।

২য় না।—আহা এমন প্রাণ না হ'লে রাজা ! আপনিই মদনমোহন ।

১ম না।—আর রঞ্জাবতীই রাধারাণী ।

মণি।—কি কি বল্লি ?

স্ব। চুপ্ চুপ্ ব'লতে নেই ।

১ম না।—মহারাজ আপনি না ব'লতে চাইলে, আমরা ব'লতে ছাড়বো কেন ? আপনি আমাদের ধন, প্রাণ, ধর্ম সব রক্ষা করেছেন । আপনিই আমাদের মদনমোহন ।

২য় না।—আর রঞ্জাবতীই আমাদের রাধারাণী ।

মণি।—(স্বগত) আরে ম'ল এ বেটারা বলে কি ? তবে
কি এরা আমাকে অপর লোক ঠাউরেছে । (প্রকাশে)
ভাল তোমরা আমাকে কি মনে ক'রেছ বল দেখি ?

স্ব।—দেবতা দেবতা—মদনমোহন ।

উভয়ে।—মদনমোহন । মদনমোহন ।

১ম না।—পুত্রশোকে আপনি কাতর হবেন না ।

মণি।—আরে মর বেটা ! পুত্রশোকে কাতর হব কি !

১ম না।—তারা সব স্বর্গে গেছেন । রঞ্জাবতী দেবী বেঁচে
থাকুন, আবার আপনার সন্তান হবে ।

উভয়ে।—নিশ্চয় হবে নিশ্চয় হবে ।

১ম না।—বয়েস কি—বয়েস কি ।

মণি।—তবেরে পাজী বেটারা ! সৃষ্টে ! বেটা তবে এখনি
আমি তোর মুণ্ডপাত ক'র্বো ।

স্ব।—বলতে নেই বলতে নেই । হজুর যে রঞ্জাবতী
দেবীর ভাই ।

উভয়ে।—এঁা ।

১ম না।—আপনি তবে মহারাজ নয়ন সেন ন'ন ?

মণি।—পাজি বেটারা লোক চেন না ।

উভয়ে।—চিন্তে পারিনি হজুর ।

মণি।—নয়ন সেন কে ?

১ম না।—আজ্ঞে মহারাজ ! আমরা ত তাঁরই নাম শুনে
আসছি—দেশময় রাষ্ট্র তিনি রমাইকে বধ করেছেন । বিষ্ণু-
পুরের রাজার শালী রঞ্জাবতীর সঙ্গে তাঁর বে হচ্ছে । দেশ

বিদেশ থেকে তাঁকে দেখতে আসছে। আমরাও তাই এসেছি
মহারাজ !

[মণিরাম কর্তৃক প্রহারের উদ্‌যোগ সকলে চীৎকার করিতে
করিতে পলায়ন]

মণি।—ওরে সৃষ্টে ! কি হ'লরে !

সৃ।—আজ্ঞে হুজুর ! তাইতো !

মণি।—নয়ন সেন কিরে ! রঞ্জাবতী কিরে—বিয়ে কিরে !

(প্রস্থান)

সৃ।—তাইতো ! ধর্মত বেজায় রকমেরই আছে বটে।

কোথায় নয়ন সেন—কোথায় রঞ্জা—কোথায় বিয়ে—বা—ধর্ম—
বা—ধর্ম—

(প্রস্থান)



দ্বিতীয় অঙ্ক ।

প্রথম দৃশ্য ।

বিষ্ণুপুর—রাজাস্তম্ভপুর ।

(পদ্মাবতী ও বীরমল্ল)

পদ্মা ।—কি মহারাজ ! ওদিকে উৎসবের আয়োজন
করিয়ে দিয়ে, আপনি এ নির্জনে কেন ?

বীর ।—আমার আর এক বড় কুটুম্ব আস্ছেন শুন্লুম,
তাই তার অভ্যর্থনার আয়োজন করছিলুম ।

পদ্মা ।—আবার বড় কুটুম্ব কে ?

বীর ।—গৌড়েশ্বরের পুত্র ।

পদ্মা ।—তিনি এই বিবাহের সংবাদ শুনেছেন ?

বীর ।—শুনেছেন—শুনে পরম আনন্দিত হয়ে আমার
কাছে তাঁর মহাপাত্রকে প্রেরণ করেছিলেন ।

পদ্মা ।—মহাপাত্রকে পাঠিয়েছিলেন কেন ?

বীর ।—মহাপাত্রকে দিয়ে বলে পাঠিয়েছেন যে, এ বিবাহে
পরম প্রীতি লাভ ক'রেছি । আর সেই প্রীতির নিদর্শন স্বরূপ
কোলাকুলি ক'রে নাচবার জন্ত তিনি সসৈন্তে বিষ্ণুপুরে আগমন
ক'রছেন ।

পদ্মা ।—আসছেন বিবাহ উৎসবে আমোদ ক'রতে, তাতে সসৈন্তে কেন ?

বীর ।—তিনি বলেছেন, নারকেল বদলাবদলী হ'ল আমার সঙ্গে, মাঝখান থেকে রঞ্জাবতীকে আর একজন ছোঁ মারলে ; সুতরাং এ আনন্দ একা ভোগ ক'রেতো সুখ হবে না ! কাজেই দুচার জন সৈন্ত সামন্ত সঙ্গে নিয়ে বিষ্ণুপুরে এসে, সসৈন্তে আমার সঙ্গে জড়াজড়ি না ক'রে, মদনমোহনের নাটমন্দিরে ওলট পালট খাবেন, এইটী তাঁর বড়ই ইচ্ছে ।

পদ্মা ।—ওমা ! তামাসা ! তাহ'লে কি হবে !

বীর ।—কি আর হবে, আমিও তাঁর আগমন সংবাদে প্রীতি লাভ ক'রে, তাঁকে অভ্যর্থনা ক'রে আন্বার জন্ত উদ্যোগ আয়োজন করছি ।

পদ্মা ।—মহারাজ রহস্য ক'রবেন না, আমি কিছুই বুঝতে পারছি না—গৌড়েশ্বরের পুত্র কি বিষ্ণুপুর আক্রমণ ক'রতে আসছেন ?

বীর ।—তবে কি তুমি ঠাওরেছ, তিনি মাথায় পকড় বেঁধে মদনমোহনের নাটমন্দিরে যথার্থই নৃত্য ক'রতে আসছেন ! তাঁর সঙ্গে হ'ল রঞ্জাবতীর বিবাহের সম্বন্ধ, দিন স্থির ক'রতে এল মহাপাত্র, এসে শুন্লে রঞ্জাবতীর বিয়ে । শুনেই আনন্দ তাঁর উথলে উঠল ! বলে, অপরকেই যদি রঞ্জাবতীকে দেওয়া আপনার মত ছিল, তখন মিছামিছি আমার প্রভুর অপমান করা হ'ল কেন ?

পদ্মা ।—তাতো ব'লতেই পারে । কাজত ভাল হয়নি । অন্ততঃ ক্ষমা প্রার্থনা ক'রে তাঁর কাছে সংবাদ পাঠান ত উচিত ছিল ।

বীর ।—সংবাদ কোথায় পাঠাব ! রাজপুত্র ত আর গোড়ে ছিলেন না ।

পদ্মা ।—আপনি একটু মিষ্ট কথা ব'লে, ক্রটি স্বীকার ক'রে, মহাপাত্রকে সন্তুষ্ট করলেন না কেন ?

বীর ।—কাকে সন্তুষ্ট করব ! সে বেটা মহাপাত্র পয়লা-নম্বরের পাথরে চূণ, সে কি মিষ্ট কথায় বশ হয় । যতই তাকে ঠাণ্ডা করবার চেষ্টায় জল ঢালি, ততই সে টগবগ ক'রে ফুটতে থাকে । বলে—বাজে কথা আমি শুনতে আসিনি, আমি পাত্রী চাই । আমি অনেক বোঝালুম—বললুম—এ বিবাহে আমাদের হাত নেই, পাত্রী স্বয়ম্বর । সে বলে তা শুনতে চাইনি—আপনি নারকোল বদল ক'রেছেন, তাইতে যুবরাজ বিবাহ করতে বিষ্ণুপুরে আসছেন—আমি পাত্রী চাই । যখন দেখলুম একান্ত তার পাত্রী না হ'লে চলবে না, তখন নিজেই পাত্রী হ'লুম—বললুম—গোড়েশ্বরকে আসতে বল, যখন অণু পাত্রীর অভাব, তখন আমিই তাঁকে প্রেম দান ক'রব । তাই প্রাণেশ্বর এই নববধূটিকে হৃদয়ে ধারণ ক'রতে একটু স্থবিত গমনে বিষ্ণুপুর আগমন ক'রছেন ।

পদ্মা ।—তাহ'লে এ সঙ্কট সময়ে আপনি উৎসবের আদেশ দিলেন কেন ?

বীর ।—এই ত উৎসবের সময়, আমার প্রাণবঁধু আগমন করছেন' এ সময় আমি মুখ গুঁজড়ে ব'সে থাকবো । তুমিও এ উৎসবে যোগ দাও । একি কম আনন্দের কথা ! মদন-মোহনের বিষ্ণুপুর—মদনমোহনের পাদপদ্মে বিলীন হবে ।

(প্রস্থান)

পদ্মা ।—কোথা থেকে একি বিপদে ফেললে মদনমোহন !
এ হ'তে যে রমাই ঘোষের বিপদ ছিল ভাল । এখন মনের
এ অবস্থা নিয়ে কেমন করে' উৎসবে যোগদান করি । এদিকে
বৃদ্ধের সঙ্গে রঞ্জাবতীর বিবাহ দিচ্ছি দেখে, সমস্ত বিষ্ণুপুরবাসীই
ক্ষুব্ধ হয়েছে । ভাই এখনও এ সংবাদ জানে না । জানলে
সেও কি সুখী হবে ! কেমন করে হবে ? সেত এ বিবাহের
কোন তত্ত্বই জানে না—সে জানে গোড়েশ্বরের পুত্রের সঙ্গে
তার ভগিনীর বিবাহ । শুনে সন্তুষ্ট মনে সৈন্ত নিয়ে রমাইকে
দমন ক'রতে গিয়েছে । অদৃষ্টে কি আছে কে বলতে পারে !
সত্যপথ আশ্রয় ক'রেও কি ধার্মিক মহারাজকে বিপদে পড়তে
হবে ? তা যদি হয়, তাহ'লে এ সংসারে জয় পরাজয়ে প্রভেদ
কি ? মানব জীবনের মূল্য কি ? তা যদি হয়, তবে নিঃশঙ্কে
“বিষ্ণুপুর” মদনমোহনের চরণ রেগুতে মিলিয়ে যাক্ না কেন ?

(মণিরামের প্রবেশ)

মণি ।—দিদি ! দিদি !

পদ্মা ।—কেও মণিরাম ! ভাই আমার এসেছ ।

মণি ।—এসেছি কিনা এখনও ঠিক বলতে পাচ্ছি না—যা
শুনছি—তা যদি সত্যি হয়, তাহ'লে তুমি মনে মনে জেনে
রেখো আমি আসিনি,—আসবো না—আসতে পারবো না !
কিন্তু যদি মিথ্যে হয়, তাহ'লে আমি অবশ্য এসেছি ।

পদ্মা ।—কি শুনেছ ?

মণি ।—রঞ্জাবতীকে নাকি একটা ঘাটের মড়ার সঙ্গে বে
দিচ্ছ !

পদ্মা ।—ছি ! ওকথা বলতে নেই । কিছু বয়স হয়েছে বটে ।

মণি।—কিছু হয়েছে ! ও হরি কিছু হয়েছে ! তার ছেলে, যেটা রমাই ঘোষের সঙ্গে লড়ায়ে মরেছে, তার স্ত্রুখের দাঁতের পাটীকে পাটী পড়ে গিয়েছিল । মাথার চুল এক গাছাও কাঁচা ছিল না । তার বাপ বুড়ো শিব, এত দিনে পাঁচ সাতশো গাজন পার্ ক'রলে, তার বয়স হ'ল কি না কিছু ! আর তার সঙ্গে তুমি কি না অমন সোণার প্রতিমার বে দিচ্ছ ! আরে ছি ! বৃদ্ধ বয়সে মহারাজেরও কি ভীমরতি হয়ে গেল !

পদ্মা।—মহারাজেরও অপরাধ নেই—আমারও অপরাধ নেই ।

মণি।—না কারো অপরাধ নেই । আমি গিছলুম লড়াই ক'রতে, সকল অপরাধ হ'ল আমার ।

পদ্মা।—অপরাধ কারো নয়—প্রজাপতির নির্বন্ধ ।

মণি।—ও সব বুদ্ধকি কথা আমি শুন্তে চাইনি । আজ প্রজাপতির নির্বন্ধ, কাল ফড়িঙ্গের নির্বন্ধ—পরশু গুটীপোকা—ওসব বাজে কথা রেখে দাও । দিয়ে বুড়োশালাকে এই বেলা মানে মানে বিদেয় ক'রে দাও ! আর স্বয়ং গোড়েশ্বরের যুবরাজ আসছেন, রজাকে তাঁর হাতে সমর্পণ কর ।

পদ্মা।—তা কেমন ক'রে হয় ভাই, রজা তাঁর গলায় মালা দিয়েছে ।

মণি।—তা না দিয়ে আর ক'র্বে কি ? তোমরা তাকে পীড়াপীড়ি ক'রেছ, তার উপর সে বুড়ো ঝাঙ্ক—রজার স্ত্রুখে দাঁড়িয়ে কান্নাকাটা ক'রেছে । কি করে !—সরলা—অবলা—হাতেমালা—কাছেগলা—পরিয়ে দিয়েছে ।

পদ্মা।—তা যে কারণেই হোক—যখন দিয়েছে, তখন তো ফিরানো যেতে পারে না ।

মণি।—কেন পারবে না। মালা—ফুলের মালা—এক দণ্ডে শুকিয়ে যায়, কলার বাসনার গাঁথুনি, ক'ড়ে আঙ্গুলের টানের ভর সয়না—ছুঁতে না ছুঁতে ছিঁড়ে যায়, তার আবার বাধন কি ?

পদ্মা।—তোমার এমনি বুদ্ধিই বটে !

মণি।—তা হ'লে তোমরা বুড়োকে তাড়াচ্ছে না ?

পদ্মা।—ছি ! ও কথা মুখেও আনতে নেই ।

মণি।—তা হ'লে তোমরা আমার কথা রাখছ না ?

পদ্মা।—তোমার কি আর কথার যোগ্য কথা। তা রাখবো ?

মণি।—দেখ দিদি ! বুঝতে পারছো না—মহা গণ্ডগোল হবে। আমি কিছুতেই এ বিষয়ে হ'তে দেব না।

পদ্মা।—তোমার ক্ষমতা কি ?

মণি।—কি ! আমার ক্ষমতা নেই !

পদ্মা।—কিছু না।

মণি।—তা হ'লে দেখ, আমি কি করতে পারি।

পদ্মা।—তাহ'লে আমিও বুঝবো যে তোমাতে মনুষ্যত্ব এসেছে।

মণি।—তাহ'লে দেখবো, তোমাদের বুড়া শালাকে কে রক্ষা করে।

পদ্মা।—জান মনিরাম ! কার স্মুখে তুমি এই উদ্ধত প্রকাশ করছ।

মণি।—তুমিও জান দিদি ! আমি বাগ্‌দী ভগ্নীপোতকে ভয় করিনা। ইচ্ছা করলে, আজই আমি বিষ্ণুপুরে ঘুঘু চরাতে পারি

পদ্মা ।—কে আছ—শীগ্গীর বেইমানকে গ্রেপ্তার কর ।

মণি ।—এই এখনি দেখিয়ে দিচ্ছি, কে কাকে গ্রেপ্তার করে ।

(প্রস্থান)

বীর ।— (বীরমল্লের প্রবেশ) কি—কি ব্যাপারটা কি !
মণিরামের গলা শুন্তে পেলুম না !

পদ্মা ।—মহারাজ ! হতভাগ্য ভাইকে এই বেলা মানে মানে আবদ্ধ করুন । হতভাগ্যের মনে ছুরভিসন্ধি প্রবেশ ক'রেছে । ও আমার প্রতি যেক্রপ আচরণ দেখিয়েছে ; এক্রপ ভাব আমি আর কখন দেখিনি মহারাজ !

বীর ।—কিছু ভয় নেই রাণী ! যদি ছুরভিসন্ধিও ওর মনে প্রবেশ করে । তাহ'লে বুঝবে, ওর মাথায় বুদ্ধিও প্রবেশ ক'রেছে । কিন্তু সেটা সম্পূর্ণ অসম্ভব । আমি বুঝতে পেরেছি, গোঁড়েশ্বরের কোন গুপ্তচর, কিম্বা সেই কুটীল মহাপাত্র ওর সঙ্গে কোন না কোন ষড়যন্ত্র ক'রেছে । ওকে কুপরামর্শ দিয়েছে—আশা দিয়েছে—সাহস দিয়েছে । নইলে ও আজ তোমার মুখের ওপর কথা ক'ইতে সাহসী হয় ! ও হতভাগ্যের ওপর রাগ ক'রে লাভ কি ? ও যদি মানুষ হ'ত, ওর তুল্য স্থান বিষ্ণুপুরে আর কার থাকতো । নাও এস, ওর ভয়ে যেন কর্তব্যের ক্রটি না হয় । বিষ্ণুপুরে যেন কিছুতেই উৎসব বন্ধ না হয় । মদনমোহনই আমাদের শরণ্য । এতকাল তিনি বিপদে আপদে রক্ষা ক'রে এসেছেন । আজ কি আর ক'রবেন না । কই আমরা তাঁর চরণে কোনও ত অপরাধ করিনি ।

(উভয়ের প্রস্থান)

দ্বিতীয় দৃশ্য ।

—*—

বিষ্ণুপুর—উপকণ্ঠ ।

শিবির সম্মুখ ।

(মহীপাল, বিদ্যারণ্য, সভাসদ)

মহী ।—দেখ বিদ্যারণ্য আর ত আমার বিলম্ব সইছে না—
মহাপাত্র এখনও ত এসে উপস্থিত হ'ল না । ওদিকে রঞ্জাবতী
আমার বিরহে ছটফট্ ক'রছে । সে সরলা প্রেম বিহ্বলা
অবলার কষ্ট দেখা, আমি আর সহ করতে পাচ্ছি না—তুমি
এখনি যাত্রার ব্যবস্থা কর ।

বিদ্যা ।—হাঁ হাঁ অমন কাজ করবেন না অমন কাজ করবেন
না—যুবরাজ ! আজ ঘাতচন্দ্র ।

মহী ।—তাহ'লে এখন যাত্রা ক'রব না ?

বিদ্যা ।—কিছুতেই না ঘাতচন্দ্র—ঘাতচন্দ্র—

মহী ।—আজ ঘাতচন্দ্র—কাল বারবেলা—পরশু তিরস্পর্শ
—পা বাড়ালেই একটা না একটা ব্যাঘাত । একি আপদ
পাঁজীতে ঢুকলো বিদ্যারণ্য ?

বিদ্যা ।—কি করবো যুবরাজ । মেঘ রাশির প্রথম, বুধের
পঞ্চম, কন্যার দশম, ধনুর চতুর্থ আর মীনের দ্বাদশ চন্দ্র
ঘাতচন্দ্র হয় ।

সভা ।—তাহ'লেই ঠিক হয়েছে--। সকাল বেলা আপনি
প্রথমেই মেঘ দুগ্ধ পান ক'রেছেন, এই মাত্র গোটা পাঁচেক
ঘাঁড় আপনার শিবিরের সম্মুখে দিয়ে হাঙ্গা রবে মাথা নাড়তে

নাড়তে চলে গেল। গোটাদেশেক কত্যা আপনার সঙ্গেই আছে, আপনি চতুর্ভুজে ধনুর্ধারী বার সের মীন-যন্তক ভক্ষণ-কারী সমস্তই মিলে গেছে—ঘাতচন্দ্র—ঘাতচন্দ্র—

বিদ্যা।—ঘাতচন্দ্রে কৃত্যযাত্রা কৃতোদ্বাহাদি মঙ্গলং ।

ক্লেশায় মরণায়ৈব গর্গাচার্যোন ভাষিতং ॥

বিদ্যা।—যদি ঘাতচন্দ্রে যাত্রা করা হয়—কি বিবাহাদি মাসুলিক কর্ম করা হয়, তাহ'লে ক্লেশায় মরণায়ৈব—অর্থাৎ খানিকটে ক্লেশ আর খানিকটে মৃত্যু ।

সভা।—তার কোনটা যে আগে হবে তার এখন ঠিক নেই ?

বিদ্যা।—না তা ঠিক নাই ও দুইই হ'তে পারে । হয় আগে ক্লেশ পরে মৃত্যু কিম্বা আগে মৃত্যু—পরে ক্লেশ ।

মহী।—না তাহ'লে পা বাড়াব না ।

সভা।—কিছুতেই না ।

মহী।—তা হ'লে কখন যাত্রা ক'র্বো ?

বিদ্যা।—সে আমি এখনি দিন দেখে দিচ্ছি । ৬ই আষাঢ় রবিবার একাদশী অতি গণ্ড যোগ ববকরণ যাত্রানাস্তি ।

সভা।—উল্টে যান—উল্টে যান ।

বিদ্যা।—৮ই ত্রয়োদশী—বিষ্টিকরণ—

সভা।—একে এই হাঁটু পর্যন্ত কাদা, তার ওপর আবার বিষ্টিকরণ, তাতে বাঁকড়ো বিষ্ণুপুরের কাঁকুরে রাগা—উল্টে যান ।

বিদ্যা।—পরে শকুনি করণ ।

সভা।—বা বাঃ ! তাহ'লে ত যেমন পা পিছলে পতন—অমনি খাবি খাওন—আর অমনি শকুনির পেটে গমন—উল্টে যান—উল্টে যান ।

বিদ্যা ।—হয়েছে—হয়েছে—৯ই হচ্ছে যাত্রার পক্ষে শুভ-
দিন । চতুর্দশী বুধবার নক্ষত্রামৃত যোগ যাত্রাশুভ ।

সভা ।—বস্ বস্—মহারাজ ৯ই এখান থেকে যাত্রা—
১০ই বিষ্ণুপুরে থাকা—১১ই বিবাহ—১২ই পুনর্যাত্রা ।

মহী ।—তাহ'লে এ শুভযাত্রায় শুভ বিবাহ নিশ্চয় ?

বিদ্যা ।—যাত্রা বলছেন কি যুবরাজ ! শুভলগ্নে যাত্রায়
আখড়া দিলে শুভ বিবাহ হ'য়ে যায়। আপনি নিশ্চিত হ'য়ে
বসে থাকুন । বিবাহ আপনার হয়ে গেছে মনে করুন ।

সভা ।—যুবরাজ ! যুবরাজ !—মহাপাত্র—আগমন করছেন !

মহী ।—আসছেন—আসছেন—মহাপাত্র আসছেন—

বিদ্যা ।—আসবে না যুবরাজ ! বলেন কি ! সূতহিবুক
যোগের টান কি ? আপনার বিবাহ কি বলছেন—মহারাজ—
আপনার জ্যেষ্ঠের জন্ম পাত্রী দেখতে গিছিলেন । তিনিও
ঐ রকম শুভলগ্নে যাত্রা করেছিলেন । এখন সে দিন ছিল
সূতহিবুক যোগ । এ যোগের এমনি মজা—যে মহারাজ
ছেলের বে দিতে গিয়ে ভুলে নিজেই বে করে ফেললেন ।

মহী ।—তার পর ?

বিদ্যা ।—বে ক'রে তাঁর মনে পড়ে গেল । তখন আর
কি হবে, লজ্জায় তিনি মাথা চুলকুতে লেগে গেলেন । আপ-
নার জ্যেষ্ঠ অবাক । মনের ছুখে তিনি প্রাণই পরিত্যাগ
ক'রে ফেললেন । আপনি সেই কনে রাণীর গর্ভজাত
সন্তান । জ্যেষ্ঠ বেঁচে থাকলে আপনি কি আর রাজা হ'তে
পারতেন !

মহী ।—বটে বটে শুভলগ্নের এত গুণ ! তাহ'লে এক কাজ

কর, পাঁজীতে যাতে কেবল শুভলগ্ন লেখে তার ব্যবস্থা কর ।
তাহ'লে রোজ রোজ শুভ যাত্রা ক'র্বো ।

বিছা ।—যথা আজ্ঞা—

(মহাপাত্রের প্রবেশ)

মহী ।—কি খবর মহাপাত্র ? আমার প্রাণেশ্বরীর খবর কি ?

মহা ।—খবর আর কি ব'ল্ব যুবরাজ ! সে কণ্ঠারবিবাহ
হ'য়ে গেছে—

সকলে ।—হ'য়ে গেছে !

মহী ।—তবে তুমি কি পাঁজী দেখলে বিছারণ্য ? তুমি
এদিকে পাঁজী দেখতে লাগলে আর ওদিকে বে হ'য়ে গেল !

বিছা ।—হ'য়ে ত যাবেই, অতক্ষণ ধ'রে লগ্ন ঘাঁটা ঘাঁটি
ক'রলে কি আর বে পড়ে থাকে যুবরাজ !

মহী ।—তারপর, এ তুমি কি ব'লছ মহাপাত্র ! আমার
সঙ্গে সম্বন্ধ—নিমন্ত্রিত হ'য়ে আমি চলেছি, এমন সময় বিবাহ
হ'য়ে গেল ! এ কি রকমটা হ'ল ?

মহী ।—অম্বিকার রাজা নয়ন সেনের সঙ্গে তার বিবাহ
হ'য়েছে ।

বিছা ।—ভায়া বসন্তে চম্পটং পথ্যং । আর কেন ?

(সভাসদ ও বিদ্যারণ্যের প্রস্থান)

মহী ।—বিষ্ণুপুরের রাজার এত বড় আশ্পর্কী !

মহা ।—আশ্পর্কীর হ'য়েছেকি, আরও শুনুন । যখন আমি
আপনার অপমান দেখে ক্রোধ সম্বরণ ক'রতে না পেরে কাঁপতে
কাঁপতে বল্লুম—আমি বাজে কথা শুন্তে চাইনা, পাত্রী চাই—
তখন বাগ্দী বেটা আমায় ব'ললে কি, যে এক পাত্রী আমি

আছি, তোমার রাজাকে আস্তে বল, আমায় বিবাহ ক'রে নিয়ে যাক ।

মহী।—কি ! ছুরায়া এই কথা কইলে ! তখনি তুমি তার যুগপাত ক'রতে পারলে না ?

(মণিরামের প্রবেশ)

মণি।—রাজকুমার আমি আপনার শরণাপন্ন ।

মহা।—এই—এই—ইনিই হচ্ছেন বিষ্ণুপুরের সেনাপতি মণিরাম রায়—আপনার শরণাপন্ন ।

মণি।—যুবরাজ আপনি সমস্ত বাঙ্গালার অধীশ্বরের একমাত্র পুত্র । আমি আপনার নিকট বিচারপ্রার্থী । অশ্বিকানগরের নয়ন সেন, আমার অনুপস্থিতিতে চোরের মতন আমার বাটীতে প্রবেশ ক'র, বিষ্ণুপুরের রাজা ও রাণীকে ভুলিয়ে আমার ভগিনীকে বিবাহ ক'রে ফেলেছে ।

মহী।—মহাপাত্র ! যেমন ক'রে পার এই অপমানের প্রতিশোধ নাও । অশ্বিকানগরের রাজা, আর বিষ্ণুপুরের রাজা দু'জনকে এক দড়ীতে বেঁধে আমার কাছে উপস্থিত কর ।

(সকলের প্রস্থান)

তৃতীয় দৃশ্য ।

—*—

বিষ্ণুপুর—রাজ-অন্তঃপুর ।

(নয়ন সেন ও রঞ্জাবতী)

নয়ন ।—রাজা ও রানী যেন কতকটা ব্যস্ত হয়ে প'ড়েছেন ।
যেন কেমন বিষণ্ণ বিষণ্ণভাব, কেন বুঝতে পেরেছ কি রঞ্জা !

রঞ্জা ।—বিষণ্ণ হ'তে যাবেন কেন ? আপনি বুঝতে পারেন নি ।

নয়ন ।—(স্বগত) তবে থাক, বালিকাকে বিপদের কথা
শুনিয়ে আর ব্যাকুল ক'রব না । (প্রকাশে) তোমার ভাইকে
ত দেখতে পেলুম না !

রঞ্জা ।—তিনি বোধহয়, আজ ও বিষ্ণুপুরে ফিরতে পারেন
নি । ফিরলে অবশ্যই দেখতে পেতেন ।

নয়ন ।—না, তোমার সম্বন্ধে সমস্ত কথা শুনে, মর্ষপীড়ায়
তিনি এখানে আসতে পারছেন না ?

রঞ্জা ।—মর্ষপীড়া যদি হয়, তাহ'লে আমার অদৃষ্ট । মর্ষ-
পীড়া কেন হবে মহারাজ ! ভাইতে কি আমার মনুষ্যত্ব নেই !

নয়ন ।—বিষ্ণুপুরবাসী কিন্তু এ বিবাহ সংবাদে মর্ষাহত
হ'য়েছে । শুনলুম গোড়েশ্বরের পুত্রের সঙ্গে তোমার সম্বন্ধ
হয়েছিল । তিনি বিবাহার্থী হ'য়ে বিষ্ণুপুরে আগমন ক'রছিলেন,
দৈবদুর্ঘটনায় আমি হতভাগ্য যদি বিষ্ণুপুরে এসে না পড়তুম,
অথবা উন্মাদের মত অন্তঃপুরে না উপস্থিত হ'তুম । যদি
তোমাদের সম্মুখে দুঃখের কাহিনী না গান ক'রতুম, তাহ'লে
বোধহয় এ বিভ্রাট ঘটত না । করুণাময়ী ! রূপযৌবনপূর্ণ

স্বামীর সোহাগিনী হ'য়ে সুখের, ঐশ্বৰ্য্যেরও অতুলনীয় সম্পদের মধ্যে ব'সে সমস্ত বাঙ্গালার সাম্রাজ্ঞী হ'তে পারতে ।

রঞ্জা ।—মহারাজ ! আমার বর্তমান ভাগ্যে আমি শচীর ভাগ্যও তুচ্ছ জ্ঞান করি । মহারাজের পদধূলি সময় মত গৃহে না পড়লে, আজ আমাকে জরাজীর্ণ একটা রাজপুত্র নাম ধারী অপদার্থের হস্তে আত্ম-সমর্পণ ক'রতে হ'ত ।

নয়ন ।—তুমি কি বলছ রঞ্জাবতী ! গোড়েশ্বরের পুত্র যে পরম রূপবান সুবা-পুরুষ ।

রঞ্জা ।—সেটা কামুকীর পক্ষে ! প্রজার সুখ যার একমাত্র কামনা, অনন্তকীর্ত্তি স্বামীর মঙ্গলময় মূর্ত্তিই সে রমণীর চির আকাঙ্ক্ষিত যৌবন স্বরূপ । মহারাজ ! আমি আজ সে ভাগ্যে ভাগ্যবতী । দশ বৎসর পরে যৌবনের সঙ্গে, জীবনের সঙ্গে, গোড়পতির প্রাণহীন নাম বিস্মৃতির গায়ে মিশিয়ে যাবে । কিন্তু মহারাজ ! রঞ্জাবতীর ক্ষণভঙ্গুর দেহ মৃত্তিকাসাৎ হ'লেও অনন্ত কালের মধ্যে একটা মাত্র দিনের জন্তও তাকে স্বামী বিয়োগ যন্ত্রণা সহ ক'রতে হবে না । কেন না, তার স্বামী অনন্ত-জীবন—যোগেশ্বরের গ্ৰায় অব্যয় । অম্বিকাপতির নাম কখনই বিনষ্ট হবার নয় ।

নয়ন ।—তবে আর আমি কি বলব রঞ্জাবতী, তোমার জন্ত আমি জগদীশ্বরের কাছে নিজের দীর্ঘজীবন কামনা করি, আনন্দময়ী তোমাকে চিরানন্দে সুখিনী করুন । তবে আর তোমার কাছে গোপন ক'রব না । আমি কি ক'রতে চ'লেছি শুন । আমার ইচ্ছা কিছুদিনের জন্ত তোমাকে এখানে রেখে আমি একবার অম্বিকায় গমন ক'রব ।

রঞ্জা । কেন মহারাজ ?

নয়ন ।—তোমাকে আমার হস্তে দান ক'রে বিষ্ণুপুর পতি বড়ই বিপন্ন । গোড়েশ্বরের মহাপাত্র প্রতিজ্ঞা ক'রে গেছে যে সে যেমন ক'রে পারে তার প্রভুর অপমানের প্রতিশোধ নেবে । একরূপ অবস্থায় আমার নিশ্চেষ্ট হ'য়ে থাকা ত উচিত হয় না রঞ্জাবতী ! কিন্তু আমি একা । গোড়েশ্বরের অসংখ্য সৈন্যের বিরুদ্ধে, নিরস্ত্র নিঃসহায় আমি কি ক'রতে পারি । বিষ্ণুপুর রাজের এই অমূল্য রত্ন দান, আমি কি অকৃতজ্ঞের মূর্তিতে গ্রহণ ক'রব ? বিষ্ণুপুরের সৈন্যধ্বংস, বিষ্ণুপুরের বিপদ, আমি কি কেবল দাঁড়িয়ে দাঁড়িয়ে দেখব ? রাজার সামান্য মাত্র ও সহায়তা কি আমা হ'তে হবে না ।

রঞ্জা ।—সেটা অবশ্য কর্তব্য ।

নয়ন ।—কর্তব্য নয় ? তুমি আমার পত্নী । আমার জীবনের প্রতি যেমন তোমার লক্ষ্য রাখা কর্তব্য, আমার মর্যাদার প্রতি দৃষ্টি রাখাও তোমার তদ্বৎ কর্তব্য ।

রঞ্জা ।—ততোধিক কর্তব্য ।

নয়ন ।—তবে আর তোমাকে কি বোঝাব রঞ্জাবতী ! তোমার গায় তেজোময়ীর আশ্রয় পেয়ে আমি আবার নব জীবনে উজ্জীবিত । অশ্বিকায় আমার অপরিমেয় বলশালী দুর্দ্ধর্ষ দিগ্বিজয়ী ডোম সৈন্য । তাদের একবার বিষ্ণুপুরে আনতে পারলে, আমি বাঙ্গালার সমবেত শক্তিকেও অগ্রাহ্য করি ! তাদের বিষ্ণুপুরে আনতে আমি অশ্বিকায় যাবার অভিলাষ ক'রেছি ।

রঞ্জা ।—আপনাকে কি করে ছেড়ে থাকবো মহারাজ !

নয়ন ।—না থাকলেতো চলবেনা ?

রঞ্জা ।—চারিদিকে শত্রু, আপনি তার মধ্য দিয়া কেমন করে যাবেন !

নয়ন ।—সে কি মৃত্যুভয় ? আমার জন্তু আবার কিসের ভয় রঞ্জাবতী ! তুমি শ্মশান প্রস্থিত জীবকে পতিত্বে বরণ করেছ । তোমার পুণ্যই আমার জীবন রক্ষার অস্ত্র । তোমার আয়তিই আমার শরীর রক্ষণে বর্ম স্বরূপ । আমার বাঁচাই যদি ঈশ্বরের অভিপ্রায় হয়, তোমার ইচ্ছাই আমাকে বিপদ আপদ থেকে রক্ষা করবে । নিরস্ত্র আমি অস্থিকা ছেড়ে এখানে এসেছি । এসে সহস্র অস্ত্রের ঝনৎকারেও যে রত্ন ছুপ্রাপ্য, বিনা আয়াসে আমি তাই পেয়েছি । নিরস্ত্র আমি অস্থিকায় ফিরে যাব । পথে যেতে যদি গৌড়েশ্বরের অগণ্য সেনাকর্তৃক পরিবৃত হই, তাহলে ছুদশ জনকে হত্যা করেই বা রাজার আমি কি উপকার করবো রঞ্জাবতী ? আমি আর কাল বিলম্ব করব না । তুমি আমাকে বাধা দিয়োনা ।

রঞ্জা ।—তবে আপনার ইচ্ছামত কার্য্য করুন ।

নয়ন ।—তৃতীয় ব্যক্তিকে একথা প্রকাশ করোনা । আমি আজই অমাবস্তার ঘোর অন্ধকার আশ্রয় ক'রে, এ স্থান ত্যাগ করব ।

রঞ্জা ।—আমাদের ইষ্ট দেবতা কে ?

নয়ন ।—মা আনন্দময়ী রক্ষিনী ।

রঞ্জা ।—দেখোমা আনন্দময়ী, তোমার শ্রীপাদ পদ্মে যখন তনয়াকে আশ্রয় দিয়েছো, তখন তাকে আর আশ্রয়হীনা করো না । দেখবেন মহারাজ ! আমাকে যেন পরিত্যাগ করবেন না ।

নয়ন।—পরিত্যাগ—কেমন করে পরিত্যাগ করব প্রাণেশ্বরী !
ভোগের সঙ্গে সন্ন্যাসের অপূৰ্ণ মিলন, এক সাবিত্রীতে ছিল
শুনতে পাই, কিন্তু তোমাতে তা প্রত্যক্ষ দর্শন করলুম। তবে
আবার বলি, এই বৃদ্ধের গলায় মালা দেওয়ায় আমার মত
ছঃখিত আর দ্বিতীয় ব্যক্তি হয়নি। তোমার পূর্ণ যৌবন,
অপূৰ্ণ রূপ, ভগবতীর গুণরাশি—অনন্ত আশা—! তুমি স্বহস্তে
সে আশার মূলোচ্ছেদ করেছ। তোমাকে যদি পরিত্যাগ করি,
তাহ'লে ইষ্টদেবীর প্রসাদও আমাকে নরক থেকে রক্ষা করতে
পারবে না।

রঞ্জা।—আমি আপনার জড়ময় দেহ দেখিনি মহারাজ !
আপনার জ্যোতির্ময় রূপ হৃদয়ে ধারণ ক'রে, তাই এই মালা দিয়ে
বরণ করেছি।

নয়ন। অশ্বিকার ঈশ্বরীর মৰ্যাদা রাখতে, আমিও বিষ্ণুপুর
পরিত্যাগ করে চলেছি।

রঞ্জা।—তাহ'লে মহারাজ বলুন, এক সঙ্গে মদন মোহনের
আশীর্বাদ গ্রহণ করি।

চতুর্থ দৃশ্য ।

—*—

বিষ্ণুপুর—প্রাসাদ সম্মুখ ।

(সৃষ্টিধর ও প্রজাগণ)

সৃ।—ধর্মের লীলা আমাকে ভাল করে দেখে নিতে হচ্ছে।
তুমি যে ঠাকুর জোচ্চরির করে আবহমান কাল থেকে একটা

স্বনাম নিয়ে আসবে, আমি কোথানে থাকবো সেই খানেই জয়
সেটা আর হতে দিচ্ছি নি। আগে প্রত্যক্ষ দেখি তবে তোমার
কথায় বিশ্বাস করি। নইলে তুমি পুঁথি পাজী দেখিয়ে যে
বলবে, আমি অমুক সময়ে অমুক করেছি—হরিশ্চন্দ্রকে সশরীরে
স্বর্গে পাঠিয়েছি, রাবণ মেরে সীতার উদ্ধার করেছি, কুরুকুল
নির্মূল ক'রে যুধিষ্ঠিরকে রাজ্য দিয়েছি, ওসব পুঁথি পাজীর
নজির আমি দেখতে চাইনা। নজির আমিও দেখাতে পারি,
আমি ও বলতে পারি, বলী দান করে পাতালে গেছে। বালী
চার সমুদ্রে পূজা ক'রে ধ্যান করে রামের হাতে মরেচে।
আমি প্রত্যক্ষ নজির চাই। তুমি বলতে পার, আমি নয়ন-
সেনকে রঞ্জা দিইচি, কিন্তু তাতে এই করেছ যে, রঞ্জাও যায়
নয়নসেনও যায়—বিষ্ণুপুর ও যায়। যদি এ বিপদে বিষ্ণুপুর
রক্ষা করতে পার, তবে তোমার ক্ষমতা বুঝি।—ভাই সব বেশ
করে রাজাকে বুঝিয়ে বল যে, তিনি কেন ইচ্ছাপূর্বক এই
বিপদ ডেকে আনছেন।

সকলে।—বল—বেশ করে বুঝিয়ে বল।

স্ব।—কোথাকার কে, কোন জাত, যথার্থই রাজা নয়ন সেন
কিনা, ভাই এখন ও ঠিক হ'লনা, তার জন্তু আমরা স্ত্রী পুত্র
পরিবারকে বিপদে ফেলতে যাব কেন ?

সকলে।—কেন কিসের জন্তু ফেলতে যাব !

স্ব।—সে যে রাজা নয়ন সেন তার সাক্ষী কে !

সকলে।—আসামীও সেই—সাক্ষী ও সেই।

স্ব।—সে যে চোর নয়, তা কেমন করে জানবো !

১ম প।—চোর নয় কি, নিশ্চয় চোর

সকলে ।—চোর—পাকাচোর ।

১ম প্র ।—সে রজাবতীকে চুরী করবার মতলবে সন্ন্যাসী
সেজে এসেছে ।

সকলে ।—তাতে আর সন্দেহই নেই ।

স্ব ।—সে যেমন এসে বল্লে নয়নসেন, অমনি সাক্ষী নিলে
না—সাবুদ নিলে না—বাইরের এক আধজনকে জানালেও না,
অন্দরে অন্দরেই শালীটীকে সমর্পণ করে ফেললে ?

১ম প্র ।—রাজা ব'লে কি সমাজ দেখবে না । তাহ'লে
আমাদের জাতকুটুম্ব যাকে তাকে মেয়ে ধ'রে দিলে, আমরাও
তাকে শাসন করতে পা'রবো না ।

সকলে ।—কেমন করে পা'রবো ?

স্ব ।—আচ্ছা নয়ন সেন বলেই যদি সে নয়ন সেন হয়, তা'হলে
আমি নাকসেন, তুমি দাড়ীসেন, ও নাড়ীসেন, সে ভুঁড়িসেন—
তা'হলে দাও, আমাদেরও রজাবতীর সঙ্গে বে দাও ।

সকলে ।—দাও—বে দাও ।

স্ব ।—আর রজাবতীই বা কি করলে ?

সকলে ।—বোঝ দেখি ভাই ।

স্ব ।—হাতে কি মালা অমনি যোগান ছিল, যে লোকটা
এল, তাকে হাঁপ ফেলতেও দিলে না—দাঁড়াতে না দাঁড়াতেই
তার গলায় মালা পরিয়ে দিলে !

১ম ।—কি ক'রে জান্লে যে নয়ন সেন আসবে ।

স্ব ।—বুঝতে পাচ্ছনা, আগে থাকতে সড় ছিল ।

সকলে ।—তাই ঠিক, যা বলেছ, সড় ছিল ।

স্ব ।—তবে তার জন্ত আমরা প্রাণ দিতে যাব কেন !

সকলে ।—কিছুতেই না ।

স্ব ।—রাজা রামচন্দ্র প্রজার জন্ত স্ত্রী বনবাসে দিলেন,
আর আমাদের রাজা কিনা শালীর জন্তে প্রজা বনবাস দিচ্ছেন ।

সকলে ।—এই কি রাজার কাজ !

স্ব ।—ঐ রাজা আসছেন । তোমরা সব এইখানে দাঁড়াও,
দাঁড়িয়ে বল—ছেড়োনা—কিছুতেই ছেড়োনা—। আমি চাকর,
আমিত থাকতে পারি না । তাহ'লে রাজা মনে করবে, আমি
শিথিয়ে দিয়েছি ।

(প্রস্থান)

(রাজা ও বীরমলের প্রবেশ)

সকলে ।—জয়, মহারাজের জয়, দয়াময় আমাদের রক্ষা
করুন ।

বীর ।—কেন তোমাদের কি বাঘে ধরেছে ; যে রক্ষা
করব ?

১প্র ।—আজ্ঞে মহারাজ বাঘেরও বেশী, আমরা স্ত্রীপুত্র
নিয়ে বিপন্ন ।

বীর ।—তা এতে আর আমার রক্ষা করবার কি আছে ! স্ত্রী
পুত্র ফেলে চম্পট দাও ।

১ম ।—আজ্ঞে মহারাজ ! গোড়েশ্বরের পুত্র আমাদের
আক্রমণ করছেন ।

বীর ।—তা হলেত ভালই করেছেন । তিনিই তোমাদের
স্ত্রীপুত্রদের দায় হ'তে অব্যাহতি দেবেন । একেবারে ছাঁদা
বেঁধে গোড়ে নিয়ে হাজির করবেন ।

১প্র।—আজ্ঞে রঞ্জাবতী দেবীর বিবাহ দিলেইত সব গোল-
মাল চুকে যায়।

বীর।—বিবাহ ত দেওয়া হয়েছে, কিন্তু গোলমাল ত
চুকছে না।

১প্র।—আজ্ঞে—আজ্ঞে—

বীর।—আজ্ঞে আজ্ঞে কি—বল।

১প্র।—বিবাহই বা কই হলো ?

বীর।—সে কি হে! এমন চর্ক্যা চোষ্য ভোজন করলে,
সেটাকি তবে মনে করেছিলে, আমার জীবদশায় শ্রাঙ্কে খেয়ে
গেলে।

১প্র।—বিবাহ কার সঙ্গে হ'ল ?

বীর।—সে যে বিবাহ করেছে সেই জানে।

সকলে।—তিনি নয়ন সেন কিনা—

বীর।—তা আমি কেমন করে বলবো। আমি তাকে
কখন দেখিওনি—চিনিওনি। সে ব্যক্তি বলেছে, “আমি
নয়ন সেন” আমিও বুঝেছি নয়ন সেন।

১ম।—মহারাজ যদি অভয় দেন তবে বলি।

বীর।—অবশ্য বলবে, তোমরা প্রজা—তোমাদের নিয়েই
রাজ্য। তোমরা আমাকে সুখ দুঃখ জানাবে, তাতে ভয়
করতে হবে কেন ?

১ম।—মহারাজ চিরদিনই প্রজাপালক।

সকলে।—রাম রাজত্ব।

১প্র।—বিপদ কাকে বলে আমরা জানতুম না। এখন
একটা তুচ্ছ কারণে মহাবিপদ উপস্থিত। গৌড়েশ্বরের পুত্রের

সঙ্গে রঞ্জাবতী দেবীর সম্বন্ধ, অথচ দেবী আর এক জনের গলায় মালা দিয়েছেন। সে ব্যক্তি যে কে, এবং কি জাতি, তা বিষ্ণুপুরের কেউ জানে না। মহারাজও বলতে পারেন না। একরূপ অবস্থায় গৌড়েশ্বরের পুত্রের হাতে তাঁকে সমর্পণ না করাতে মহারাজের দুর্নাম হচ্ছে। সেনাপতি—প্রজা—প্রতিবাসী—কেউ এ বিবাহে সুখী নয়।

বীর।—সুখী হবার ত কথা নয়।

১ম প্রজা।—তা হ'লে তাদের এই অসুখের কারণ দূর ক'রলে হয় না। প্রজা সুখী হয়, সেনাপতি সুখী হন, দেশটাও রক্ষা পায়। শুন্লুম অপমানিত গৌড়েশ্বরের পুত্র বহু সৈন্য নিয়ে বিষ্ণুপুর আক্রমণ ক'রতে আগমন করছেন।

বীর।—তোমরা যা বলছ তা বুঝেছি, কিন্তু বোঝাই সার। বড় দুঃখের বিষয় কিছু ক'রতে পারছি না। হিঁদুর মেয়ের আর দুবার বে হয় না।

১ম প্রজা।—তা হ'লে কি আমরা ধ্বংস পাব!

বীর।—আত্মরক্ষা ক'রতে না জানলে তা ছাড়া আর কি হ'তে পারে! তারা আসছে দেশ জয় করতে। তারা কি তোমাকে কোলে বসিয়ে আদর করে নাড়ু গোপালের মতন মুখে নাড়ু তুলে দেবে। কাপুরুষকে কেউ দয়া করে না বুঝে! আত্মরক্ষা ক'রতে চাও, অস্ত্র নাও। নিয়ে গৌড়ের যুবরাজের সৈন্যের সঙ্গে লড়াই লাগিয়ে দাও।

১ম প্রজা।—দেবার কারণ হ'লে দিতে পারি, নইলে মহারাজ অনর্থক লড়াই লাগিয়ে ক'রব কি!

বীর।—বেশ, তাহ'লে যতক্ষণ গৌড়েশ্বরের সৈন্য এসে

টিকি ধরে তুলে না নিয়ে যায়, ততক্ষণ ঘরে বসে বসে চিপিটক ভক্ষণ কর ।

(চরের প্রবেশ)

১ম চর ।—মহারাজ !

বীর ।—মহারাজ বলে খাম্লে কেন ? কি ব'লতে এসেছ বল । এরা আমার সন্তান । বিপদ সকলেরই সমান । নির্ভয়ে এদের কাছে ব'লতে পার ।

১ম চর ।—গৌড়েশ্বরের সমস্ত সৈন্য দ্বারকেশ্বরের পারে সমবেত হ'য়েছে । মাতুল মহারাজ সসৈন্তে তাঁর সঙ্গে যোগ দিয়েছেন ।

বীর ।—বেশ তুমি এক কাজ কর । এই এঁদের ও মাতুল মহারাজের কাছে নিয়ে যাও । এঁরা স্ত্রীপুত্রের বিপদে বড় ব্যস্ত হ'য়ে পড়েছেন ।

সকলে ।—সে কি মহারাজ ! আমরা এমন কাজ ক'র্ব কেন ?

বীর ।—তবে আর কি হবে ! এও ক'র্বে না—তাও ক'র্ব না । তাহ'লে চল মদনমোহনের ঘরে গিয়ে আমার সঙ্গে নৃত্য ক'র্বে ।

(২য় চরের প্রবেশ)

২য় চর ।—মহারাজ !

বীর ।—কি ! কি !

২য় চর ।—রাজা নয়ন সেন পালিয়েছেন, কেউ তাঁকে কোথাও খুঁজে পাচ্ছে না

বীর ।—বেশ ক'রেছেন। বাঙ্গালীর ছেলেকে ভগবান
পা দিয়েছেন কিসের জন্ত ? বসে বসে কি সে ছটোকে বাতে
পশু করবার জন্ত। যঃ প্রয়াতি স জীবতি। তোমরাও তাই
কর। যুদ্ধ ক'র্বে না, গৌড়েশ্বরের শরণাপন্নও হবে না।
তাহ'লে এই বেলা মানে মানে পা ছটোর সদ্যবহার কর।
স্ত্রীপুত্রদের পা থাকে সঙ্গে নাও, না থাকে কাঁধে ক'রে বগল
বাজাতে বাজাতে ড্যাং ড্যাঙ্গিয়ে বনে চ'লে যাও। বনের
বাঘগুলো বছদিন থেকে ছুঁড়িচ্ছে কষ্ট পাচ্ছে, তাদের পেটের
জ্বালা-নিবারণ কর।

১ম প্রজা ।—দোহাই মহারাজ, একটা প্রবঞ্চকের জন্ত
সোণার রাজ্য নষ্ট ক'র্বেন না।

সকলে ।—দোহাই মহারাজ—দোহাই মহারাজ।

বীর ।—সোণার রাজ্যের ধ্বংস হয় না। তোমাদের মত
পোড়া মাটিতে যে রাজ্যের সৃষ্টি তারই ধ্বংস হয়।

(সকলের প্রশ্নান)

পঞ্চম—দৃশ্য ।

—*—

বিষ্ণুপুর—অস্তঃপুরস্থ উদ্যান ।

সৃষ্টিধর ।—

গীত ।

শ্যাম বৃষ্টি যমুনায় কাঁপ খেলে ।

ওগো তোরা তুলগে তারে ডুব দেছে সে রাই ব'লে ॥

জলে আছে কালীর ছানা,—

ফণা তুলে বসে আছে, যেমনি কানু যাবে কাছে,
ল্যাজ্ দিয়ে পাক জড়িয়ে দেবে উঠতে দেবে না ।

তখন কে এসে বাজাবে বাঁশী কদম্ব মূলে ।
গোপীর ননী করবে চুরি সাধের গোকূলে ॥

রঞ্জা।—কেও সৃষ্টিধর !

স্ব।—এই যে—মাসীমা ! প্রণাম ।

রঞ্জা।—তুমি এখানে কি করছো !

স্ব।—এই ধর্ম্মা বলে আমার এক সাক্ষাৎ এই খানে নাকি
যাতায়াত করছে, আমি তাই তার গতিবিধি লক্ষ্য করছি ।

রঞ্জা।—কই—ধর্ম্মা বলতে এখানে কেউ নেই ।

স্ব।—সে তুমি জানবে না । তোমার স্বামী রাজা নয়ন
সেন জানেন ।

রঞ্জা।—আমার স্বামীর কথা তুমি জানলে কেমন করে !
তুমি দাদার সঙ্গে গিয়েছিলে না ?

স্ব।—সেই গিয়েই ত আমার সাক্ষাতের সঙ্গে একটু আধটু
পরিচয় হল । আমি বিষ্ণুপুরের সাড়ে বারো গণ্ডী আমার
নজর রাখতে হয় কত দিকে । লুকিয়ে লুকিয়ে সাক্ষাৎ চোরা
চাল চাচ্ছিলেন আমার চ'কে পড়ে গেলেন ।

রঞ্জা।—সাড়ে বারোগণ্ডী কি ?

স্ব।—ও হরি তা তুমি জান না !

রঞ্জা।—না !

স্ব।—তা তুমি কি করে জানবে ! এ কে স্ত্রীলোক, তাতে
বুদ্ধি কম, একটা বুড়োকেই বে করে বসলে । তুমি যুদ্ধের
খবর কি করে রাখবে ! সাড়ে বারোগণ্ডী কি বুঝিয়ে দিচ্ছি ।

পাঁচ হাজারী মনসবদার—হাজারী মনসবদার—সুবেদার—
রেসেলদার—এসব নাম কখন শোননি ?

রঞ্জা ।—ওনেছি ।

স্ব ।—তবে আর কি ; তা'হলে সাড়ে বারোগণ্ডীও
বুঝেছো। যার তাঁবে পাঁচ হাজার সৈন্য সে হল পাঁচ হাজারী
—যার তাঁবে হাজার—সে হাজারী ।—এখন আমার অদৃষ্টে
হ'ল সাড়ে বারোগণ্ডা বাঙ্গালী, মুখেই রাজা রাজড়া মার্ত্তে
জানে, কাজেই বাকোর উপাধি আছে—বাকি বাগীশ—
কাবি ভূষণ—তকচুক্ষু—যুদ্ধক্ষেত্র বাঙ্গালী কখন দেখেও নি—
মাড়ায়ণনি—কাজেই যুদ্ধের খেতাব কারও ভাগ্যে জোটেনি।
কই কখন ওনেছ কি ! বাগচুক্ষু, মুঙ্গার চুড়ামণি—মুঘল শাস্ত্রী !
যখন যোদ্ধার উপাধি নেই, তখন খেতাবটা নিজেকেই গড়ে
নিতে হল ।

রঞ্জা ।—কেন পঞ্চাশী হলে না। তা'হলেত অনেকটা
মিষ্টি শোনাত ।

স্ব ।—কি আমি সাড়ে বারোগণ্ডার মালিক, আমি পঞ্চাশী
হতে যাব কেন ।

রঞ্জা ।—যে সাড়ে বারোগণ্ডা—সেইত পঞ্চাশ ।

স্ব ।—হিঃ হিঃ তা'হলে তোমার বুদ্ধি আছে । তা'হলে
শুধু তুমি অধিকার কেন, অম্বা, অম্বালিকা, সত্যবতী, বাসদেব
মাঘ পরাশরের ওপরে পর্য্যাপ্ত রাজত্ব করতে পারবে । তা'হলে
তুমি যে বুড়ো দেখে বে করেছ—সে ঠিক বুড়ো নয়, তাতে
পদার্থ আছে ।

রঞ্জা ।—যুদ্ধে যে গেলে, তার ববর কি ?

স্ব।—খবর আচ্ছা—যুদ্ধ জয়—রমাই ঘোষ নির্বংশ।

রঞ্জা।—সে খবর ত পেয়েছি। অন্য খবর ?

স্ব।—অন্য খবর—মাঝারি—। মান্দারণ—উদ্ধার—কিছু
ছেলে পগার পার।

রঞ্জা।—সে খবর ও পেয়েছি। দাদার খবর কি ?

স্ব।—বড় মন্দ।

রঞ্জা।—বড় মন্দ !

স্ব।—বড় মন্দ। তার কোমর ভেঙ্গে গেছে।

রঞ্জা।—কোমর ভেঙ্গে গেছে কি ?

স্ব।—সেটা আস্তে আস্তে পথের মাঝখানে ঘটে গেছে।

রঞ্জা।—তাহ'লে তুমি দাঁড়িয়ে আছ কেন ? শীগির
রাজাকে খবর দাও।

স্ব।—খবর অনেকক্ষণ দেওয়া হয়ে গেছে, কিন্তু দিলে কি
হবে ? সে ভেতর থেকে ভেঙেছে, কাজেই ঠেকো দেবার
কোথাও নাই, মেরামত হবারও উপায় নেই ; দোষটা হ'ল
আমার। আমি কতকগুলো লোককে ধরে, তাঁর স্মরণে এনে
উপস্থিত করলুম। তারা কোথাও কিছুই নেই, হঠাৎ তোমার
দাদাকে বাড়ীপেটা করতে লেগে গেল।

রঞ্জা।—আর তুমি সাড়ে বারোগণ্ডী—তাই দাঁড়িয়ে
দাঁড়িয়ে দেখতে লাগলে !

স্ব।—আমি আর কি করব ! আমার এই হাতে ছিল ঢাল
আর এই হাতে ছিল তলোয়ার। দুই হাতই যোড়া, বেটাদের
যে ধাক্কা মেরে তাড়িয়ে দেবো, তারও উপায় ছিল না। এসেই
তোমার দাদাকে না ঘেরে বলে আপনিই রমাই ঘোষকে বধ

ক'রেছেন, আপনিই আমাদের স্ত্রীপুত্রদের মান রেখেছেন—
আপনিই দেশ রক্ষা ক'রেছেন ! বুঝতে পার্ছ মাসী মা ?

রঞ্জা ।—তুমি তাঁদের বুঝিয়ে দিলে না কেন !

স্ব ।—বুঝিয়ে দেবার সময় কোথায় পেলুম, তা বোঝাব
—তারা তখন তোমার দাদাকে ঘেরে মহা গুণ্ডগোল লাগিয়ে
দিয়েছে—বলে আপনি রঞ্জাবতী দেবীর যোগ্যপাত্র । বুঝেছ
মাসী মা ?

রঞ্জা ।—বুঝেছি, তুমি এখন যাও (প্রস্থানোচ্চতা)

স্ব ।—দাদা তোমার তখন কোথায় পালায় কোথায়
পালায়, কিন্তু তারা পালাতে দেবে কেন । তারা তোমার
দাদাকে এই এমনি ক'রে আগলে, এই এমনি ক'রে নৃত্য না
ক'রে বলে, আপনি আমাদের মদনমোহন আর রঞ্জাবতী
রাধারাগী—(পুনঃ পুনঃ উচ্চারণ)

রঞ্জা ।—নাও, পথ ছাড় আমাকে যেতে দাও ।

স্ব ।—এই মদনমোহন রাধারাগী যতই শোনেন, ততই দমে
দমে তোমার দাদার কোমর ব'সে যায় ।

রঞ্জা ।—তা যাক, তুমি পথ ছাড় ।

স্ব ।—চলে যাবে তা যাওনা—তবে কি জান পথের মাঝে
ছিল মহাপাতুর । দৈবক্রমে তোমার দাদার সঙ্গে তার হ'য়ে
গেল দেখা । যেমন দেখা অমনি ভাব, অমনি তোমার মদন-
মোহন বধের প্রতিজ্ঞা ।

রঞ্জা ।—তারপর ?

স্ব ।—তারপর আমি কি জানি ।

রঞ্জা ।—এ সংবাদ তোমায় কে দিলে ?

স্ব।—কেন আমার ধন্যা সাক্ষাৎ । সে ব'ল্লে নয়ন সেন
যে চুপি চুপি পালাচ্ছে, তাকে এই বেলা ধরে ফেল । এখনও
ত সে বেশী দূর যায়নি, এই সবে মাত্র বেরিয়েছে ।

রঞ্জা।—তাইত তাইত, তা'হলে কি হবে সৃষ্টিধর—কি
করে আমার স্বামী রক্ষা পাবেন । তিনি যে একা নিরস্ত ।

স্ব।—কি করে রক্ষা পাবেন, তা আমি কি জানি, যে খবর
দিয়েছে—সেই ধর্ম্মই জানে । মেরে ফেললে ভাল হয়,
মারবে । রাখলে ভাল হয় রাখবে ।

(প্রস্থান)

(পদ্মাবতীর প্রবেশ)

পদ্মা।—রঞ্জাবতী ! এমন সময় একাকিনী এ উড়ানে
থেকো না । শুনলুম বহু সৈন্ত নিয়ে গৌড়েখরের পুত্র, আমা-
দের রাজ্য আক্রমণ করতে আসছেন । প্রজাসব সেই সঙ্গে
বিদ্রোহী হয়েছে । সুতরাং আমি এখানকার কাউকেও আর
বিশ্বাস করতে পারি না । অসহায় অবস্থায় এ নির্জন স্থানে
বিচরণ করা আর যুক্তি যুক্ত নয় । ঘরে চল ।

রঞ্জা।—শুনলুম—দাদা বিষ্ণুপুরে এসেছেন ।

পদ্মা।—সে এসে সসৈন্তে গৌড়েখরের পুত্রের সঙ্গে যোগ-
দান করেছে । এত কাল যে মহারাজ পুত্র স্নেহে তাকে
পালন করে এসেছেন, সে তার যোগা প্রতিশোধ দিয়েছে ।
আমার মাথা হেঁট করেছে । অত্যাচারী ভ্রাতৃবাসল্যে আমি
তাকে বিষ্ণুপুরের সেনাপতি করেছিলুম । যোগ্যতর ব্যক্তিদেব
বঞ্চিত করে তাদের মর্মান্তিক ক্ষোভের কারণ হয়েছিলুম ।
এখন তাদের ও হারিয়েছি ভাইয়ের কাছে ও উপযুক্ত প্রতি-

ফল পেয়েছি। এখন অদৃষ্টে আরও কি আছে তা বুঝতে পারছি না--তুমি ও সাবধান হও। নইলে বিপদে পড়বার সম্ভাবনা। রাজা এ বয়সে আত্মরক্ষা করতেই অসমর্থ, তিনি কিছু এ সময় আমাদের ভার আবার গ্রহণ করতে পারেন না।

রঞ্জা।--তা হ'লে ত দেখছি দিদি, আমা হতেই বিষ্ণুপুরের এই বিপদ উপস্থিত হল।

পদ্মা।--তা হ'লেও আমাদের দুঃখ করবার কিছু নেই। তুমি আমার কণ্ঠা হলেও ত এইরূপ বিপদ উপস্থিত হতে পারত। বিপদ এসেছে--কি করব। ম'লে কিছু বিষ্ণুপুরকে সঙ্গে নিয়ে যাব না। যারা আমাদের সঙ্গে সমভাবে বিষ্ণুপুর ভোগ করছে তারা যদি ইচ্ছাপূর্বক দেশকে শত্রু হস্তে দিতে চায়, তা হ'লে আমাদের দুঃখ কি? কিন্তু হিঁহর মেয়ের ধর্ম যদি সামান্য মাত্র ও আহত হয়, তার চেয়ে দুঃখ আর হ'তেই পারে না। শুনলুম--যিনি তোমার ধর্ম রক্ষাকর্তা তিনি চোরের মতন বিষ্ণুপুর ত্যাগ ক'রেছেন।

রঞ্জা।--(স্বগত) কি ক'র্ব্ব? ব'ল'ব? না মহারাজ নিষেধ ক'রে গেছেন। যতদিন না তিনি বিষ্ণুপুরে ফিরতে পারছেন ততদিন তাঁর দুর্নাম আমাকে শুনতেই হবে।

পদ্মা।--শুনে দুঃখ ক'রনা রঞ্জাবতী! কি ক'র্বে অদৃষ্ট! তুমি বুঝতে পারলে না আমি বুঝতে পারলুম না, অমন বিজ্ঞ রাজা তিনিও কেমন হতবুদ্ধি হ'য়ে গেলেন। এক অজ্ঞাত-কুলশীল বৃদ্ধের বাক্চাতুর্য্যে মুগ্ধ হ'য়ে, আমরা যে কে কি ক'র্লুম কিছু বুঝতে পারলুম না। কাকে তোমাকে সমর্পণ

ক'রলুম, তাই এখন আমরা বুঝতে পারছি না। সে ব্যক্তি যদি নয়ন সেন হ'ত, তাহ'লে কি এই দুঃসময়ে পরম হিতৈষী মহারাজকে সে পরিত্যাগ ক'রে যেতে পারত ? অথচ সমস্ত বিপদ সেই নরাদম কাপুরুষের জন্ত। তারই জন্ত শান্ত প্রজা বিদ্রোহী হ'ল। ভাই শক্র হ'ল। সেই প্রবঞ্চকের জন্তই বাঙ্গালার সম্রাটপুত্র—নব লক্ষ সৈন্তের অধিপতি অপমানিত লাঞ্চিত হয়ে, রুদ্রমূর্তিতে বিষ্ণুপুর রসাতলে দিতে আসছে। যাক—অদৃষ্টে যা ছিল তাই হল। তুমি কিন্তু সাবধানে থেকে একাকিনী এখানে সেখানে ঘুরোনা—কেননা এখন আমার নিজের ঘর পর্যন্ত নিরাপদ স্থান নয়। কার মনে কি আছে কিছুই বলতে পারি না। এই যে মহারাজ ! আপনি আবার এখানে এলেন কেন ?

(বীরমল্লের প্রবেশ)

বীর।—রঞ্জাবতী, একটা কথা তোমায় জিজ্ঞাসা করব ?

রঞ্জা।—আজ্ঞে করুন।

বীর।—জিজ্ঞাসা করছি—কিন্তু বুঝে উত্তর দিও। আমার কথায় মনে একটুকু ও ছুঁখ করোনা।

রঞ্জা।—আপনি আমার পিতৃতুল্য হিতার্থী।

বীর।—তবে শোন। তোমার স্বামী তোমাকে শক্রহস্তে নিক্ষেপ ক'রে কাপুরুষের হায়ে এস্থান ত্যাগ করে গেছেন।

রঞ্জা।—আপনারা কি তাঁর পুনরাগমনের প্রত্যাশা করেন না ?

বীর।—প্রত্যাশা করতে পারি, কিন্তু জীবদশায় নয়। যখন সে ফিরবে, তখন বিষ্ণুপুর অরণ্যে পরিণত হবে। এতক্ষণ

বোধ হয় তোমার সঙ্গে কথা কবার ও অবকাশ পেতুম না।
এতক্ষণ গোড়েশ্বরের পুত্রের সমস্ত সৈন্ত বিষ্ণুপুর ঘেরে ফেলতো
আজীবন যুদ্ধ ব্যবসায়ী, এ বান্ধকোও আমি চুপ করে থাকতে
পারতুম না। অগণ্য যোদ্ধার বিরুদ্ধে আমি একা, স্তত্রাং
পরিণাম কি হ'ত তোমাদের বুঝতে বাকী নেই। কি জানি
কি আশ্চর্য্য দৈব ঘটনায়, বিড়াই, দারকেশ্বরে প্রবল বন্তা
এসেছে। আসতে আসতে সৈন্তের গতিরোধ হয়ে গেছে।
তাই এখনও বেঁচে আছি। কিন্তু বন্তা আমাকে ক'দিন রক্ষা
করবে ?

রঞ্জা।—আমাকে কি করতে অনুমতি করেন।

বীর।—তুমি পুনর্বিবাহে প্রস্তুত আছ ? সমস্ত প্রজাকে
অসন্তুষ্ট করে, আমি এক অজ্ঞাতকুলশীল প্রবঞ্চকের হাতে
তোমাকে দান করেছি।

~~বীর~~।—শালিকা বলে এ কঠোর রহস্য করবেন না
মহারাজ !

বীর।—তবে আর কি, জাতি ও গেল—কুল ও গেল—
তখন এই—ঝরঝরে ভাঙ্গা পিঁজরের ভেতর প্রাণটা রাখবার
আর প্রয়োজন কি ? তোমরা প্রস্তুত থাক, আমিও চলুম।

রঞ্জা।—(পদতলে পড়িয়া) মহারাজ ! আমাকে পরিত্যাগ
করুন না।

বীর।—রঞ্জাবতী—! বৃদ্ধ আমি—তার ওপর বাল্যকালে
নীচঘরে প্রতিপালিত—মর্ধ্যদা রেখে কথা কইতে শিখিনি।
আমি তোমার মনে বড়ই কষ্ট দিয়েছি, আমাকে ক্ষমা কর।

রঞ্জা।—সে কি মহারাজ ! আপনি আমার পিতৃহুলা।

বাল্যে বাপ মাকে হারিয়েছি। অবোধের চক্ষে তাঁদের দেখে-
ছিলুম। স্মৃতরাং তাঁদের দেখতেও পায়নি চিনতেও পারিনি।
যখন দেখতে শিখেছি—তখন দেখেছি আপনি আমার পিতা,—
আর স্নেহময়ী রাণীই আমার মা। দেখুন আমি রহস্য করছি
না, আপনাদিগকে বিপন্নুক্র দেখবার জন্তুও বলছি না। কেননা
এটা আমার বিশ্বাস—বিষ্ণুপুর রাজ যতই অশক্ত হ'ন তবু
তিনি মৃত্যুকে ভয় করেন না। তথাপি আমি বলছি—আপনি
আমাকে পরিত্যাগ করুন।

পদ্মা।—আর কেন রঞ্জাবতী ! আর ও কথা কেন দিদি-
মণি ।

রঞ্জা।—না দিদি ! আপনি শুধু এই অভাগিনীর ভগিনী
ন'ন। আপনি অসংখ্য সন্তানের জননী। শুধু এক জনের
জন্তু সেই অসংখ্যকে বিপন্ন করা, রাজ্যেশ্বরের ধর্ম নয়। মহা-
রাজ শ্রীরাম চন্দ্র প্রজারঞ্জনের জন্তু সহধর্মিনীকে বনবাস
দিয়েছেন !

বীর।—আমি ত শ্রীরাম চন্দ্র নয়, আমি বাগ্দীরাজ।
বাগ্দীর ঘরে বাল্যকালে দু'একটা নিকে দেখেছিলুম, তাইতে
রঞ্জাবতী আমি এই অনার্যোচিত বাক্যে তোমাকে মর্মান্বিত
করেছি।

রঞ্জা।—না মহারাজ, আপনি ঋষি, আপনার ওপর ক্রোধ
করবার কিছুই নেই। তথাপি আমি কি নিবেদন করি শুনুন।
আমি রূপের লোভে মালা দিইনি, যৌবন ঐশ্বর্য্য দেখে মালা
দিইনি—অসাধারণ বীরত্বের, অতুল দেশহিতৈষীর অপূর্ব স্বার্থ
ত্যাগের পুরস্কার স্বরূপ গর্ভিতা দাত্রীর শ্রায় আমি বৃদ্ধকে

মৌবন দান করেছি । তিনি যদি প্রবঞ্চক হন, তথাপি তিনি আমার স্বামী । তিনি যদি নীচকুলোদ্ভব হন তথাপি তিনি আমার স্বামী ! প্রাণ ভয়ে যদি তিনি আমাকে পরিত্যাগ ক'রে পালিয়েও যান তথাপি তিনি আমার স্বামী । আমি সহধর্মিণী মৃত্তিতে, পরিব্রাজিকা বেশে তাঁর অনুসরণ ক'র্বো, মহারাজ ! আমাকে বাধা দেবেন না ।

বীর ।—তাহলে পদ্মাবতী, তুমি তোমার ভগিনীকে গড়ের বাইরে রেখে এস ।

পদ্মা ।—দোহাই মহারাজ ! অজ্ঞান বালিকার উপর ক্রোধ করবেন না ।

বীর ।—না ক্রোধ করব কেন ? রাজা আমি ক্রোধ করে লাভ কি ? যদি বেঁচে থাকি, দু'দিন বাদে, তোমাকে আমাকে সবাইকেই পথে বসুতে হবে । স্মৃতরাং আগে থাকতে মানে মানে যে ষার পথটা দেখা ভাল নয় ? যাও রঞ্জাবতী আমি সন্দেহ চিন্তে তোমাকে গৃহত্যাগে অনুমতি দিলুম ।

(প্রস্থান)

পদ্মা ।—মহারাজ ! আদেশ ফিরিয়ে নিন—দোহাই মহারাজ ! আদেশ ফিরিয়ে নিন

(প্রস্থান)

রঞ্জা ।—হে ধর্ম ! জানি না তুমি কে—তোমার বিরূপ মূর্তি, তুমি যে কত শক্তিধর । তথাপি আমি তোমার পূজা করে এসেছি । তাতে যদি কিছু পুণ্য থাকে, আর সে পুণ্য যদি কিছু শক্তি থাকে, তাহলে সে শক্তি আমার এই আশ্রয়

দাতার গৃহে রেখে গেলুম । সে শক্তি রাজা ও রাণীকে শত্রু
পীড়ন হতে রক্ষা করুন । দেশে শান্তি আসুক প্রজা নির্ভয়
হোক । আশ্রয়রূপা পুণ্যময়ী ভূমি, আমার অসংখ্য অসংখ্য
প্রণাম গ্রহণ কর ।

(প্রস্থান)

ষষ্ঠ দৃশ্য ।

বনপথ ।

(নয়ন সেন)

নয়ন ।—কি ক'রলে দারকেশ্বর ! এই বিপদ সময়ে তুমিও
শত্রু হাচরণ ক'রলে ? আমাকে পরপারে পৌঁছিতে দিলে না ?
তাহ'লে কেমন ক'রে আমি ঋষিতুলা রাজার মর্ঘাদা রক্ষা
করি । আমাকে একি বিপদে ফেললে নারায়ণ ! স্ত্রীপুত্রের
শোকে জর্জরিত হয়ে, দুঃশার ভারে অবসন্ন আমি যে সময়
প্রতি মুহূর্তে মৃত্যুর প্রতীক্ষা ক'রেছি, সে সময় আমাকে একি
দিলে দয়াময় ! দিলে ত তাকে রক্ষা করবার উপায় দিলে না
কেন ? দারকেশ্বরকে বিঘ্ন স্বরূপ ক'রে আমার অধিকা যাবার
পথ রোধ ক'রলে কেন ? পথে সামান্ত মাত্র বিলম্ব হ'লে যে
আমার সমস্ত আশা নিস্কূল হবে । দারকেশ্বর পথ দাও !
কাল তুমি আমারই মত গতঘোবন শীত গ্রীষ্মের পীড়নে
ক্ষীণ ধারায় প্রবাহী । শ্রোতোহীন জীবনে আপনার হৃৎখে

আপনি আবদ্ধ, চলচ্ছক্তিহীন বৃদ্ধের স্থায় ক্ষীণকণ্ঠে কেঁদেছ ।
 আর আজ তুমি বরষার বারি সম্পাতে পুনর্যৌবন লাভ ক'রে
 হৃদয়ের উল্লাস দেখাতে উর্দ্ধ্বাসে সেই অনন্ত বারিনিধির
 অবেষণে চ'লেছ । ভগবানের কৃপা পেয়েছ, তুমি কৃপালেশ
 শূন্য হয়ো না । অহঙ্কারে এত ক্ষীত হয়ো না পথ দাও ।
 তোমার বৎসরাবর্তনের সঙ্গে এক একবার যৌবনোল্লাস ফিরে
 আসছে, কিন্তু আমার জীবনের বৎসর প্রত্যাবর্তনের সঙ্গে
 আমার অঙ্গে কেবল এক একটা মসী রেখাপাং ক'রছে ।
 তুমি আমার প্রতি করুণা কর । আমার দেহে শক্তির ক্ষীণ
 চিহ্ন আর একদিন মাত্র বিলম্ব হ'লে মুছে যাবে । আর আমি
 রঞ্জাবতীকে রক্ষা ক'রতে পারব না । দোহাই দারকেশ্বর
 পথ দাও—

(মহাপাত্র, মণিরাম ও প্রহরীগণের প্রবেশ)

মহা ।—আর পথ কেন বুড়ো শালিক ! একেবারে দারকে-
 শ্বরের কোল নাও । বাঁধ বেটাকে বাঁধ নইলে, এখনি পালাবে ।
 শালা ভারী লুকোচুরী বাজ—

(প্রহরীগণ কর্তৃক নয়ন সেনকে ধারণ)

নয়ন ।—কে তোমরা ?

মণি ।—নরাধম ! নিয়র্গ্য পিশাচ ! কাল পুলকলত্রহীন
 হ'য়েছ ; তাতেও তোমার শিক্ষা হ'ল না, তাই এতদূর এসে
 আমার সরলা ভগিনীর সর্বনাশে প্রবৃত্ত হ'য়েছ ।

নয়ন ।—কে তোমরা ?

মহা ।—আমরা ঘটক ।

নয়ন ।—তোমরা কি ক'রতে চাও !

মহা।—তোমাকে জটেবুড়ীর সঙ্গে বে দিতে চাই। জটে-
বুড়ী তোমাকে দারকেশ্বরের গর্ভে নৈকাঠের সঙ্গে প্রেম-বন্ধনে
বেঁধে রাখবে। আর বিয়ে পাগলা হ'য়ে ড্যাঙ্গায় তোমাকে
ছুটাছুটা ক'রতে হবে না। নে—চল—শালাকে নিয়ে চল
শালাকে একেবারে বুড়িয়ে না মারতে পারলে বিশ্বাস নেই।

নয়ন।—তোমরা আমাকে বাঁধতে চাও বাঁধ। আমি বাধা
দেব না। দেখ্ছ না আমি নিরস্ত্র পথ চ'লেছি। কেন? শুধু
সতী-শক্তির পরীক্ষার জন্ত। এক সতী একদিন ঘমের হাত
থেকে স্বামীকে ফিরিয়ে এনেছিল। এ জগতে এমন কেউ
নাই যে সতীর বিভীষিকা উৎপন্ন ক'রতে পারে। তোমরা
হাজার চেষ্টা কর, কিন্তু আমার বিশ্বাস কেউ তোমরা আমাকে
বিনষ্ট ক'রতে পারবে না।

মহা।—হাঃ—হাঃ—নিয়ে চল—জটেবুড়ী সতী তার
প্রাণেশ্বরের বিরহে বুড়্ বুড়ী কাটছে। চল—চল—দারকেশ্বর !
হঠাৎ ফুলে উঠে বড় মান রেখেছ বাবা !

মণি।—নইলে, পার হ'লে, শালা, বুড়ো আঙ্গুল দেখিয়ে
ছিল আর কি !

মহা।—যা—যা—বেটারা শীগ্গীর ফেল্—শীগ্গীর ফেল্ ।
এস ভাই এইবারে তোমাকে বিষ্ণুপুরের সিংহাসনে বসাবার
ব্যবস্থা করি। (উভয়ে কোলাকুলি করিতে করিতে প্রস্থান)

নেপথ্যে। দারকেশ্বর। যদি তোমার ইচ্ছা হয় আমাকে
কোলে স্থান দাও।

(দলুর প্রবেশ)

দলু —প্রভুর কর্তব্যের মতন স্বর শুনলুম না। এও কি

হ'তে পারে, এ হতভাগার ভাগ্য কি এমন সুপ্রসন্ন হবে ।
মনিবকে আর কি দেখতে পার ।

(লক্ষ্মীর প্রবেশ)

লক্ষ্মী ।—সর্দার সর্দার দেখ্ দেখ্ কতকগুলো লোক কাকে
জলে ফেলে দেবার উয্যুগ ক'রছে ।

দলু ।—সে কি ! কোথায় ? নিরীহের ওপর অত্যাচার
আমার স্মুখে ।

লক্ষ্মী ।—ফেল্লে—ফেল্লে—গেল—গেল—বিষম শ্রোত
পড়্লে আর উদ্ধার ক'রতে পার্বিনি । তোর স্মুখে যাবে—
সর্দার—শীগ্গীর যা—শীগ্গীর যা—ঐ রক্ষা কর—রক্ষা কর ।

দলু ।—তাইতো—তাইতো—

(উভয়ের প্রস্থান)

(মহাপাত্র ও মণিরামের অপর দিকে প্রবেশ)

মহা ।—এস দাদা, আর কেন, এস কোলাকুলি করি

(উভয়ের হাত)

মণি ।—চিরকালের জন্তু কিনে রাখ্লে দাদা গেলাম
ক'রে রাখ্লে ।

মহা ।—রসো এখন হ'য়েছে কি । তোমাকে আগে বিষ্ণু-
পুরের সিংহাসনে বসাই তবে আমার কাজ শেষ ।

(সৃষ্টিধরের প্রবেশ)

সৃ ।—ধর্মের খেলা ভাগ্যে তোমরা এসেছিলে হজুর ।
নইলে বুড়ো বেটা ত পালিয়েছিল । রঞ্জাবতী দেবী ত সধবা
থেকেই গেছল ।

মণি ।—চুপ কর বেটা চুপ কর ।

স্ব।—ধম্মের কল বাতাসে নড়ে ভারী ধ'রে ফেলেছ ।

মহা।—আরে বেটা চুপ কর না ।

স্ব।—কিন্তু এটা মহা শ্মশান । ভূতের উপদ্রব বড় বেশি ।
নয়ন সেন যেমন পড়বে । আর ভূত বেটারা চারিদিক থেকে
ঝেঁকা ঝেঁকা ক'রে ধ'রবে ।

মহা।—আরে মর বেটা কে শুনে ফেলবে—চুপ করনা ।

স্ব।—এখানে আর কে শুন্তে আসবে যদি শোনে ভূতে ।
তা আর ভূতে শুনে কি করবে আমি অবাগে । নিজের নাক
কেটে পরের যাত্রা ভঙ্গ করি । নইলে রঞ্জাবতী বিধবা হল ।
আমি জেনে শুনে তোমাদের সঙ্গে আয়োজ করছি । ধম্মের
খেলা চোক আছে শুধু দেখছি । হাত থাকতে লুগো—পা
থাকতে খোঁড়া ।

মণি।—আরে মল কি বেড়র বেড়র করে বক্ছিস্ ।

স্ব।—তবে গোটা ছুই ষম দূত দেখেছি—আর একটা পেত্নী ।

(প্রহরীগণের প্রবেশ)

১প্র।—হুজুর পালান—পালান—পালান ।

মণি।—সে কিরে ? পালাব কেন ?

মহা।—কি বল্ছিস্ পালাব কেন ?

১প্র।—হুজুর ভূত । আমরাও বুড়োটাকে জলে ফেলে
দিয়েছি—অমনি সে মড়াটা খাবার জন্তু ঝপাং করে জলে
পড়েছে ।

মহা।—বলিস্ কিরে—?

স্ব।—হয়েছে—ধম্মরাজের চেলারা এসেছে—দেখা দিয়েছে
বস্ ।

১ম প্র।—আজ্ঞে হজুর মিছে নয়—এমনি জোরে পড়েছে—
তো আমার গায়ে জলের ছিটে লেগেছে ।

নয়ন যেমন গুড়বে । আর বেটা বা চারিদিক থেকে ঝংকা-
য়ে কাঁ করে ধরবে ।

মহা ।—মানুষ নয়ত ?

১ম প্রজা ।—আজ্ঞে মানুষ কেমন ক'রে হবে ? তাহ'লে
ত তাকে দেখতে পেতুম ।

মহা ।—ঐ তাহ'লে ঠিক হ'য়েছে নিশ্চয় ভূত । মড়া
পেকো জলো ভূত ।

মহা ।—খড়্ খড়্ করে কিরে ?

১ম প্রজা ।—হয় ত সেই বেটা ।

মহা ।—হয় ত কেন, ঠিক । সেই জলো ভূত । বুড়ো সূড়ো
হোক রাজা ত বটে । কত ঘি মাখম খেয়ে শরীর করেছে—
তাকে খেয়ে ভূত বেটার গায়ের জ্বালা হয়েছে, তাই ছইপট্
ক'রছে । ঐ আস্ছে—

সকলে ।—ওরে বাবারে—তাইতো রে—রে—

মহা ।—ধর্মের চেলা, ধর্মের চেলা ।

(বেগে সকলের প্রশ্ৰয়)

(বলার প্রবেশ)

বলা ।—এই যে তারা কথা ক'ইলে । দোহাই মা কালী
দেবতাকে দেখিয়ে দাও । নইলে আর যে ঘরে ফিরতে পারব
না । কেও—ওখানে কেও ?—বাবার মতন কেও ?—কাছে
ব'সে—কেও ?—রাজা—রাজা—

(বলিতে বলিতে প্রশ্ৰয়)

সপ্তম দৃশ্য

—*—

দারকেশ্বর নদীতীর।

(নয়ন সেন ও দলু)



নয়ন।—একি নারায়ণ ! একি তোমার অপার করুণা—দলু
দলু—সত্যি তুই—না এখনও আমি স্বপ্ন দেখছি। দারকেশ্বরের
গভীর আবর্তে পড়েছিলুম যথার্থই কি সেখান থেকে ফিরে
এলুম।

(দলু কর্তৃক বন্ধন মোচন)

দলু।—এইবারে অনুমতি কর প্রভু !

নয়ন।—রক্ষা করেছিঁস্ এই যথেষ্ট। অনেক কাজ আছে
দলু সঙ্গে আয়।

দলু।—শুধু ! অমনি অমনি—! তোমার অপমান চক্ষে
দেখে ! বলকি প্রভু ! নাও অনুমতি কর।

নয়ন।—কিঙ্গের অনুমতি উঠে আয়। ওরা কেউ অপ-
রাধী নয়। শোকের ভার বহন ক'রতে না পেরে আমি স্বেচ্ছায়
দারকেশ্বরের গর্ভে আশ্রয় গ্রহণ করতে চলেছিলুম। নইলে—
দলু বাপ্ এই কটা কাপুরুষের হাত থেকে আমিই কি আত্মরক্ষা
করতে পারতুম না ! দলু আমার অনুরোধ রক্ষা কর—আমার
সঙ্গে চল।

দলু।—অত্যাঁয় অনুরোধ করবেন না। আমি এ অপমানের
প্রতিশোধ না নিয়ে স্থান ত্যাগ ক'রবো না। আপনি আমার
দেবতা—স্ত্রীপুত্র-শোকে জর্জরিত হ'য়ে এই বৃদ্ধ বয়সে আপনি
প্রাণের যাতনায় ঘর থেকে ছুটে বেরিয়ে এসেছেন। পাগল

ভিখারীর মতন পথে পথে বেড়াচ্ছেন । একরূপ অবস্থায় আপ-
নার ওপর অত্যাচার । আর আমি দলু সর্দার—তাই দাঁড়িয়ে
দেখবো—আমি আপনাকে রক্ষা ক'রতেই ব্যস্ত । আর একটু
মাত্র দেরি হলে আর বুকি আপনাকে উদ্ধার ক'রতে পারতুম
না । আর বুকি আপনাকে দেখতে পেতুম না । আগে তাই
আপনার উদ্ধারেই ব্যস্ত হয়েছিলুম । তাই আমি প্রতিশোধ
নিতে পারিনি । বলুন কোন পিশাচ আপনার ওপর অত্যা-
চার করেছে । আপনি অশ্বিকার ঈশ্বর বিষ্ণুপুরে এসেছেন,
বিষ্ণুপুর এ খবরটা জানতে পারবে না ।

(বলার প্রবেশ)

বলা ।—অশ্বিকার ঈশ্বর, তোমার এই দশা ! বিষ্ণুপুরে এসে
চোরের হাতে—তোমার এই অপমান ।

নয়ন ।—এ ছুঃসময়ে তুমি আর কি প্রত্যাশা কর বাপ ।
একদিনে আমার সংসার ছারখার । বিধাতার যখন একরূপ
নিষ্ঠুর বিধান তখন অপমানে লাঞ্ছনা ভোগ করব এতে আর
আশ্চর্য্য কি !

বল ।—সে আক্ষেপের কথা আর কেন বলছ রাজা—কি
বলবো—বিধাতাকে দেখতে পাই না ! দেখতে পেলে তাকে
একবার দেখে নিতুম । তোমার মত দেবতার যে লাঞ্ছনা ক'রে
আমি কখনই সে বিধাতার খাতির রাখি না ।

নয়ন ।—আমার পূর্বজন্মের কর্মভোগ বিধাতার অপরাধ কি !

বলা ।—তা থাক—কোন নচ্ছার বেটা তোমার এ দুর্দশা
করেছে বল ।

নয়ন ।—আর বলে কাজ নাই চল !

বলা ।—মা—মা—শীগ্গীর আয় মনিবকে পেয়েছি ।

লক্ষ্মী । —কই বলা, কোথায় আমাদের মনিব ?

নয়ন । —একি ? তোরা সবাই এসেছিম্ ?

দলু ।—বারো ডোমকে বারদিকে পাঠিয়েছি । লক্ষ্মী আমার সঙ্গে এসেছে । বলা অণু দিকে গেছলো সে একটু আগে বিষ্ণুপুরে এসেছে ।

লক্ষ্মী ।—ওমা একি ? মনিবের এ অবস্থা কে করলে ? আলু থালু বেশ ! সর্কাঙ্গে জল ।

দলু ।—একি দেখছিম্ ? সর্ক অঙ্গ বাঁধা ছিল । পাষণ্ড বেটারা প্রভুকে হাত পা বেঁধে জলে ফেলে দিয়েছিল ।

লক্ষ্মী ।—আর তুই বসে বসে দেখলি ? মনিবকে বাঁধা দেখতেই কি তার নেমক খেয়েছিলি ?

দলু ।—কি করি তখন আমি একা, মনিবকে বাঁচাই না পাষণ্ড বেটাটিকে ধরি ।

লক্ষ্মী ।—বেশত, এখন বসে আছিম্ কেন ? যা—হারাম-ছাদা বেটাদের মুণ্ডু ছিঁড়ে নিয়ে আয় ।

বলা ।—মনিব যে কিছু বলছে না—কে বেঁধেছে মনিব যে কিছু বলছে না ।

নয়ন ।—বলাই, শান্ত হও, লক্ষ্মী শান্ত হ—পুলকে নিবৃত্ত কর ।

লক্ষ্মী ।—কেন করব, কিসের জন্ত করব ! চক্ষের ওপর তোমার অপমান দেখে ও যদি চুপ করে থাকে, তা হলে ষে ওকে নরকে যেতে হবে । আমি মা হয়ে তা কেমন করে দেখবো !

বলা ।—মা তুই রাজার কাছে বোস্ ! বসে সেবা কর আমি

দেখি সন্ধান করে, কোন্ পাপীষ্ঠ মনিংকে জলে ফেলে দিয়েছে।

মা কালী পাপীকে ঠিক ধরিয়ে দেবে এখন।

(রঞ্জাবতীর প্রবেশ)

রঞ্জা।—কে গা তোমরা ?

নয়ন।—একি ! তুমি—তুমি রঞ্জাবতী—

সকলে।—এ্যা ! সেকি ?

রঞ্জা।—এই যে মহারাজ আছ—বেঁচে আছ ? মদনমোহন—

নয়ন।—এই দেখ রঞ্জাবতী ! আমি তোমার পুণ্যে মৃত্যু-

মুখ থেকে ফিরে এসেছি।

দলু।—কে মা তুমি ?

লক্ষ্মী।—কেমা তুমি ? আমাদের রাজার কে মা তুমি ?

রঞ্জা।—জানিনা তোমরা কে ? কিন্তু বুঝেছি—তোমরা আমার পুত্রকণ্ঠা। যদি তাই হও, তা'হলে শোন আমি অম্বিকা নগরের রাণী—গৌড়েধরের মাহাপাত্র আমার স্বামীর লাঞ্ছনা করেছে, যদি তোমরা সামান্য মাত্র শক্তিরও গর্ব কর, তা'হলে এখনি আমার এ অপমানের প্রতিশোধ নাও। যদি প্রাণ যায়—তা'হলে অনন্ত বৈকুণ্ঠে তোমাদের স্থান হোক।

লক্ষ্মী।—বলাই যদি সে পাষণ্ডের শাস্তি দিয়ে এ অপমানের শোধ নিতে পারিস্ তবেই বুঝব সার্থক তোকে গর্ভে ধরেছি। যদি না পারিস্ অমনি অমনি দারকেশ্বরে ঝাঁপ দিস্। অম্বিকা-কায় ও মুখ কখন দেখাস্নি।

(সকলের প্রস্থান)

অষ্টম দৃশ্য ।

—*—

বিষ্ণুপুর—রাজবাটী ।

(বীরমল্ল)

বীর ।—ষাদের নিয়ে রাজ্য তারাই শত্রু । তারা নিজের রাজ্যে, সংসার-বাস-সুখ অসহ্য বোধ করে, পরের হাতে ধরে দিতেছে । একি তোমার লীলা মদনমোহন ! আমি আজীবন কঠোর সাধনায় যে রাজ্য সুপ্রতিষ্ঠিত করেছি—সেই রাজ্যের ওপর অত্যাচার করছে কে ? না—ষাদের নিয়ে রাজ্য । তারা রাজ্যের একটা দাসের ওপর অভিমান করে ? সকলে এক সঙ্গে পরামর্শ করে, আত্মহত্যা ক'রতে চলছে । বা—বা—এ রহস্য ভেদ করা আমার মত বাগ্দী রাজার কৰ্ম নয়—প্রতীকার কেন করব কার জন্ত করব । বৃদ্ধ বয়সে অস্ত্র ফেলে মালা ধরেছি । এই মালায় যদি কিছু প্রতীকার থাকে ত প্রতীকার হোক । বাঃ--বাঃ-- মালার নাম কর্তেই যে মালাবতী বাগ্নভানে আমার কাছে আগমন করেছেন ।

(পদ্মাবতীর প্রবেশ)

পদ্মা ।—একি সর্বনাশ মহারাজ ! রজাকে দেখতে পাচ্ছি না কেন ?

বীর ।—দেখতে না পাওয়াই সম্ভব ।

পদ্মা ।—কোথাও ত তাকে দেখতে পাচ্ছি না । বাড়ীতে নেই বাগানে নেই কি হলো মহারাজ ! এ গভীর অন্ধকার—একা বালিকা কোথায় গেল মহারাজ ।

বীর ।—একা বালিকা এই গভীর অন্ধকারে চিরকালই ত যায় ।

পদ্মা।—কি কঠোর আদেশ করলেন মহারাজ ।

বীর।—আদেশ টা কঠোর হয়েছে বটে । বেশ তুমি বালিকাকে ফিরিয়ে আন । আমি আদেশটাকে প্রত্যাহার করে নরম ক'রে নিচ্ছি । কিছু ভেবোনা রাণী কিছু ভেবো না । এ—মদনমোহনের লীলাভূমি । লীলাময় নানা জাতীয় লীলা করেন—রঞ্জাবতীর পলায়ন—বোধ হয় সেই লীলার একটা কেঁকড়া । তুমি নিশ্চিত হও আমার মালা দাও । আমি জপের টানে তোমার রঞ্জাবতীকে টেনে আনি ।

নেপথ্যে—(কোলাহল ও বন্দুকের শব্দ)

ঐ তোমার মদনমোহন-লীলাতরঙ্গে বৃদ্ধ বৃদ্ধ উঠছে । এখনি তোমার রঞ্জাবতী—তুমি—তোমার প্রাণেশ্বর—তোমার প্রাণেশ্বরের বিষ্ণুপুর সব—ভেসে উঠবে । তুমি নিশ্চিত হও । আমার জপের মালা দাও ।

(কঞ্চুকের প্রবেশ)

কঞ্চু।—মহারাজ ! আত্মরক্ষা করুন—শত্রু শত্রু । মা আত্ম-রক্ষা করুন । গোড়েশ্বরের সৈন্য নগর আক্রমণ করেছে । বিজো-হীরা সেই সঙ্গে যোগ দিয়েছে । নগরে প্রবেশ করে এখন তারা রাজবাড়ী আক্রমণে উদ্যত । আত্মরক্ষা করুন—আত্ম-রক্ষা করুন ।

বীর।—রাণী আত্মরক্ষা করতে হবে—মালা আন—মালা আন ।

(জনৈক ভৃত্যের প্রবেশ)

ভৃত্য।—মহারাজ ! ডাকাত—ডাকাত ।

বীর।—ঐ শোন শত্রু ছিল ডাকাত হ'ল ! মালা আন মালা আন ।

পদ্মা ।—ডাকাত কি ?

ভৃত্য ।—ডাকাত—ডাকাত—মানুষ মেরে শত্রু মেরে
বাড়ীতে ঢুকছে । দেউড়ীর সব সিপাই বাধা দিতে প্রাণ
দিয়েছে—আত্মরক্ষা করুন—আত্মরক্ষা করুন

(মণিরামের বেগে প্রবেশ)

মণি ।—দিদি দিদি বাঁচাও—বাঁচাও নইলে মলুম দোহাই—
এমন কর্ম্ম আর ক'রব না । বাঁচাও ! যা বলবে তাই শুনবো—
যা ক'রতে বলবে তাই ক'রবো । নাকে খত দেব—

(বেগে মহাপাত্রের প্রবেশ)

মহা ।—দোহাই—মহারাণী রাজাকে বলে বাঁচাও ।

পদ্মা ।—এ সব কি রহস্য ?

বীর ।—তাইতো একি রহস্য ! তুমিই ত আমার রাজ্য—
আক্রমণ ক'রতে এসেছে ?

মহা ।—তাতো এসেছি বরাবরইত—সেই রকম আসছি
—কিন্তু দেউড়ীর কাছে এসে সব উণ্টে গেছে । আমরা
মানুষ জেনে লড়াই ক'রতে এসেছিলুম । কিন্তু বিষ্ণুপুরে
ভূত আছে তাতো জানতুম না । ভূতের সঙ্গে লড়াই আশা-
দের অভ্যাস নাই দোহাই মহারাজ রক্ষা করুন ।

মণি ।—ঐ কাটতে আসছে, ও দিদি ঐ কাটতে আসছে ।

(দলু ও বলার প্রবেশ)

দলু ।—ঐ—ঐ—মহাপাত্র । আর পালাতে দিস্নি
তাহ'লে আর পাবিনি । যদি নিজের মান আর প্রাণ রাখতে
চাস্ তাহ'লে এখনি ছরাস্নাকে ধ'রে ফেল । আর আমি এটাকে
ধ'রে নিয়ে যাই ।

উভয়ে।—দোহাই আশ্রিতবৎসল মহারাজ—দোহাই
মহারাজ—

পদ্মা।—রক্ষা করুন মহারাজ—হতভাগ্যকে রক্ষা করুন ।

(নয়ন সেনের প্রবেশ)

নয়ন।—হাঁ হাঁ মেরোনা—মেরোনা । উনি তোমার মায়ের
সহোদর—সম্মুখে রাজা, আমার দেবতা—প্রণাম কর । রাণী
আমার মাতৃতুল্যা প্রণাম কর ।

বীর।—রাজ্ঞী ! শত্রু ছিল, ডাকাত হ'ল । ডাকাত ছিল
মিত্র হ'ল মালা আন, মালা আন । এ সব কি ব্যাপার ভাই ?

নয়ন।—মহারাজ আপনার আশীর্বাদ । (প্রণাম করণ)

দলু।—মায়ের সহোদর—মামা—তোমার এই কাজ !
যাও চ'লে যাও এখনও পর্য্যন্ত আমার মাথা ঠিক নেই—
রাগে আমার সর্বশরীর কাঁপছে চ'লে যাও—

(মণিরামের প্রস্থান)

মহা।—দোহাই মহারাজ দোহাই মহারাজ ।

(রঞ্জাবতী ও লক্ষ্মীর প্রবেশ)

রঞ্জা।—মুক্তকর—মুক্তকর—দেবতা রাজার সম্মুখে হত্যা
করোনা—

বলা।—মা ।

লক্ষ্মী।—রাণীর আদেশ পালন কর ।

(রঞ্জাবতী ও লক্ষ্মীর বীরমল্লকে প্রণাম করণ)

দলু।—দে বেটার কাণ মোলে ছেড়ে দে ।

বলা।—(কর্ণ মর্দন করিতে করিতে) দূরহ—

(সকলের প্রস্থান)



তীয় অঙ্ক।

প্রথম—দৃশ্য।

—

গোড়—রাজপুরী।

(মহাপাত্র ও মহীপাল)

মহা।—এক বেটা বাগ্দি রাজার স্মুখে, রাজসভা মধ্যে আমি যে অপমানিত হয়ে ছিলাম। যার দেহের ধমনীতে এক বিন্দু রক্তও প্রবাহিত হয়, যে পুরুষ এত টুকু শক্তিরও গর্ব করে, সে ব্যক্তিও সেরূপ অপমান সহ্য ক'রতে পারে না। কিন্তু আমি সর্বশক্তিমান বংশধরের প্রধান মন্ত্রী হয়েও নীরবে সেই অপমান বার বৎসর সহ্য ক'রছি।

মহী।—কি ক'র্ব ভাই, তখন আমি পরাধীন, তোমার মনের অবস্থা বুঝতে পেরেও আমি কোনও প্রতীকার ক'রতে পারিনি। যতবারই বৃদ্ধ মহারাজের কাছে, আমি প্রতীকারের প্রস্তাব ক'রেছি, ততবারই তাঁর কাছে কেবল তিরস্কৃত হয়েছি।

মহা।—বলি, এখন ত আর আপনার সে অবস্থা নয়। মহারাজ পরলোক গত, আপনিই এখন সম্রাট।

মহী।—হয়েছে কি জানি, এখন আর মনের সে অবস্থা নেই। এখন আমি বিজ্ঞ হয়ে পড়েছি।

মহা।—একটু পূর্বাভাষাটা চিন্তা ক'রলেই মনের সে অবস্থা আবার ফিরে আসে মহারাজ ! সেই বিষ্ণুপুর যাবার পথে দু'টো ডোমের হাতে অপমান, আপনারও কিছু ভৃত্যের চেয়ে কম হয় নি। আপনাকেও অর্দ্ধ উলঙ্গ বেশে শিবির ছেড়ে পালাতে হ'য়েছিল।

মহী।—সে বারো বৎসর আগের কথা তুলে আর কেন নিজকে কষ্ট দাও।

মহা।—দেখুন মহারাজ, আপনার যদি আমার মত অবস্থা হ'ত। তাহ'লে আপনি কেমন ক'রে ভুলে থাকতে পারতেন বৃত্তুম। এখন আপনার শত্রুর প্রতি এ প্রকার ক্ষমা প্রদর্শন, ভৃত্যের প্রতি অত্যাচার।

মহী।—কই ভাই, তারাতো তোমাকে ষথেষ্টই অনুগ্রহ দেখিয়েছে—তুমি তাদের প্রভুর প্রাণ হরণ ক'রতে গিছলে, তারা প্রতিশোধ স্বরূপ তোমার কর্ণ স্পর্শ ক'রে ছেড়ে দিয়েছে প্রাণ ত গ্রহণ করে নি।

মহা।—প্রাণ গ্রহণ ক'রলে মহারাজকে উৎপীড়িত ক'রতে আস্তুম না। আমার প্রাণ তারা গ্রহণ ক'রলে না? তারা বুঝেছিল মানী ব্যক্তির মান প্রাণ অপেক্ষা গুরুতর, তারা বুঝেছিল একজন নীচের হস্তের অঙ্গুলি স্পর্শে, আমার কাণে যে যাতনা হবে, তার জালায় হয় আমি আত্মহত্যা ক'রব, নয় পুরুষোচিত প্রতীকারের ব্যবস্থা ক'রবো। তারা এটাও বুঝেছিল, আমার কর্ণ মর্দনে, আমার প্রভু স্বকর্মে যাতনা অনুভব ক'রবেন।

মহী।—তুমি ক'রতে চাও কি ?

মহা।—আমি ভৃত্য, আমি কি ক'র্ব্ব ? আজ যদি আমি মহাপাত্রের কাজ থেকে অপসৃত হই, তাহলে আমার আবস্থা কি ! কাল আমাকে কে চিন্বে, কে আমার কথা ভাব্বে ? তথাপি সকলে বল্বে, বর্ত্তমান গৌড়েশ্বর কে ? না ঘিনি বিষ্ণুপুরে গিয়ে কিল খেয়ে কিল চুরি ক'রেছিলেন । আমার মান অপমান দুইই সমান । মহারাজের নাম নিয়েই আমার মান । আমার মানে ঘা—আর মহারাজের মানে ঘা একই কথা । আমি শুধু মহারাজের মন্ত্রীর গৌরব রক্ষা করবার জন্তই আবেদন ক'রছি ।

মহী।—তোমার বল্বার অধিকার আছে ।

মহা।—অধিকার নেই ? আমরা কি উপযাচক হ'য়ে গৌড় থেকে বিষ্ণুপুরে লড়াই ক'রতে গিচ্ছলুম ।

মহী।—তবে কি জান, আমি এখন রাজা, সব দিক দেখে আমার এখন কাজ করা কর্তব্য ।

মহা।—তাতে কি আর সন্দেহ আছে । সব দিক দেখবেন বই কি । আপনি জ্ঞানবান, আপনি ভূত ভবিষ্যৎ আলোচনা না ক'রে কাজ করবেন কেন ? পদতলে আপনার বিশাল রাজ্য, চারিদিকে বেড়ে নব লক্ষ সৈন্ত, সম্মুখে অনন্ত আশা, রাজকোষে রাশি রাশি অর্থ, কিন্তু এততেও আপনার চেয়ে, আপনার একটা সামন্ত রাজার অন্তঃপুর আপনার অন্তঃপুরকে পরাস্ত ক'রে রেখেছে । রাজা বাস করেন বাগ্গালায়, কিন্তু রাজলক্ষ্মী আছেন অশ্বিকায় ।

মহী।—যা ব'লেছ মহাপাত্র, রঞ্জাবতীর গায় সুন্দরী যে রাজার অন্তরে নেই, সে রাজার কিছুই নেই ।

মহা।—আপনি ভূত ভবিষ্যৎ বর্তমান, সব দেখুন, উত্তর দক্ষিণ পূর্ব পশ্চিম সব দেখুন । সম্মুখে দেখুন, পশ্চাৎ দেখুন, কিন্তু কোন স্থানে রঞ্জাবতীর গায় সুন্দরী দেখতে পাবেন না । কিন্তু সেই সুন্দরী নিজের অনিচ্ছায়, একটা বৃদ্ধের কৌশলে অস্থিকায় বন্দিনী । মহারাজ, আপনি এখানে সে সেখানে । সে সুন্দরী কি সেখানে সুখী আছে মনে করেন ।

মহী।—তা কেমন ক'রে থাকবে ।

মহা।—আপনার রূপের তুলনা নাই, আপনার গুণের তুলনা নাই,—আপনার ঐশ্বর্যের তুলনা নাই, আপনি নব লক্ষ সৈন্যের অধিপতি । শুধু তাই নয়, আপনি প্রেমের রাজা—

মহী।—সমস্তায় ফেললে মহাপাত্র ! কিন্তু কি জানি বিবাহিতা স্ত্রী—

মহা।—কি বলেন মহারাজ,—বিবাহ ! কার ? রঞ্জাবতীর ? কার সঙ্গে ! (হাস্য) দান ক'রলে কে ? নিলে কে ? একটা বৃদ্ধ—শাস্ত্র জানেনা, ধর্ম বোঝে না—একটা সরলা আশ্রিতা বালিকার সম্পূর্ণ অনিচ্ছায়, তাকে আর একটা বৃদ্ধের হাতে সমর্পণ ক'রেছে । অশাস্ত্রীয় দান, তাকে কি আপনি বিবাহ ব'লতে চান মহারাজ ! আর বিবাহ যদি হয়, তাতেই কি এক বেটা বাগদীর রাজা, আর এক বেটা ডোমের রাজা এই ছ'বেটা ঘৃণিত লোকের কাছে বঞ্ছের আপনি অপমানিত হ'য়ে থাকবেন ? এত ক্ষমতা থাকতে অপরাধীর শাস্তি দেবেন না ? ভৃত্য আমি বিচারপ্রার্থী বিচার ক'রবেন না ? তা যদি না করেন, তাহ'লে দয়া ক'রে ভৃত্যকে বিদায় দিন—আমি এ মহা মান্যের

পদ ছেড়ে তিক্ষা ক'রে জীবিকা নির্বাহ করি। কিম্বা বনে যাই, বাঘ ভালুকের আশ্রয়ে বাস করি। নতুবা দেশের ভেতরে আপনার আর আমার অপমানের যে একটা ইতিহাস থেকে যাবে, মহারাজের আশ্রয়ে থেকে তা আমি সহ ক'রতে পারব না।

মহী।—বেশ, তাহ'লে দাও—অশ্বিকা রসাতলে দাও।

মহা।—অশ্বিকাকেও দেবো বিষ্ণুপুরকেও দেবো—একে একে সব দেবো। প্রথমে অশ্বিকা তারপর বিষ্ণুপুর। একটা ক'রে মারবো। কেউ না কাউকে সাহায্য করতে পারে।

মহী।—রঞ্জাবতী ! যা বলেছ মহাপাত্র, বিষ্ণুপুরে আমার সে অপমান ভোলবার নয়। আমাকে যে কণ্ঠা বাগ্দত্তা হয়েছিল, সেই কণ্ঠা, আমার একটা ভৃত্যহবারও যোগ্য নয়, এমন লোকে অপহরণ করেছে। নিমন্ত্রিত হয়ে বিষ্ণুপুর থেকে আমি কুকুরের গায় তাড়িত হয়েছি।

মহা।—মহারাজ ! সে অপমান যদি হৃদয়ে জাগিয়ে না রাখবো, তাহ'লে আমাতে মনুষ্যত্ব কই। প্রতিশোধ ! প্রতিশোধ ! প্রাণের ভেতর নিত্য প্রতিশোধ-চিন্তায় আমি জর্জরিত মহারাজ !

মহী।—আমি তোমাকে এই প্রতিশোধ নেবার সম্পূর্ণ ভার দিলুম। কারও প্রতি দয়ার লেশ দেখিয়ে না। রঞ্জাবতীকে যেমন করে পার গোড়ের অস্তঃপুরে স্থান দাও।

মহা !—যথা আজ্ঞা। যার ক্ষমতা আছে, সে চূপ ক'রে থাকবে কেন ? সুন্দরী অপহরণ বীর-ধর্ম্য। কৃষ্ণ কল্পিনী-হরণ করেছেন, ভীষ্ম একদিনে তিন তিনটে মেয়ে অপহরণ করেছেন।—

(মহীপালের প্রস্থান)

মহা ।—রাজা হয়েই গর্দভানন্দ ! একেবারে তুমি এত বিজ্ঞ হয়ে পড়েছ যে আমাকে ও উপদেশ দিতে শিখেছ । তোমার জন্মেই আমার অপমান হ'ল, আর তুমি পেঁচার মত মুগ করে আমাকে উপদেশ দিতে থাকিবে । মাছটা ধরবে, কিন্তু জল-টীতে হাত ঠেকাবে না । বটে ! তোমার বঙ্গ উৎসন্ন যাক । তোমার নব লক্ষ সৈন্ত উৎসন্ন যাক । আমার প্রতিশোধ নিতেই হবে । আমি বার বৎসর এই অপমানের যাতনা, তুষের আগুনের মত ধুঁইয়ে ধুঁইয়ে রেখেছি । এ আগুনে যদি সমস্ত বাঙ্গালা পুড়ে ছাই হয়, তাতে আমার কোন দুঃখ নেই । এই যে—এই যে—তুমি ফিরে এসেছ—কি খবর ?

(চরের প্রবেশ)

চর ।—আজ্ঞে হুজুর খবর বড় ভাল নয় । ডোম বেটারা অধিকা নগর নতুন রকমের গড়খাই দিয়ে, এমন করে ছুঁড়েছে যে প্রকাশে শত্রুর তার ভেতরে প্রবেশ করবার কোনও উপায় নাই । একজন মাত্র সৈন্ত তীর বা বন্দুক হাতে করে যদি ফটক চেপে বসে, তাহ'লে সে হাজার লোকের মোড়া নিতে পারে ।

মহা ।—বলিস্ কি ?

চর ।—হুজুর অনুসন্ধানের আমি কিছুমাত্র ক্রটি করিনি । তাতে বুঝেছি যুদ্ধ করে অধিকা জয় কিছুতেই হ'তে পারে না ।

মহা ।—তাহ'লে উপায় !

চর ।—উপায়ের মধ্যে এক কৌশল ! কিন্তু তাও যে কি রকম করে খাটান যায়, তাতো ধারণাতেই আসে না । সমস্ত ডোম আহার নিদ্রা ত্যাগ করে দিবারাত্রি অধিকায় পাহারা দিচ্ছে ।

মহা।—সমস্ত অধিকার ভেতরে এমন একবেটাও কি বিশ্বাস ঘাতক নেই—যে, তার সহায়তা অবলম্বন করি ।

চর।—ডোমেদের ভেতরেত একজনও নেই, তারা রাজাকে নারায়ণ বলেই বিশ্বাস করে । অর্থ—রাজ্য কোন প্রলোভনেই তাদের মন টলান অসম্ভব ।

মহা।—যা বলেছ নীচের ভিতরে বিশ্বাস ঘাতক মেলা বড় সক্ত, আচ্ছা লক্ষ সৈন্য দিয়ে অবরোধ ক'রেও অধিকা দখল করতে পারবো না ।

চর।—তবে পথে আসতে আসতে একটা ভরসার বিষয় দেখে এলুম । বিষ্ণুপুরের রাজা মৃত্যু-শয্যায় । মনিরাম রায়ের সৃষ্টির বলে একটা ভৃত্য আছে ; সে নয়ন সেনকে সে সংবাদ দিতে অধিকার যাচ্ছে । পথে আমার সঙ্গে দেখা । তারই মুখে শুনলুম, বিষ্ণুপুর রাজ, অধিকার রাজা ও রাণীকে বিষ্ণুপুরে যেতে অনুরোধ করেছেন ।

মহা।—বস্ তবে আর কি ! তাহ'লেত তুমি, আমার জন্তে ভাল রকমেরই শুভসংবাদ এনে উপস্থিত করেছ । অধিকাধ্বংস করবার এই ত উপযুক্ত সময় । ভাল নয়ন সেনের যে ছই ছেলে হয়েছে শুনেছি ।

চর।—আজ্ঞে তাদের মধ্যে একটা তাঁর ছেলে । আর একটা মান্দারণের রাজপুত্র । রাজা ও রাণী তাকে পুত্রস্নেহে পালন করেছেন । ছেলে দু'জনে জানে তারা ছুটি সহোদর ।

মহা।—তাহ'লে তারাও ত সঙ্গে যাবে ।

চর।—তা বলতে পারিনা হুজুর ! আমার বোধ হয় না ।

মহা।—কেন ?

চর।—দলু সর্দার তাদের বোধ হয় ছেড়ে দেবে না। রাজা বারমল্ল, তাদের একবার বিষ্ণুপুরে নিয়ে যাবার চেষ্টা করেছিলেন, কিন্তু দলু নিয়ে যেতে দেয়নি। তার বিশ্বাস ছেলে অধিকার বাইরে একবার গেলে, আর অধিকায় ফিরে আসবে না। একবার সে ছেলে ছেড়ে জগন্নাথে যাচ্ছিল, পথে বেরুতে না বেরুতে রাজা নয়ন সেন নিৰ্বংশ হয়েছিল। সেই জন্তু তারা এ ছেলেকে কিছুতেই ছেড়ে দিতে চায় না।

মহা।—হঁ ! আচ্ছা তুমি একবার নিধে সর্দারকে ডেকে দিয়ে যাও। তুমি যে সংবাদ দিয়েছ এর জন্তু যথেষ্ট তুমি পুরস্কার পাবে, যাও একবার নিধেকে ডেকে দিয়ে যাও। কিন্তু দেখ, একথা জন প্রাণীর কাছেও প্রকাশ করো না।

চর।—না হজুর ! তাকি কইতে পারি।

(চরের প্রশ্ন)

মহা।—এমন সুবিধে ত কিছুতেই ছাড়তে পারি না। পথের মাঝে কোন রকমে নয়ন সেন রঞ্জাবতীকে গ্রেপ্তার করতে পারি। অন্ততঃ ছেলে ছ'টোকেও পাই। বেটাকে নিৰ্বংশ করতে পারলে ও যথেষ্ট প্রতিহিংসা হয়—প্রাণের যাতনা যায়—বেটা যে জন্তু বৃদ্ধ বয়সে বিবাহ করেছে, তা পণ্ড হয়। তাহ'লেই আমার অপমানের শোধ। বুড়ো বেটার হুকুমেইত আমাকে লাঞ্ছনা পেতে হ'য়েছে। তার ইঙ্গিত না থাকলে, ডোমবেটার সাধ্য কি যে আমার মতন মানী ব্যক্তির কাণে হাত দেয়। উঃ ! রণচণ্ডী ! কি করে আমি এ অপমানের শোধ নিই।

(নিধি সর্দারের প্রবেশ)

নিধি।—হুজুর ! তলব করেছেন কেন ?

মহা।—এই যে নিধু এসেছে। নিধু তোমাকে একটা কাজ করতে হচ্ছে যে—

নিধি।—কি করব আজ্ঞে করুন।

মহা।—ভারী—সঙ্গীন কাজ।

নিধি।—আজ্ঞে তা না হলে নিধিকে তলব করবেন কেন ?

মহা।—এই বুঝতেই ত পেরেছ ? অতি সঙ্কোপনে,—নিঃশব্দে, কাজটী হাসিল করতে হবে। যেন পাখী পক্ষীচোড় টের না পায়। করতে পারলে লাখটাকা বকসিস্।

নিধি।—আগে হুজুম করুন। তার পর দেখুন পারি কিনা !

মহা।—তোমাঘ অশ্বিকায় যেতে হবে, গিয়ে সেখান থেকে কোনও রকমে রাজার ছেলেছ'টীকে চুরি ক'রে আন্তে হবে।

নিধি।—জ্যান্ত আন্বো, না—মেরে ফেলে আন্বো - ?

মহা।—জ্যান্ত আন্বে—জ্যান্ত আন্বে !—না—জ্যান্ত আন্বার—মেহনত পোষাবে না। তুমি মেরেই ফেলো।

নিধি।—তাহ'লে কি মেরে রেখে আসবো ?

মহা।—তাহ'লে ম'ল কিনা বুঝবো কি করে ?

নিধি। যুগু ছিড়ে নিয়ে আসবো।

মহা।—বস্—বস্ লাখটাকা—লাখটাকা—ডান হাতে যুগু দেবে, আর বাঁ হাতে টাকা নেবে।

নিধি।—আপনি নিশ্চিত হ'য়ে বসে থাকুন, যাব আর কাম করতে করে চলে আসবো !

মহা।—আর দেখ, শুনলুম নগ্নন সেন বিষ্ণুপুর আসছে। যদি সে ছেলে সঙ্গে করে নিয়ে যায় ?

নিধি । পথে পাই পথে মারবো —ঘরে পাই ঘরে মারব ।
বহা ।—বস্ বস্ লাখটাকা—লাখটাকা—তাহ'লে আর
বিলম্ব করনা ।

নিধি ।—তাহ'লে পায়ের ধুলো দিন ।

মহা ।—ইস্ আমি যেন দেখতে পাচ্ছি নৃমুণ্ডমালিনীর
মুখে লাল পড়ছে । মা আমার খাই খাই করুছেন । ভয় কি মা !
তোমার এমন উপযুক্ত সম্ভান থাকতে তোমার খাবার অভাব !
মোষ, পাঁটা গুলো খাইয়ে খাইয়ে তোমার পেটে আর অজীর্ণ
আসতে দিচ্ছিনি—এখন থেকে কেবল মাথা—মানুষের মাথা—
লাখ লাখ নরমুণ্ড—সর্বাঙ্গে ত তোমাকে দু'টী কচি ছেলের মাথা
এনে দিই—তা তুমি খাও বা গলায় পর—বস্—আমি এদিক
থেকে কোনও রকমে বুড়ো বেটাকে পথ থেকেই গ্রেপ্তার
করবার চেষ্টা করি ।

(প্রস্থান)

দ্বিতীয় দৃশ্য ।

—*—

অম্বিকা—রাজপথ ।

ডোম ও ডুমনীগণ)

১ম ডোম ।—আরে গেল সর্দার করে কি ? সবাই এসে
উপস্থিত হল, তার যে আর বার হয় না দেখতে পাই ।

১ম ডুমনী ।—রমো আগে সর্দারনী আসুক । তাদের আঠারো
মাসে বৎসর । বলবামাত্র কি তারা এসে উপস্থিত হবে ।

১ম ডো :—ধর্ম ঠাকুরের পূজো হলে তবে রাজ পুত্রুরেরা
জল খাবে।

১ম ডুমনী।—রাণী মা, রাজ পুত্রুর, ঠাকুর তলায় কখন
গিয়ে উপস্থিত হয়েছে।

১ম ডো।—ঐ আসছে রে ঐ আসছে।

(দলু ও লক্ষ্মীর প্রবেশ)

১ম ডুমনী।—কি করছিলি লক্ষ্মী ? রাণী যে অনেকক্ষণ
ঠাকুর তলায় গিয়ে উপস্থিত হয়েছে। চলে আয় চলে আয়।

লক্ষ্মী।—তোরা এগিয়ে যা ভাই আমরা যাচ্ছি। বলা
আমার শাশুড়ীকে নিয়ে আসছে। জনিস্ ত ভাই বুড়ো
মানুষ চখে দেখতে পাঁয় না—তাকে ধরে নিয়ে আসছে। এসে
পড়লো বলে; তোরা ততক্ষণ এগিয়ে যা।

১ম ডো—তবে চল্ গো সব চল।

ডুমনীগণ।— গীত।

কোন ঘাটে চান করিলে কানু গামছাটী জলে ভাসালে।

কে নিলে বসন তোর অঙ্গ হতে খুলে।

বলাই দাদার নীল বসন কে তোরে পরালে।

নীল কমল শুকাইল কেনে এমন দেহ,

পথের মাঝে ডাহিনী বুকি দৃষ্টি দিলেক কেহ ?

বুকের ওপর কাঁটার আঁচড় গিয়ে ছিলে কোন্ বনে।

পরাণ যাহু যমুনাতে আর যেওনা মেনে ॥

(লক্ষ্মী ও দলু ব্যতীত সকলের প্রস্থান)

দলু।—হাঁ লক্ষ্মী এমন দিন যে আসবে তা কি আর মনে
ছিল। সেই বার বৎসর আগে—মনে আছে লক্ষ্মী—সেই এক

যুগ পূর্বে পুরুষোত্তম যাবার পথে, যে দিন বলা উম্মাদের মত ছুটে আমাদের কাণে মর্মভেদী সেই কথা টেলে দিয়াছিল।

লক্ষ্মী।—মনে নাই ! তোর সেদিনকার মুখের ভাব এখনও পর্য্যন্ত চখে আমার জন্ জন্ করছে। যখন পথের মাঝে বসে পড়ে, আকাশপানে চেয়ে বলেছিলি, “লক্ষ্মী চারি দিকে অন্ধকার” যদিও জোর করে সে সময় আমি তোকে টেনে তুলতে গিয়েছিলুম, তবু সর্দার সত্যি কথা বলতে কি দেহে যেন আর প্রাণ ছিল না। বুক খানা হাজার খণ্ডে যেন ভেঙ্গে চূর্ণমার্ হবার উপক্রম হয়েছিল। সর্দার—সর্দার সে কি ভীষণ দিন ! উম্মাদের মতন বলা, উম্মাদের মতন তুই। চারিধারে ক্লানশূত্র, প্রাণ শূত্রের মত, যেন ভয়ে নিস্তরু—আর মাঝ খানে আমি একা অবলা, উম্মাদ তুই আমাকে ফেলে চলে এলি— উম্মাদ বলা একটু পরেই আমাকে ফেলে তোর সঙ্গে সঙ্গে চলে এল। আর আমি সেদিনকার রাত্রির সেই অন্ধকার ভেদ করে, মনে অন্ধকার বইতে বইতে—বুক গুর্ গুর্ করছে পা ঠক্ ঠক্ ক’রে, দাঁড়াবার শক্তি দিতেছে না—অস্থিকার দ্বারে এসে উপস্থিত হলাম।

দলু।—আর এসে দেখলি, ঐ সুন্দর প্রসাদ, প্রাণ ভরা
/মি/মানন্দ ভরা আকাশ ভেদী অট্টালিকা, সেন সেই গভীর অন্ধ-
/সে/কারে মাথা হেঁট করে মাটির উপরে অন্ধকার অশ্রুবিন্দু নিক্ষেপ
ক’রছে। মাথার উপরে পঁচার চীৎকার, যেন সমগ্র অস্থি-
কার পুত্রশোকাতুরা জননীর মত করুণ কণ্ঠ। এসে দেখলুম
ফটকের দোর খোলা, অন্ধকারে মুখের অন্ধকার আবৃত ক’রে
বিজ্ঞ দেওয়ান প্রাণের যাতনায় ‘রাজা’ ‘রাজা’ ক’রে ঘুরে

বেড়াচ্ছে। প্রহরী আপনার কাজ করতে ভুলে গেছে, নগরবাসী আপনার আপনার অস্তিত্ব ভুলে যে যার আপনার ঘরে পড়ে কেবল শোকের আর্তনাদ করছে। রাজা! রাজা! কোথায় আমাদের সেই বৃদ্ধ দেবতা অম্বিকার ঠাকুর নয়ন সেন। লক্ষ্মী রাজার—সন্মানে যেখানে যাই সেখানেই দেখি শোকের জ্বলন্ত উচ্ছ্বাস। ঘর যেন চিতা শয্যা, বাগান যেন শ্মশান, বন যেন মৃত্যু আবরণ। গাছে, বাতাসে, আকাশে, যেন পেত্নীর কণ্ঠের প্রতিধ্বনি—মহীধর—গুণধর—ভূধর—শ্রীধর—।

লক্ষ্মী।—সর্দার! এ আনন্দের দিনে পূর্বের কথা আর তুলিস্নে। সতীর কৃপায় পূর্ব প্রাণ আবার ফিরে এসেছে। যম যেন সাবিত্রীর টানে হাতের কবজী আলগা করেছে। বৃদ্ধ রাজার কোথা থেকে যেন যযাতীয় যৌবন ফিরে এসেছে। এমন আনন্দের দিনে সর্দার আনন্দ কর। চল আজ স্বামী স্ত্রীতে প্রাণভরে, ধর্মের পূজা করে আসি। রাণী আমাদের অপেক্ষায় আছেন! চন্দ্র সেন আর সূর্য্য সেন দুটি ভাইকে নিয়ে আমরা চরণে গড়াগড়ি খাব। চল আর দেরি করিস্ নি।

দলু।—মা রক্ষিনীর কৃপায় রাজার এ সুখ বজায় দেখে মরতে পারলে হয়।

লক্ষ্মী।—মরবার আবার সাধ ওঠে কেন?

দলু।—আরও বাঁচবার সাধ কেন লক্ষ্মী—আমাদের সুখের ভাণ্ড পূর্ণ হয়েছে। এরপর কত কি বিপদ আছে! মানে মানে যেতে পারলে ভাল হয় না?

লক্ষ্মী।—তা যা বলেচিস্! এক একবার প্রাণটা ছাঁত করে উঠে বটে।

দলু ।—ওঠে না লক্ষ্মী—যখন চন্দ্র সেন সূর্য সেন দুটী ভাই
 দু'হাত ধরে' আমার সঙ্গে সঙ্গে ঘুরে বেড়ায়, তখন মনে হয়,
 সর্গসুখ এর চেয়ে কত বেশি । মরণ যদি হয় ত এই উপযুক্ত
 সময় ।

লক্ষ্মী ।—না সর্দার ও কথা মুখে আনতে নেই মরণ কামনা
 করতে নেই ।

দলু ।—বললেই কি আর মরণ আসছে, মরণ যখন আসবে
 তখন নিজের ইচ্ছাতেই আসবে, আর মরব কি ! মুখে মরণের
 কথা বলি, কিন্তু মরণ মনে করতেও ভয় হয় । চন্দ্র সূর্য
 আমার দুটী চোক এক দণ্ড তফাত হ'লে জগৎ অন্ধকার দেখি ।
 মলে যদি বৈকুণ্ঠও লাভ হয়, সেখানে চন্দ্র সূর্যকে না দেখতে
 পেলে বৈকুণ্ঠও যে আমার ভাল লাগবে না লক্ষ্মী ! সেই জন্ত
 রাজার কথা অমান্য করেছি, কিস্কুপুরের রাজা ছেলে নিয়ে
 যেতে চাইলে, তাকেও ছেলে ছেড়ে দিই নি ! একদিন অশ্বিকা
 ছেড়ে গিছলুম, অমনি অশ্বিকা শ্মশান হয়েছিল । তাইতে
 মনে মনে সংকল্প করেছিলুম, আবার যদি কখন ভগবান দিন
 দেন, আবার যদি ভাই পাই, ত তাকে প্রাণান্তেও অশ্বিকা
 ছেড়ে যেতে দেব না । সেদিন এসেছে ভগবান তেমনিই হেসে
 মুখ চেয়ে রয়েছেন, কিন্তু এমন দিন কি থাকবে লক্ষ্মী !

লক্ষ্মী ।—যাঁর ইচ্ছায় দুঃখ তাঁরই ইচ্ছায় সুখ । যাঁর
 ইচ্ছায় রাজার ছেলে মরেছে, রাণী মরেছে, আবার তাঁরই
 ইচ্ছায় রাণী হয়েছে, ছেলেও হয়েছে । নইলে এ বয়সে যে
 রাজার ছেলে হয় একি কেউ স্বপ্নেও বিশ্বাস করেছিল । তবে
 সেই ইচ্ছাময়ের ইচ্ছার ওপর নির্ভর করে পথ চল ।

(বলাইয়ের প্রবেশ)

বলা।—বাবা বাবা ! শীগ্ৰী আয়—রাজা তোকে ডেকেছে ।

দলু।—এইত রাজার কাছ থেকে এলুম । এইত তিনি আমাকে বললেন এখন আর তোমাকে কোন প্রয়োজন নাই । তুমি পূজা স্থানে যেতে পার ।

বলা।—একবার রাজার সঙ্গে দেখা করে ঠাকুর তলার যা, বিশেষ প্রয়োজন আছে ।

লক্ষ্মী।—কি প্রয়োজন তুই কি জানিস্ নি ?

বলা।—তা জানি না । তবে বিষ্ণুপুর থেকে সৃষ্টিধর রাজার কাছে এক চিঠি এনে হাজির করেছে । তাই পড়ে তিনি আমাকে হুকুম করলেন যে, যেখানে থাকে, সেই খানে থাকে তোর বাপকে ডেকে নিয়ে আয় ।

দলু।—আচ্ছা তুই বলগে যা—আমি এখনি যাচ্ছি ।

(বলায় প্রস্থান)

(কর্মচারীর প্রবেশ)

কর্ম।—এইষে এইষে সর্দার এখানে আছ, শীগ্ৰী এসো তোমাকে মহারাজের বিশেষ প্রয়োজন আছে ।

দলু।—বিষ্ণুপুর থেকে নাকি সংবাদ এসেছে ।

কর্ম।—এইষে তুমিও জেনেছ । রাজার সঙ্গে এখনি দেখা কর বিলম্ব করো না ।

লক্ষ্মী।—সর্দার একটু বিলম্ব কর । ঠাকুর দরশনের নাম ক'রে, বেরিয়েচিস্ একটীবার প্রণাম করে যা ।

কর্ম।—তাহ'লে ছেরি করো না যাবে আর আসবে ।

(প্রস্থান)

দলু।—দেখলি লক্ষ্মী মজাটা দেখলি ? তাইতো ভাবছিলুম হঠাৎ মৃত্যু কামনা মনে উঠলো কেন ।

লক্ষ্মী।—কি—হয়েছে কি—রাজা বিষ্ণুপুর যাবে তাতে মাথায় হাত দিয়ে বসলি কেন ?

দলু।—না শুধু বিষ্ণুপুর নয়, শুধু বিষ্ণুপুর হ'লে রাজা আমাকে এত অস্থিরভাবে ডেকে পাঠাতেন না । বিপদ বোধ হয় ঘুনিয়ে এসেছে । সেই মহাপাত্রের কথা মনে আছে ত ? মহাপাত্রর যে বিষ্ণুপুরের অপমান মনে থেকে দূর করে, দিয়েছে, কান মোলাটা হজম করে, বসে আছে এটা কি তুই বিশ্বাস করিস ? তবে কেন যে সে এককাল চূপ করেছিল বলতে পারি না । লক্ষ্মী তখন যদি ছেলের ওপর কড়া হুকুম না দিতিস্ তাহ'লে বিষ্ণুপুরের গোলমান বিষ্ণুপুরেই মিটে যেতো ।

লক্ষ্মী।—খুব ক'রে ছিলুম, তোর মতন উঁচু পায়া পেয়ে মনুষ্যত্ব তো ভুলে যাই নি তাই এখন পূর্বের অবস্থা ভুলে আমাকে উপদেশ দিতে এসেছিস্ । বলি—অধর্মের কি কাজ করেছি । সম্মুখে রাজার অপমান দেখেছি—রানীর হুকুম পেয়েছি—ছেলেকে কাছে পেয়ে অপরাধীকে দণ্ড দিতে বলেছি । পাপীর শাস্তি দেবার ক্ষমতা আছে আমি চূপ ক'রে থাকবো কেন ? তবু সে রাজসভায় সবার সম্মুখে সে ছুরাআর মুণ্ড না ছিঁড়ে গুরু পাপে লঘু দণ্ড দিয়েছি । এতে ও কি আমরা ভগবানের কাছে অপরাধী । কোথাকার ভাবনা কোথায় আনলি । যা শিগগির শিগগির ঠাকুর দর্শন ক'রে, রাজা কি বলে শুনে আয় । ওমা আনন্দময়ী ! আমার স্বামীর সুখের পূর্ণভাগে আবার হঠাৎ এমন ঠুক ক'রে ঘা দিলি কেন মা ?

(লাঠি হস্তে সামুলার প্রবেশ)

সামু।—ওরে বলা পথের মাঝখানে আমাকে বসিয়ে কোথায় গেলি ? আমার কি আর সে বয়েস আছে চলতে পারি না, চোক আছে দেখতে পাই ।

লক্ষ্মী।—এই যে মা ! আমি তোমার জন্ত দাঁড়িয়ে আছি ।

সামু।—আচ্ছিস্ বো—আমি মনে করলুম তোরা মায়ে পোয়ে পরামর্শ করে আমাকে সীতে নির্কেষন দিয়ে এলি । শালা হয়েছে যেন আমার লক্ষণ দেওর । পথের মাঝখানে বসিয়ে বলে “দিদি ব’স আমি শীগগীর আসি।” তারপর কোথায় বলা আর কোথায় কে ? বসে—বসে—বসে—যখন কোমর ধরে গেল, তখন লাঠিতে ভর ক’রে উঠলুম । আমি কি সীতে গিন্নীর মত ঝাকা—যে তপোবনে পড়ে পড়ে কাঁদবো । লাঠিতে না ভর করে’ ঠক্ ঠক্ করতে করতে চলে এলুম ।

লক্ষ্মী।—মা তোমাকে এই বৃদ্ধ বয়সে বসে থাকতে দিতে পারলুম না ।

সামু।—কেন দিস্ ! আমি ত তোকে বলি—মা আমার আমি বসে থাকতে পারি না । চিরকাল বনে বনে মোউ ও গাছে ঘুরে ঘুরে মোউ ও কুড়িয়ে কাল কাটিয়েছি, গাছের ডালে বসে কত ভালুকের সঙ্গে কুস্তি করেছি, আমাকে তোরা বসিয়ে বসিয়ে মেরে ফেলিস নি । তাতো তুই গুন্‌বিনি মা কেবল বসিয়ে রেখে সেবা করবি । আমার শরীরে তা সইবে কেন ? এখন চোখে দেখতে পাই না গাছের কোন ডালটা ধরতে কোন ডাল ধরবো বলে গাছে উঠি না । তা বলে কি ঘরে বসে বসে দশ বিশ মণ কাঠ চেলাতে পারি না । তবু কি আমি

চুপ করে বসে থাকতে পারি। বলাকে কাছে বসিয়ে এক হাতে মালা জপি আর এক হাতে তোর সেই দশমণ পাথরের গোলাটা নিয়ে নাতির সঙ্গে ভাঁটা গড়াগড়ি খেলি।

লক্ষ্মী।—এস মা তোমাকে কাজ দিই। আজ হ'তে রাজপুত্র ছুটির ভার তোমাকে সমর্পণ করবো। তোমার হাতে না দিলে মা, আমি নিশ্চিত হতে পারবো না। এস মা সঙ্গে এস।

সামু।—হরি হে দীনবন্ধু!

(প্রস্থান)

(সৃষ্টীধরের প্রবেশ)

সৃষ্টী।—ধর্ম সান্নাৎকে একবার দেখতে পাই, তাহ'লে তাকে গোটা কতক মিষ্টি মিষ্টি বোল গুনিয়ে দিই। আহা গরীব বেচারি কত ভক্তি শ্রদ্ধা ক'রে তার পূজা করছে আর সান্নাৎ আমার এদিক থেকে, তাদের মাথায় মসলা মাখাচ্ছেন। ইচ্ছে একটু সুবিধে মত ঝোল বনিয়ে উদরস্থ করেন। পথে আসতে আসতে যাকে দেখেছি, তিনি যে চর তাতে আর কোনও সন্দেহ নেই। তার চাউনি দেখে, বলুনি গুনে ঠিক বুঝেছি, তিনি গোড় থেকে অশ্বিকার সন্ধান করতে আসেছেন। কবে অশ্বিকাকে রসাতলে দিতে পারবেন, তার সুযোগ খুঁজছেন সুযোগও এসেছে, বিষ্ণুপুরের রাজা মর মর এ রাজাও সেখানে চলেছেন। এই কবে রুপ করে পাত্তর সম্বন্ধী অশ্বিকায় এসে পড়ে আর কি! তার পর! যদি অশ্বিকা যায় তাতেই কি বলব ধর্মের জয়? সান্নাৎ যে আমার চোখে পড়ে না,

তা হলে তাকে একবার লাঠী মন্ত্রে গোটা কতক ধর্মশিক্ষা দিয়ে দিই ।

(ধর্ম্যানন্দের প্রবেশ)

ধর্ম ।—কি ভাই, কাকে কি শিক্ষা দিচ্ছ ?

সৃষ্টি ।—তাইত, তাইত । চেহারাটা যে কতকটা সঙ্গ-
তেরই মতন ! কে তুমি ঠাকুর ?

ধর্ম ।—আমি সর্কদ্বারী ভিক্ষুক ।

সৃষ্টি ।—ভিক্ষুক !

ধর্ম ।—আজীবন ভিক্ষাই আমার উপজীবিকা ।

সৃষ্টি ।—ভিক্ষা ! বস, সৃষ্টিধর ! তবে আর তুমি পরের
চাকরী ক'রে, ছুটো ছুটী ক'রে হাঁফিয়ে মর কেন ? এমন
সুন্দর লাভবান ব্যবসা, পরের মাথায় হাত বুলিয়ে, পরের অন্তে
উদর পূর্ণ করে, এমন উদরের আয়তন বৃদ্ধি—এমন কাজ না
করে খেটে খেটে তুমি কিনা খাটো হয়ে গেলে—বাড়তে পেলে
না ! বলত ঠাকুর কোথায় ভিক্ষে কর ।

ধর্ম ।—সর্ক দ্বারে ।

সৃষ্টি ।—কি ভিক্ষে কর ?

ধর্ম ।—যে যা শ্রদ্ধা করে দেয় । কেউ অন্ন দেয়, কেউ বস্ত্র
দেয়—কেউ ফল, জল দেয় ।

সৃষ্টি ।—বটে বটে ! ভারী সুবিধের ব্যবসা ।

ধর্ম ।—কেউ পত্রপুষ্প দেয় ।

সৃষ্টি ।—অন্ন, বস্ত্র, ফল, জলে আমার কোনও আপত্তি নেই ।
পুষ্প তাতেও আপত্তি নেই । যখন অন্ন জলে পেট খই খই
করবে, তখন নাকের কাছে পুষ্পটা ধরবার প্রয়োজন হতে

পারে। তবে পত্র নিয়ে কি করা ? ওটা ঠাকুর তুমি নিয়ে ;
খেয়ে জাবর কেটো।

ধর্ম ।—মাঝে মাঝে লাঞ্ছনাটাও পাওয়া যায়।

সৃষ্টি ।—বটে ! ভারীসুবিধের ব্যবসা ! লাঞ্ছনা ! সে আবার
কি ? লাঞ্ছনাটাকি ননী ছানার কোন রকম প্রক্রিয়া।

ধর্ম ।—ননী ছানার নয়, তবে বংশদণ্ডের একটা প্রক্রিয়া।

সৃষ্টি ।—কি ! (লাঠী তুলিয়া) এই ?

ধর্ম ।—ও রকমও আছে—গালটাও আছে, গলাধাক্কাও
আছে। গৃহস্থ বুঝে ব্যবস্থা।

সৃষ্টি ।—ও বাবা ! তাহলে অশুবিধের ব্যবসা। হয়েছে
বোঝা গেছে যাও ঠাকুর তোমার ব্যবসা তুমিই নিয়ে থাক।
আদিপর্ক ধরতে না ধরতেই একেবারে মুঘল পর্ক ধরে বসলে।
যাও কোথায় যাচ্ছ যাও কি মতলব ? ভিক্ষে না নিয়ে যাবেনা
বুঝি !

ধর্ম ।—কেউ জীবরক্ত ভিক্ষা দেয় আবার কোন কোন
মহাপুরুষ, নিজেব বুকের রক্ত ভিক্ষা দেয়।

সৃষ্টি ।—ও বাবা তাহ'লে সান্নাতইত বটে।

ধর্ম ।—কিন্তু শেষোক্ত জিনিষটাই আমার সকলের চেয়ে
প্রিয়।

সৃষ্টি ।—তাহ'লে ওই গাছ তলায় যাও ওই যে ক'বেটা
ডোম ডুমনী দেখছ, ওইখানে তোমার কমণ্ডলু পেতে বসে
থাক, পেট ভরে তোমার প্রিয় সামগ্রী পান করতে পাবে।
আমি তোমাকে বুঝেছ সান্নাত—

ধর্ম ।—বল বল খামলে কেন বল, আমাকে বন্ধ বলছ

বল। ওইটের ভিখারী আমি পথে পথে, দেশে দেশে ঘুরে বেড়াই ।

সৃষ্টি।—আমি তোমাকে বুক চিরে একটু আঁধটু দিতে পারতুম। কিন্তু তোমার কথা শুনে আমার রক্ত জল হয়ে গেছে। প্রাণ একেবারে ঠাণ্ডা—বুঝেছ? শেষে খানিকটে ঠাণ্ডা জল পেয়ে তোমার সান্নিধ্যের ধরে যাবে। কাজ নেই ঝঞ্জাটে,? ওই বড় ডুমনী আছে ওর বড় তেজ, বুক ঝাঁজাল রক্ত—ওর কাছে গিয়ে হাত পাত সুবিধে হবে।

(প্রস্থান)

ধর্ম।—হে নরদেব ! তোমাকে প্রণাম করি। তোমার জন্ম নাই, মৃত্যু নাই। ভূত ভবিষ্যৎ বর্তমান নাই, হে জন্মমৃত্যু-রহিত পুরাণ পুরুষ ! নর রূপেই তুমি আপনার অস্তিত্বের প্রতিষ্ঠা করেছ। নররূপেই তোমার পরিচয়। তুমি আশ্রয়-নিই আপনার শিক্ষাদাতা, আপনিই আপনার পূজক। তুমি কখন দৃশ্য, কখন দর্শক, কখন পালা, কখন পালক। মাতৃ-মূর্তিতে কখন তুমি সন্তানের উপর মমতা ঢেলে দাও, আবার সন্তান হয়ে প্রতিফলন মায়ের আদরের প্রতীক্ষা কর। হে নররূপী নারায়ণ ! তোমাকে কোটি কোটি প্রণাম করি।

(নৈবিদ্য হস্তে লক্ষ্মীর পুনঃ প্রবেশ)

লক্ষ্মী।—আপনি কে দেবতা ?

ধর্ম।—মা ! আমি সর্বদারী ভিক্ষুক, আমায় কিছু ভিক্ষা দাও।

লক্ষ্মী —প্রভু ! আমি যে নীচ সমাজের অধম জাতি !

ধর্ম।—তাতে কি মা! আমি যাদের কাছে ভিক্ষা করি।
তারা একজাতি তাদের নাম গৃহস্থ।

লক্ষ্মী।—ঠাকুর! ধর্মের নামে, ধর্মের কাছে, এই নৈবিদ্য
রেখেছিলুম—তিনি নীচ ব'লে বুঝি এ সামগ্রী গ্রহণ করেন
নি—আপনার পদতলে রাখলুম আপনার যা ইচ্ছা হয় তাই
করুন। (নৈবেদ্য রক্ষা)

ধর্ম।—এই আমি গ্রহণ করলুম; তোমার মনের অভিলাষ
পূর্ণ হোক।

লক্ষ্মী।—(প্রণাম করণ) (ধর্ম্মানন্দের অন্তর্দ্বন্দ্ব) কি হ'ল
একি হ'ল! একি রকম হ'ল!

(সকলের প্রশ্নান)

তৃতীয় দৃশ্য।

—*—

অম্বিকা—রাজবাটী।

(নয়ন সেন)

নয়ন।—আবার ভয় দেখাও কেন নারায়ণ! সেদিনের সে
যন্ত্রনাময় স্মৃতির পুনরুদয় কর কেন? রূপা ক'রে মরুভূমির
বক্ষে যে শস্যশ্যামল প্রদেশটির প্রতিষ্ঠা করেছ, আবার শত
স্বর্গের কিরণে তাকে দগ্ন করবার ভয় দেখাও কেন? আমি
ক্ষুদ্র অম্বিকার একটা তুচ্ছ ভূম্যধিকারী, মুষ্টিমেয় ডোম সৈন্তের
অধিপতি। যতই শক্তির গর্ভ করি, নব লক্ষ সৈন্তের অধিপতি
গৌড়েস্বরের শক্তির তুলনায় তা কত তুচ্ছ, যদিও তারা শক্তিমান
যদিও তারা প্রভু পরায়ণ, আমায় রক্ষা করবার জন্ত

যদিও তারা বহু কুণ্ডে কাঁপ দিতেও কাতর নয়,
তথাপি তারা কি গোড়েশ্বরের লক্ষ সৈন্যের সমকক্ষ
প্রতিদ্বন্দ্বী। মহাপাত্র যদি অধিকা আক্রমণ করে, তাহ'লে
আমরা কি সে আক্রমণের বেগরোধ করতে সমর্থ!
তবে কি আমার সাজান ঘরখানি আবার প্রবল ঝড়ে ভূমিসাৎ
হবে! পূর্বে কি ছিলুম' স্বরণেও আনতে সাহস করি না!
তারপর, এই বার বৎসর? মনে হয় যেন যুগব্যাপী নিদ্রার
আবরণে আমার আত্মা আবদ্ধ। কিন্তু সেই চিরঅবিচ্ছিন্না-
বস্থিত নিদ্রা শিয়রে কি মধুময় প্রাণারাম স্বপ্ন, জনার্দন! এমন
স্বপ্নের স্বপ্ন ভেঙ্গে দেবাব জন্তু ক্রকুটী কুটিল মুখ নিয়ে এ দুর্বল
রক্তকে আর ভয় দেখিয়ে না।

(রঞ্জাবতার প্রবেশ)

রঞ্জা।—মহারাজ ।

নয়ন।—কি রাণী!

রঞ্জা।—বিষ্ণুপুরের কোনও সংবাদ রেখেছেন কি?

নয়ন।—সহসা বিষ্ণুপুরের কথাটা মনে যোগে উঠলো যে?

রঞ্জা।—অনেক কাল রাজা ও রাণীকে দেখিনি,—চলুন না
দেখে আসি।

নয়ন।—যেতে আমার কোনও আপত্তি নেই। কিন্তু দলু
যদি ছেলে ছেড়ে না দেয়?

রঞ্জা।—কেন, আজ হটাৎ দলু ছেলে ছেড়ে দেবে না
কেন?

নয়ন।—যদিই না দেয়—

রঞ্জা।—তাহ'লে আমরাই যাই চলুন।

নয়ন।—আমি যেতে পারবো না।

রঞ্জা।—এই কি অধিকাপতির যোগ্য কথা হ'ল!

নয়ন।—অমানুষের যোগ্য কথা হ'ল।

রঞ্জা।—তবে দাঁড়িয়ে আছেন কেন?

নয়ন।—রাজা কাউকে কৈফিয়ৎ দেয় না।

রঞ্জা।—যে রাজা প্রজার কাছে কৈফিয়ৎ দেয় না, তার রাজত্ব সাগর গর্ভে। দোহাই মহারাজ, রাজা ও রাণীকে দেখতে চলুন।

নয়ন।—রহস্য করিনি রঞ্জাবতী! বিষ্ণুপুরে আমাকে নিয়ে যেতে চাও, ছেলে ছ'টীকে সঙ্গে দাও। এ বয়সে আমি রাজা দশরথের মতন নিজের মৃত্যু ডেকে আনতে পারি নি।

রঞ্জা।—তাহ'লে আমাকে অনুমতি করুন, আমি যাই।

নয়ন।—তোমার ইচ্ছা হয়, তুমি যেতে পার।

রঞ্জা।—তাতে বলবেনই। রাজা আপনি, ব্যবস্থা রক্ষক—আপনার মুখে একথা না শুনতে পেলে শুনবো কার কাছে। “পুত্রার্থে ক্রিয়তে ভার্য্যা”—শাস্ত্রবাক্য পালন করেছেন। আপনার অধিকার মর্যাদা রইল, বংশের মর্যাদা রইল, আর বাঁদীকে প্রয়োজন কি? দোহাই মহারাজ, রাজা ও রাণীকে দেখতে চলুন। পুত্রের মঙ্গল কামনায়, ছেলে ছ'টীকে নিয়ে ধর্মদেবের পূজা দিতে গিয়েছিলুম, কিন্তু দেবতাকে প্রণাম করতে বিভীষিকা দেখেছি। দেখলুম দেবতার পদতলে যেন রাজা ও রাণীর প্রতিবিম্ব। বিশীর্ণ মলিন মুখ পিপাসিত লোচনে ছুজনে যেন আমার পানে, আমার ছ'টা ছেলের মুখের পানে চেয়ে

আছেন ! দেখে আমার প্রাণ ব্যাকুল হয়ে উঠল। মনে কর-
লুম, এসেছি ধর্মের দ্বারে, কিন্তু এইকি আমাদের মনুষ্যোচিত
ধর্ম ! আমাদের কেবল মাত্র দেখার প্রয়াসী, আমাদের সুখী
দেখে তারা একটু সুখ ভোগ করবেন, এই তুচ্ছ প্রতিদানটুকুও
তাঁদের আমরা দিতে কাতর। মহারাজ ! আপনি গুরু—বার-
ম্বার আপনার সমক্ষে অপ্রিয় প্রসঙ্গ উত্থাপনে পাপ হয়। তথাপি
আর একবার বলি, আমার প্রাণ বলেছে রাজা ও রাণী উভয়েই
কঠিন পীড়ায় পীড়িত। শুদ্ধ তাঁরা আমাদের দেখবার জন্ত
প্রাণ ধারণ করে আছেন।

নয়ন।—প্রাণময়ী ! তোমার প্রাণ যা বলেছে, তাকি মিথ্যে
হয়। রাজা ও রাণী উভয়েই মৃত প্রায়।

রঞ্জা।—আপনি কেমন করে জানলেন মহারাজ ?

নয়ন।—বিষ্ণুপুর থেকে সৃষ্টিধর এই সংবাদ এনেছে। শুধু
তাই নয় রঞ্জা—আমরা রাজাকে ভুলে নিশ্চিন্ত আছি, কিন্তু
সেই মহাপুরুষ শয্যাশায়ী হয়েও, এ অকৃতজ্ঞদের ভুলতে পারেন
নি ! আমাদের মঙ্গল কামনা ছাড়তে পারেন নি। আমাদের
বিপদের আশঙ্কা করে, পূর্ব হ'তেই আমাদের সতর্ক ক'রে
পাঠিয়েছেন।

(দলুর প্রবেশ)

দলু।—বিষ্ণুপুরের রাজা ও রাণী আমাদের অদর্শনে
মৃতপ্রায়। তুমি কি বাপু দিন কয়েকের জন্ত চন্দ্র সেন, আর সূর্য্য
সেনকে ভিক্ষা দিতে পার না।

দলু।—ওই অনুমতিটা ক'রবেন না মহারাজ ! ছেলে ছেড়ে
দিতে পারবো না।

(লক্ষ্মীর প্রবেশ)

লক্ষ্মী।—না মহারাজ, প্রাণ থাকতে ছেলে ছেড়ে দিতে পারবোনা ।

দলু।—এ কথা ত অনেক দিন হয়ে গেছে মহারাজ ! বিষ্ণুপুরের রাজা ও রাণী, উভয়েই এখানে এসে দয়া ক'রে ত আমাকে রেহাই দিয়ে গেছেন । রাজা নিজে আমাকে বলে গেছেন, ভাই ! কারও অনুরোধে ছেলে ছুটীকে কাছ ছাড়া ক'র না ।

লক্ষ্মী।—রাজা ও রাণীকে আমরা প্রণাম করি ? কিন্তু যেখানে আমরা স্বচক্ষে মনিবের অপমান দেখেছি, সেখানে আমরা ভাই ছুটীকে কিছুতেই পাঠাতে পারি না ।

নয়ন।—কিন্তু ছেলে ছুটীকে রক্ষা ক'রবার জন্ত, রাজা তাঁদের বিষ্ণুপুরে নিয়ে যেতে, নিজে অনুরোধ ক'বে পাঠিয়েছেন ।

দলু।—কেন ?

নয়ন। তিনি লিখে পাঠিয়েছেন, গৌড়ের বৃদ্ধ রাজা দেহত্যাগ করেছেন ; তাঁর সেই নিরক্ষৌধ পুত্র এখন গৌড়েশ্বর । সে মহাপাত্রের হাতে খেলার পুতুল । মহাপাত্রই এখন বঙ্গের প্রকৃত রাজা । একপ অবস্থায় নিরাপদে আমাদের অধিকা বাসে কিছু সন্দেহ আছে । আর লিখিয়াছেন—“ভাই ননী পুতুল ছুটীকে সাবধান ! বৃদ্ধ রাজার ভয়ে মহাপাত্র এতকাল কিছুই করতে পারেনি । কিন্তু মনে ক'রনা ভাই, কুটীল মহাপাত্র বিষ্ণুপুরের সে অপমান ভুলে গেছে ।”

এই কথা লিখে তিনি ছেলে ছুঁটীকে সঙ্গে নিয়ে যেতে আদেশ ক'রেছেন ।

লক্ষ্মী ।—আমার স্বামীর শক্তিতে মহারাজে কি সন্দেহ আছে ?

নয়ন ।—ওকথা কেন বল্‌লি লক্ষ্মী ! তোর স্বামী আমার চক্ষু, আমার সন্তানদের চেয়েও অধিকতর মূল্যবান ।

রঞ্জা ।—তাতে আর সন্দেহ নেই । আমি সন্তান হারাতে পারি, কিন্তু দলুকে হারাতে পারিনি । দলু আমার হাতের নো বজায় রেখেছে ।

লক্ষ্মী ।—আমার ভাইকে আমরা রক্ষা করব, তার জ্ঞান অথ রাজার শরণাপন্ন হ'তে গেলে, আমার রাজার, আমার স্বামীর, মর্যাদা যায়, মূল্য যায়, ধর্ম যায় ।

নয়ন ।—আমাকে কিন্তু বিষ্ণুপুরে যেতেই হবে ।

দলু ।—পথে যদি বিপদ ঘটে ?

রঞ্জা ।—তাহ'লেও আমাদের যেতে হবে । যার গৃহে আজন্ম কন্যা-স্নেহে প্রতিপালিত হয়েছি, তাঁর রোগ সংবাদ শুনে আমরা ত ঘরে বসে থাকতে পারব না !

দলু ।—আপনার ইচ্ছা —আমরা তাতে কি বলব মা ।

লক্ষ্মী ।—নিষেধ করবার ক্ষমতা নেই ; ক্ষমতা থাকলে নিষেধ করতুম ।

রঞ্জা ।—আমারও ত একটা ধর্ম আছে লক্ষ্মী ।

লক্ষ্মী ।—তবে যাও রানী ।

নয়ন ।—এস রানী, যাবার সময় পুত্র ছুঁটীকে একবার আশীর্বাদ ক'রবে এস ।

(রঞ্জাবতী ও নয়ন সেনের প্রস্থান)

দলু।—কি ক'রলি লক্ষ্মী ।

লক্ষ্মী।—সর্দার ! তুই আর কোন কথা জিজ্ঞাসা করিসনি,
—তুই শুদ্ধ আমাকে ভয় দেখাসনি । আমি ক'রে ফেলেছি !
তুই আমার মর্যাদা রক্ষা কর । তুই যদি রক্ষা ক'রতে না
পারিস, তাহ'লে পৃথিবীর কেউ আমার ভাই ছ'টাকে রক্ষা
করতে পারবে না ।

দলু।—তবে চল ।

(প্রস্থান)

চতুর্থ দৃশ্য ।

—*—

বনপথ ।

(ধর্ম্মানন্দের প্রবেশ)

ধর্ম্ম।—উর্দ্ধমুখে চিরদিন 'শান্তি' 'শান্তি' ক'রে,
নারায়ণ নিত্য তোমা করেছি সন্ধান ।
চেয়েছিছু স্বর্গ পানে, চেয়েছিছু চন্দ্রে
তারকায় ; চেয়েছিছু তীক্ষ্ণ দৃষ্টে তেদি
নীলাশ্বর, ফল তার পেয়েছি যন্ত্রণা ।
দেখি নাই সম্মুখে চাহিয়া, দেখি নাই
পশ্চাতে ফিরিয়া, দেখি নাই পদ প্রান্তে,
দেখি নাই হৃদি মধ্যে বাহর বন্ধনে ।
খেলিতেছ বন উপবনে, খেলিতেছ
গৃহের প্রান্তরে, শিশু বৃদ্ধ যুবামাঝে
কে জানিত খেল অবিরাম ! আয় বাপ

আমি ভাই বলে তুমি পশ্চাতে ডেকেছ,
 'আগে চল' বলে তুমি গুরুরূপে মন্ত্র
 শিখায়েছ । শিষ্যমূর্ত্তে ধরেছ চরণ,
 প্রভু মূর্ত্তে দেখায়েছ, আরক্ত নয়ন ।
 দম্বা মূর্ত্তে ছিঁড়ে নেছ কাঞ্চনের মায়া ।
 বিষম নিন্দুক মূর্ত্তে নিত্য ধুয়ে দেছ
 মলিনতা । বিরাট বিশ্বের মাঝে ~~তুমি~~
 আপনার প্রতিষ্ঠা করিয়া, তুলেছ হে
 ব্যোমবাপী আপনার গান । নরোত্তম
 নারায়ণ বিশ্বরূপ নর, প্রণিপাত
 চরণে তোমার ।

(সৃষ্টিধরের প্রবেশ)

সৃষ্টি ।—আমারও তোমার চরণে প্রণিপাত । আমরা যদি
 নর হই, তাহ'লে বানরকে দেবতা ?

ধর্ম ।—বানরওই মানুষ । কেউ তা'রে নাচায়, কেউ তা'রে
 মেরে খায়, আবার সীতার উদ্ধার করেছে বলে, কেউ তা'রে
 ভক্তি ভাবে পূজা করে । ও যেই নর, সেই তোমার বানর ।

সৃষ্টি ।—যা বলেছ দেবতা, ওই জগুই শাস্ত্রে বলে বটে
 'বৈশাখে নরবানরাঃ ।' তা দেবতা, মানুষ তো পৃথিবী শুদ্ধ
 দখল ক'রে বললে, 'সব আমি ।' তাহ'লে গরীব ইঁদুর বেড়াল
 গুলো কি করবে !

ধর্ম ।—তারা যখন কথা কইতে শিখবে, তারাও বলবে
 'সব আমি' 'বাসুদেবঃ সর্বং ।

সৃ ।—সব আমি ! চিংড়ী মাছ ?

ধর্ম্য ।—তাও আমি ।

স্ব ।—ওবাবা, তাহ'লে খাব কি !

ধর্ম্য ।—খেতে না সাহস কর, খেয়োনা ।

স্ব ।—বেশ, এবার থেকে যখন মাছ খেতে সাধ হবে, তখন তোমার গাটা চেটে দিয়ে যাব। 'সব আমি'—কি জ্বালা ! তা হ'লে বিটলে মহাপাত্তরের বিটলেমীতে রাগ করতে পারব না। ডোম বেটাদের পাগলামী দেখে হাসতে পাবনা, তাদের যদি সর্বনাশ হয়, ত ছুঃখু করতে পারবো না ! সব আমি !

ধর্ম্য ।—'সব আমি'—কারও উপর ছুঃখ করবার নেই, রাগ করবার নেই, অভিমান করবার নেই,—সব লীলাময়ের লীলা। তবে কোথাও নিজা মোহ মায়াব আবরণে লীলা। কোথাও লীলা জাগরণে—বন্ধু ! তোমাকে আর কি বলব ! ঘাতক পিঁজরে ভেঙ্গে লীলা করে, শোকাক্ত কেঁদে লীলা করে ।

স্ব ।—দেবতা ! তবে ত বড়ই বিপদে ফেললে ! তাহ'লে আমি কি করি ?

ধর্ম্য ।—তুমি আমাকে বন্ধু বলে সম্বোধন করেছ। “যে যথা মাং প্রপদান্তে তাং স্তথৈব ভজাম্যহং । বন্ধু ! তুমি আমার পাশে থেকে লীলা দেখ ।

স্ব ।—কোথায় এলুম, কেন এলুম ! দেবতা আমায় বন্ধু বলে সম্বোধন করলে !—যাক্ ! সব লীলাখেলা যখন আমার ফুরিয়ে গেল, তখন যাক্ ।—বন্ধু, বন্ধুই সই । সংসারে খাটা বন্ধু যদিই বরাত ক্রমে মিলে গেল—তখন থাক্

বকুই বল আর যাই বল, দাস আমি, পায়ের ধূলো
দাও -- আর চোক দাও, তোমার লীলা দেখি ।—জয় ধর্মের
জয়—জয় ধর্মের জয় । কে যেন আসছে—দেবতার কাছে
মানত করে বুকি তার পূজোদিতে আসছে ।

ধর্ম ।—অস্তুরালে থেকে দেবতার লীলা দেখ ।

স্ব ।—যথা আজ্ঞা ।

(প্রস্থান)

(নিধিরামের প্রবেশ)

নিধি ।—কিছুতেই ত ফাঁক পেলুম না । সাত সাত দিন
ওং মেরে ঘুরে বেড়াচ্ছি, তবু ত ছেলে ছুটকে ধরতে পারলুম
না । চোখের উপর ছেলে ছোটো নেচে কুকুঁদে বেড়াচ্ছে কিন্তু
বেটারা সব এমন আগলে বসে আছে যে, কিছুতেই তাদের
হাতের কাছে পেলুম না ! রাত্রে চুরি করে ঘরে ঢুকলুম,
সেখানেও দেখি সজাগ পাহারা । তাহ'লে কেমন করেই
বা ধরি, কেমন করেই বা মারি ! হে ঠাকুর ! দয়া কর ছেলে-
ছুটোকে হাতে পাইয়ে দাও—আমার মান রক্ষা কর ; নৈলে
গোড়ে এ মুখ দেখাতে পারব না । বড় অহঙ্কার করে এসেছি,
দোহাই ঠাকুর ছেলেছুটোকে আমার হাতের কবজীর ভেতর
এনে দাও—তারপর আমি বুঝে নেবো ।

ধর্ম ।—কে তুমি ?

নিধি ।—তাইত, তাইত—এখানে যে এক সন্ন্যাসী দেখছি
সন্ন্যাসি কত রকমের বুজরুকি জানে, ওকে ধরতে পারলে কাজ
হ'তে পারে ।—ঠাকুর প্রণাম ।

ধর্ম ।—কি চাও ?

নিধি ।—কি চাই—চাইলে কি তুমি দেবে দেবতা ! ইচ্ছে করলে তুমি দিতে পার, কিন্তু এ অধমের প্রতি দয়া কি হবে দেবতা ! যদি কিছু চাই, তাহ'লে কি দেবে ?

ধর্ম ।—ক্ষমতা থাকলে দেবনা কেন ।

নিধি ।—তোমার আবার ক্ষমতা নেই, এওকি একটা কথা । তুমি সাধু, নারায়ণ—ইচ্ছা করলে সৃষ্টি, স্থিতি, লয় করতে পার । তুমি দয়া করলে না দিতে পার কি ?

ধর্ম ।—বেশ, কি চাই বল ।

নিধি ।—ছেলে দুটো চাইব ? না বাবা, সে কথা কইতে হয় ত চটে চিমটের বাড়ী একঘা বসিয়ে দেবে । আচ্ছা ঠাকুর আমাকে ঘুম পাড়়াবার মন্তুর বলে দিতে পার ।

ধর্ম ।—পারি

নিধি ।—তাহ'লে দয়া করে ওই মন্তুরটা আমাকে দিয়ে যাও ।

ধর্ম ।—বেশ গ্রহণ কর । আশীর্বাদ করি, তোমাতে নিদ্রা-মন্ত্রের স্ফূরণ হ'ক ।

নিধি ।—বসু—আর কি ! আর আমাকে পায় কে ! দেবতা ! প্রণাম হই—চল্লুম । আমার ভেতরে একটা অদ্ভুত শক্তি আস্ছে আমি বুঝতে পারছি । দেবতা ! একি রকম হ'ল ! আমার ভেতরে একটা আশ্চর্য্য রকমের সাহস আস্ছে সেই সঙ্গে আবার একটা বিষম ভয় আস্ছে কেন ?

ধর্ম ।—ওটা সিদ্ধ-বিদ্যার প্রভাবে । তোমার যেটাকে ইচ্ছা হৃদয়ে স্থান দিতে পার—

নিধি ।—সাহস—সাহস—আয় সাহস—না, ভয় আসে

কেন দেবতা ? দেবতা ! এই মন্ত্রে দলু সর্দারকে ঘুম পাড়াতে পারবো ?

ধর্ম্য ।—পারবে ।

নিধি ।—বস্, তবে আর কি ! আর যে যেখানে থাক্ তাদের নিধিরাম ভয় করে না। আয় সাহস চলে আয়।
দেবতা ! প্রণাম—আয় সাহস চলে আয় ।

(প্রশ্নান)

(সৃষ্টিধরের প্রবেশ)

স্ব ।—একি হ'ল দেবতা ! লোকটা সিদ্ধ-মন্ত্র পেলে, ত ফল্বে কি না পরীক্ষা না করেই চলে গেল ।

ধর্ম্য ।—বিশ্বাস, সৃষ্টিধর বিশ্বাস । বিশ্বাসেই ধর্মের অস্তিত্ব ।

স্ব ।—ও ব্যক্তি কি উদ্দেশ্যে এই মন্ত্র সিদ্ধির কামনা করলে ?

ধর্ম্য ।—ওর ইচ্ছা, রাজার দুটা সন্তানকে অপহরণ করবে । তা দলু কিম্বা তার সহচরেরা জেগে থাকলে ত পারবে না তাই ও ব্যক্তি সিদ্ধ-বিদ্যার প্রার্থনা করলে ।

স্ব ।—তা আঁটকুড়ীর বেটা মাথা ঘুরিয়ে নাক দেখলে কেন ? একেবারেইত ছেলে দুটোকে চাইতে পারত ।

ধর্ম্য ।—ওর অদৃষ্ট ।

স্ব ।—বুঝেছি, বেটা নিজের মৃত্যুকে নিজে ডেকে আনলে, আবার কে আসে ? লক্ষ্মী না ?

(প্রশ্নান)

(লক্ষ্মীর প্রবেশ)

লক্ষ্মী ।—যদিই দয়া করে মেয়েকে দেখা দিলে, তখন আবার মিলিয়ে গেলে কেন, নারায়ণ দেখা দাও—হেঁ ধর্ম ! তুমি ভিন্ন যে আমাদের আর কেউ নেই । তুমি বলেছ ইচ্ছা অভিনাস পূর্ণ হবে কিন্তু কি অভিনাস ? আমি কি চাই ! স্মৃথের বাসনা শক্র এসে মণিবের রাজ্য দখল করবার ভয় দেখাচ্ছে । এলে কি করব ? কাকে বাঁচাব—মাথার উপর সোয়ামী, পায়ের কাছে পুল, দুই পাশে চন্দ্র সেন, আর সূর্য্য সেন—কি করি !—কি চাই !—কি চাইতে হবে, আমি যে কিছুই বুঝতে পারছি না । নারায়ণ ! বলে দাও ঠাকুর !

ধর্ম ।—কেও ?

লক্ষ্মী ।—য্যা—ঠাকুর ! ঠাকুর !

ধর্ম ।—এ গভীর রজনীতে এখানে কেন লক্ষ্মী ?

লক্ষ্মী ।—ঠাকুর ! পায়ে ঠেলে চলে এলেন ?

ধর্ম ।—কেন মা ! তোমার শক্রার দানে যে আমি পরম পরিতৃপ্ত হয়ে চলে এলাম ।

লক্ষ্মী ।—তোমার সামগ্রী তুমি নিলে তাতে আবার দান কি ঠাকুর !

ধর্ম । তার পর ? এ গভীর রজনীতে একাকিনী এ বন-পথে বিচরণ করছ কেন মা ?

লক্ষ্মী ।—আপনাকেই খুঁজে বেড়াচ্ছি ।

ধর্ম ।—এ ভিখারীকে আবার স্মরণ করেছ কেন মা ? আবার কি কিছু ভিক্ষা দিবে মানস করেছ ?

লক্ষ্মী ।—ভিক্ষা ! আবার ভিক্ষা ! আমি ডোমের মেয়ে । আমার কাছে ভিক্ষা ! কেন ঠাকুর বারে বারে লজ্জা দাও ।—

ঠাকুর দীন রমণী আমি, বিপদে পড়ে তোমার কাছে এসেছি ।

ঠাকুর আমাকে কিছু ভিক্ষা দাও ।

ধর্ম্য ।—বেশ, কি চাও মা ! বল ।

লক্ষ্মী ।—কি চাই—কি চাই—আবার আমি কি চাই !

দেবতা দয়া করে আমার সোয়ামীর মান রক্ষা কর ।

ধর্ম্য ।—তথাস্তু ।

(লক্ষ্মীর প্রণাম ও প্রস্থান)

ধর্ম্য ।—যাও মা সাধ্বী । নিজের অজ্ঞাত সারে, জীবনের একটা পথে পদার্পণ করে, সরল বিশ্বাসে ধর্মের উপর নির্ভর করে পথ চলেছো । সে পথে কত বিঘ্ন, কত বিপদ ! কত নর-শাদ্দুল লোলুপ দৃষ্টিতে, পথপার্শ্বের উপবন আশ্রয় করে তোমার পানে চেয়ে আছে । তবু যাও একপদ একপদ করে, তোমার ধর্ম্য পথে অগ্রসর হও । শাদ্দুল তার নিজের ধর্ম্য-পালন করে, তুমিও তোমার নিজের ধর্ম্য পালন কর ।

(সৃষ্টিধরের প্রবেশ)

সৃষ্টি ।—দেবতা আমি আবার একটা প্রণাম করি ।

ধর্ম্য ।—কিছু চাও ?

সৃষ্টি ।—কি, আমি বিষ্ণুপুরের সাড়ে বারো গণ্ডী—
আমি কি চাই ! আমি কি ভিখারী !

ধর্ম্য ।—ভিখারী না হ'লে কি চাইতে নেই । রাজা যে
প্রজার কাছে রাজস্ব ভিক্ষা করে ।

সৃষ্টি ।—বটে বটে ! তাহ'লে দেবতা আমি তোমাকে চাই ।
যখন তোমাকে দেখতে চাইবো তখন দেখা দিয়ো ।

ধর্ম্য ।—তথাস্তু ।

সৃষ্টি ।—তাহ'লে তুমি এখন যেখানে ইচ্ছা যেতে পার ।
(ধর্ম্মানন্দের প্রশ্ন) দেবতা ত চলে গেল । বোকা দেবতা
আমাকে যে বর দিয়ে গেল, তার মজাটা ত জানতে পারলেম
না ! থাক্ এখন আর জ্বালাতন করছি নি । শেষে ভয় পেয়ে
বসবে । থাক্ না একবার হয়ে যাক্ । ও দেবতা ! (ধর্ম্মা-
নন্দের প্রবেশ) বেশ বেশ চলে যাও—(ধর্ম্মানন্দের প্রশ্ন)—
ও দেবতা ! (ধর্ম্মানন্দের পুনঃ প্রবেশ)—কি ! আছ কেমন ?

ধর্ম্ম ।—ডাকলে কেন ?

সৃষ্টি ।—কষ্ট হচ্ছে—আচ্ছা যাও যাও (ধর্ম্মানন্দের প্রশ্ন)
না আর ডাকবো না । একশো বার ডাকলে রেগে যাবে ।—
তবু আর একবার ও দেবতা !—(নেপথ্যে বিকটশব্দ) ও
বাবা ! ও বাবা !—একি মূর্ত্তি । (ধর্ম্মানন্দের প্রবেশ) ও দেবতা ।
রুদ্র মূর্ত্তি দেখিয়ে ভয় দেখাও কেন দেবতা ! তোমায় যে ছাড়তে
পারছি নি—আর একটা প্রণাম নিয়ে যাও । (প্রণাম)

পঞ্চম দৃশ্য ।

—*—

অম্বিকা—ভূর্গ মধ্যস্থ উদ্যান ।

(চন্দ্র সেন ও সূর্য্য সেন)

গীত ।

এমন মধুর দিবসে মধুর কানন দেশে ।

কুঞ্জয়ে কোকিল ভরি নিকুঞ্জ, বিবিধ মধুর কুসুম পুঞ্জ,

বিতরে সুবাস বাতাসে ॥

মধুময় প্রাণে, মধুর পবনে, মধুর জলদ ভাসে ।

মধুলুটী, মোরা পাখী ছুটী বেড়াই ভেসে ভেসে ॥

(সামুলার প্রবেশ)

সামুলা ।—দেখ বাবা ! আমি একবার রাজ রাণীকে দেখে আসবো । তারা কালীর মন্দিরে তোমাদের জন্যে পূজা দিতে গেছে । একটু খানি এইখানে খেলা করে বেড়াও । আমি মায়ের চরণামৃত নিয়ে আসি । ততক্ষণ আমি একজনকে তোমাদের আগলাতে রেখে যাচ্ছি । দেখা যেন এায়গ । ছেড়ে কোথাও য়েয়ো না ।

চন্দ্র ।—না তুই যা ।

সূর্য্য ।—বাবা ! বুড়ী গেল নাত বাঁচা গেল । বেটার জালায় কোন দিকে চাইবার ও যো নেই ! হাঁ দাদা ! বাবা ও মা কোথায় যাবেন ?

চন্দ্র ।—মা বল্লেন, বিষ্ণুপুরে যাবেন ।

সূর্য্য ।—তা আমরা যাবনা ?

চন্দ্র ।—কই মাতো আমাদের যাবার কথা বল্লেন না ।

সূর্য্য ।—তবেই আর আমাদের মামার বাড়ী দেখা হইল ।

(সৃষ্টিধরের প্রবেশ)

সৃষ্টি ।—দরকার কি বিষ্ণুপুরে গিয়ে মামার বাড়ী দেখবার দরকার কি ? মামার বাড়ী দেখতে চাও, এইখান থেকেই তা দেখিয়ে দিতে পারি ।

উভয়ে ।—কেমন করে, কেমন করে ?

সৃষ্টি ।—তোমরা কি মামার বাড়ী দেখবার জন্য বড়ই কাতর ?

চন্দ্র ।—হাঁ ভাই, বড়ই কাতর ।

সূর্য্য ।—দেখ ভাই, আমরা মাসীকে দেখেছি, মেসোকে দেখেছি ; কিন্তু ভাই বিষ্ণুপুর ও দেখলুম না, মামাকেও দেখলুম না ।

সৃষ্টি ।—বড় ছঃখু ?

উভয়ে ।—বড় ছঃখ ভাই, বড় ছঃখ ।

সৃষ্টি ।—এস ভাই, তোমাদের ছঃখের নিবারণ করি । তোমাদের ছ'টী ভাইকে একেবারে মামার বাড়ী দেখিয়ে দিই ।

চন্দ্র ।—কেমন ক'রে দেখিয়ে দেবে দাও না ভাই !

সৃষ্টি ।—এই যে দিচ্ছি ভাই ! নাও ছ'জনে এইখানে শোও । শুয়ে আকাশ পানে চেয়ে থাকবে । আর আমি অমনি তোমাদের গলা টিপে ধরবো ।

সূর্য্য ।—তাহ'লে যে চোক কপালে উঠে যাবে !

সৃষ্টি ।—তাইত উঠবে । যেমন একটু একটু চোক উঠতে থাকবে, আর অমনি মামার বাড়ী এক পা এক পা এগিয়ে আসতে থাকবে ।

সূর্য্য ।—হাঁ ভাই ! তোমার মামার বাড়ী আছে ?

সৃষ্টি ।—কেন—কেন ?

সূর্য্য ।—তাহ'লে আমরা ছ'ভাইয়ে তোমাকে সেখানে পাঠিয়ে দিই ।

সৃষ্টি ।—বটে বটে ! তাহ'লে গুরুর বিছোটা মেরে দিয়েছে । তাহ'লে চুপ চাপ্ ক'রে বসে থাক । বুড়ী আমাকে তোমাদের আগলাতে বলে গেছে ।

সূর্য্য ।—এস দাদা ! তাহ'লে তোমাকে নিয়ে আমরা গান করি ।

স্ব ।—না, না, তা কর'না—গলা ভেঙ্গে যাবে ।

চন্দ্র ।—তবে আমরা কি করবো ?

স্ব ।—কথা কয়ো না, কথা কয়োনা—দম বন্ধ হবে ।

সূর্য্য ।—তবে এস দাদা আমরা নৃত্য করি ।

স্ব ।—হাঁ, হাঁ—পা ভেঙ্গে যাবে ।

চন্দ্র ।—আরে গেল যা, তাহ'লে আমরা কি করব ?

স্ব ।—চটো না চটো না—মাথা ধরবে ।

সূর্য্য ।—এস দাদা, তাহ'লে ফুল তুলি ।

স্ব ।—হাঁ হাঁ হাতে কাঁটা ফুটবে ।

সূর্য্য ।—বেশ তবে গাছের ফুল গাছে থাক্, আমরা শুঁকি ।

স্ব ।—হাঁ হাঁ—নাকে পোকা ঢুকবে ।

চন্দ্র ।—বেশ তবে বেদীর ওপর একটু বসি ।

স্ব ।—হাঁ হাঁ—রদুর লেগে ননীর দেহ গলে যাবে ।

সূর্য্য ।—বেশ তবে পাথরের আড়ালে ছাওয়ায় একটু বসি ।

স্ব ।—হাঁ হাঁ ঠাণ্ডা লেগে সর্দি হবে ।

চন্দ্র ।—ও বাবা ! এর চেয়ে দলু দাদা ছিল ভাল ।

সূর্য্য ।—তাহ'লে দুই ভাইয়ে তোমাকে ছদিক থেকে দু'হাত ধরে, একটু টানাটানি করি ।

চন্দ্র ।—বেশ তাই ভাল —

বালকদ্বয়— গীত ।

আমরা অতিথ পেয়েছি ঘরে ।

হাতে পেয়ে এমন রতন ছাড়বো কেমন করে ।

বসিয়ে কাছে দেব তোমা'য় আদর ভারে ভারে ।

গেভে দেব ননী মাগম, পেট ফুলে যেই হবে যখন,

ভান্নিয়ে দেব তোমা'য় তখন স্বীর সাগরের পারে ॥

স্ব।—এই এই ।

স্বর্ঘ্য।—টেনো না, টেনো না—হাতে ব্যথা হবে ।

স্ব।—এই এই—ও বুড়ী ও বুড়ী ।

উভয়।—চাঁচিয়ো না—চাঁচিয়ো না—কাণে তালা ধরবে ।

(সামুলার প্রবেশ)

বুড়ী।—ছি ! এ তোমরা কি করছ ! নাও চলে এস রাজা
ও রাণী বিষ্ণুপুরে যাচ্ছেন, তোমাদের একবার দেখে যাবেন ।

(সৃষ্টী ব্যতীত সকলের প্রস্থান)

স্ব।—ও বাবা ! এষে দেখছি এক জোড়া কলির অহী-
রাবণ । ছুটী লোহায় ভাঁটা ! তাহলে ত দেখছি ; বুড়ী মানুষ
খুন করতে পারে । এই ছেলেদের আমাকে আগলাতে বলে
গেছে ! কিন্তু দলু সর্দার করেছে কি ! বিপদে আপদে পড়লে
যাতে আত্মরক্ষা করতে পারে, তাই ছেলে ছুটীকে কুস্তি শিখিয়ে
ছুটী বাঁটুল ক'রে তুলেছে । মাও ত প্রাণধরে ছেলেকে এই রকম
কুস্তি শিখতে দিয়েছে । বাঙ্গালী মায়ের হ'লকি ! বাঙ্গালী মা
ছেলেকে ঘরে কাপড় চাপা দিয়ে ঢেকে রাখবে । ছুটতে দেবে
না, সাঁতার শিখতে দেবে না, গাছে উঠতে দেবে না, কাঁপ
খেতে দেবে না । বাঙ্গালী ছেলের গায়ে টুকি মারলে রক্ত
পড়বে, পথে বেরলে নদীর পুতুল কাণে ঠুকরে খেয়ে ফেলবে ।
এমন ছেলে না হ'লে, বাঙ্গালী ছেলে ! আর এমন মা না হ'লে
বাঙ্গালী মা ! এ রঞ্জাবতী মা করলে কি ! বাঙ্গালার জল হাও-
য়ায় থেকেও রাজপুত্নী হয়ে গেল । না, দেখে ফুর্তি হ'ল না ।
কিন্তু এমন সুলক্ষণ শক্তিমান সন্তান এই সন্তান নিয়ে রক্ত

নদীর প্রবাহ ! হাঁ ঠাকুর ! এ তোমার কি রকম লীলা ! সমস্ত মানুষের প্রাণ একাধার ক'রে, তাতে শুধু দয়ার রাশি ঢেলে দিলে না কেন ?

(ধর্ম্মানন্দের প্রবেশ)

ধর্ম্ম ।—সৃষ্টিধর !

সৃ ।—ও বাবা ! তাইত কি করেছি ! অশ্রুমনস্ক—দেবতাকে স্মরণ করে ফেলেছি ! হাতে ও কি দেবতা ?

ধর্ম্ম ।—নরমেধ যজ্ঞের লীলা হবে, তাই পূর্ব্বাহ্নে কিছু কুশ সংগ্রহ ক'রে রাখছি ।

সৃ ।—আহা দেবতার আমার কি ধর্ম্মনিষ্ঠা ! কি দয়া !

ধর্ম্ম ।—সৃষ্টিধর ! এই দয়াতেই ধরণীর প্রতিষ্ঠা । যবু-কৈটভ বিনষ্ট হয়েছিল, তা'র মেদেই পৃথিবী সৃষ্ট হয়েছে । সেই জন্মই এর নাম মেদিনী ।

সৃষ্টি ।—বটে বটে ! তবে আর নিরিমিষ রেখেছ কি ! ডুবিয়ে ফেল—মেদিনী ডুবিয়ে ফেল ।—

(সকলের প্রস্থান)

ষষ্ঠ দৃশ্য ।

—*—

অম্বিকা—রাজবাটী ।

(মণিরাম)

মণি ।—অম্বিকায় এসে এ আমি কি দেখলুম ! দুই দুই সোণার পুতুল, দুটা অশ্বিনীকুমার—রঞ্জাবতীর দুটা সন্তান অম্বিকার রাজপথে রূপ ছড়িয়ে চলে যাচ্ছে । হে ধর্ম্ম ! ধর্ম্ম

তোমার মহিমা ! আজ তুমি পতিব্রতা সতীর ঘরে ছুটি পুণ্য
প্রদীপ পাঠিয়ে তার পবিত্র ঘর আলো ক'রে দিয়েছো। আর
আমি কিনা নয়ন সেনকে মেরে রঞ্জাবতীকে বিধবা করতে গিয়ে
ছিলেম, আমি কিনা এই রত্নের ধ্বংসে বন্ধ পরিকর হয়ে ছিলুম,
বিধির নির্বন্ধে ঘা দিতে গিয়েছিলুম। মদনমোহনের ঘটকালী
আমি ভাঙ্গতে পারবো কেন ?

রঞ্জাবতী হ'তে অশ্বিকার বংশ প্রতিষ্ঠা হবে—মদনমোহনের
ইচ্ছা। সে ইচ্ছায় বাধা দিতে সম্বন্ধ আমি আরো দৃঢ় করে
দিয়েছি, রঞ্জাবতীর স্বামী সন্মিলনের পথ সুগম করেছি।
লাভের মধ্যে শৃগালদষ্ট জলাতঙ্ক রোগীর গ্রায় নিজের অঙ্গ
দংশনে ছিন্ন ভিন্ন করেছি। অনুতাপ—অনুতাপ। আজ
আমি কোথায় গর্কের সহিত অশ্বিকায় প্রবেশ ক'রে ভাগিনেয়
ছুটীকে কোলে করব, না তাদের কাছে এখন অগ্রসর হ'তেই
সক্ষুচিত হচ্ছি। অনুতাপ—অনুতাপ।

(রঞ্জাবতীর প্রবেশ)

রঞ্জা।—বিষ্ণুপুর থেকে কে আমার সঙ্গে দেখা করতে
এসেছে ?

মণি।—রঞ্জাবতী !

রঞ্জা।—কেও দাদা ! দাদা ! আপনি ! (প্রণাম) তা
দেবীমন্দিরে না প্রবেশ করে এখানে কেন দাদা !

মণি।—আমি নরাধম দেবীমন্দিরে প্রবেশের যোগ্য নয়,
তোমার নাম গ্রহণের যোগ্য নই। রঞ্জাবতী ! আমি আত্ম-
ঘাতী। আমি নিঃসন্তান, ভাগিনেয় বধে নিজের পিণ্ডলোপ
হেতে উদ্ধত হয়েছিলুম।

রঞ্জা ।—সে কি দাদা ! আপনার আশীর্বাদেই আমার সৌভাগ্য । আপনি আমাকে ভাগ্যবতী দেখবার জন্মই সে কার্য করেছিলেন, অসহুদ্দেশে ত করেন নি । আশুন, দেবী-মন্দিরে মাতৃদর্শন করুন । আমরা শুভযাত্রার আয়োজন করছি ।

মণি ।—আগে তোমাদের ভালয় ভালয় বিষ্ণুপুর নিয়ে যাই, তার পর এসে দেবী দর্শন ।

রঞ্জা ।—তাহলে অপেক্ষা করুন, আমি রাজাকে নিয়ে আসি । কিন্তু দাদা ! আপনাকে অনুরোধ করি, পুত্র দুটিকে সঙ্গে নেবার প্রস্তাব করবেন না ।

মণি ।—কেন ? রাজা যে সেই দুটিকেই আগে পাঠিয়ে দেবার ইচ্ছে করেছেন ! যেটা মান্দারণের রাজপুত্র সেটাকে না হয় রেখে যেতে পার ।

রঞ্জা ।—ও কথা মুখে আনবেন না দাদা ! এখানে মান্দারণের রাজপুত্র নেই । সে জানে আমিই তার মা—সে আমার জ্যেষ্ঠ পুত্র ।

মণি ।—এই গুণেই রঞ্জাবতী তুমি মদনমোহনের পূর্ণ রূপায় অধিকারিণী । এই গুণেই তুমি আজ উমারাগীর আয়তি নিয়ে মৃত্যুঞ্জয় বিশেষ্বরের সঙ্গসুখভোগ করছ । আশীর্বাদ করি তোমার আয়তি অটুট থাক ।

রঞ্জা ।—কিন্তু দাদা ! ছেলেয়া যখন আসবে—

মণি ।—বুঝেছি রঞ্জাবতী, তুমি ভয় পাচ্ছ আমি বালকের কাছে তার জন্ম-রহস্য প্রকাশ করবো ? ভয় নেই—যতই নরাধম হই, মত্ন মাতঙ্গের ভীম গুণ হতে রক্ষা করে, করুণাময়ী !

তোমার বাৎসল্য রসে পুষ্ট হবার জন্ত রাজা যে শিশু-তরুটীকে তোমারই স্নেহের উত্তানে রোপন করেছেন, আমি তার মূল-চ্ছেদ করতে সাহস করি না। যাও, তুমি রাজাকে যতশীঘ্র পার, নিয়ে এসো।

(রঞ্জাবতীর প্রস্থান ও সৃষ্টিধরের প্রবেশ)

সৃষ্টি।—এই যে হুজুর এসেছো। জানি হুজুর আসবে—
আমাকে এক দণ্ড ছেড়ে থাকতে পারবে না জানি।

মণি।—তুই বেটা কি? বল দেখি—

সৃষ্টি।—আমি বেটা বিষ্ণুপুরের সাড়ে বার গণ্ডী সৃষ্টিধর।

মণি।—চোপরাও বেটা—

সৃষ্টি।—আচ্ছা চুপ।

মণি।—তিন দিন আগে রাজা তোকে এদের নিয়ে যেতে হুকুম করেছেন, আর এখানে এসে বেটা তুমি অমূল্য সময় নষ্ট করছিস্।

সৃষ্টি।—সময় নষ্ট করবেন না—কথা কয়ে অমূল্য সময় নষ্ট করবেন না।

মণি।—দূর বেটা আহাম্মোক—সময় আগে থাকতে নষ্ট করে, এখন নষ্ট করবেন না। দেরি ক'রে কি অনিষ্ট করেছিস্, তাকি বুঝতে পেরেছিস্ বেটা!

সৃষ্টি।—বড় সময় নষ্ট হচ্ছে, অমূল্য সময় সব চলে যাচ্ছে।

মণি।—বেরো বেটা আমার স্তমুখ থেকে।

(নয়ন সেনের প্রবেশ)

নয়ন।—কেও বিষ্ণুপুরের সেনাপতি! আপনি!

(পরস্পর নমস্কার ও আলিঙ্গন)

মণি।—মহারাজ ! অকৃতজ্ঞ নরাদম আমি, কিন্তু কমা প্রার্থনা করি এমন সময় নেই । মহারাজ বিষ্ণুপুর যাবার জন্ত এখনি প্রস্তুত নাহ'লে আর বোধ হয় রাজাকে দেখতে পাবেন না । এই মহারাজের পত্র পাঠ করুন তিনি এই মুখটাকে এত করে বুঝিয়ে বলেছেন—

স্ব।—সময় নষ্ট—সময় নষ্ট হচ্ছে !

নয়ন।—আপনার আশীর্বাদেই আমার আবার সোণার সংসারের প্রতিষ্ঠা । আসুন সঙ্গে আসুন, আপনার ভাগিনেয়ের গৃহে পদধূলি দিয়ে তার গৃহ পবিত্র করুন ।

(প্রস্থান)

সপ্তম দৃশ্য ।

—*—

অম্বিকা—রক্ষিণীদেবীর মন্দির ।

(দলু, লক্ষ্মী, সূর্যাসেন ও চন্দ্রসেন)

দলু।—লক্ষ্মী ! মাতো পায়ে ফুল নিলে না ?

লক্ষ্মী।—তা'হলে কি করলুম সরদার ? জেদ করে সন্তান পরে রাখলেম—কি করলুম সর্দার ? শেষকালে স্বামী পুত্রকে কি বিপদগ্রস্ত করলুম ?

দলু।—আমার ওপর দিয়ে যদি বিপদ আপদ চলে যায় তাহলে আর আমাদের পায় কে লক্ষ্মী ! মৃত্যু ! আমাদের প্রাণ দিয়ে যদি মনিবের মান বজায় রাখতে পারি, সর্বস্ব

মায়ের পায়ে অঞ্জলি দিয়ে যদি চন্দ্র, সূর্য্যের, প্রাণ পাই তাহলে আমাদের তুল্য ভাগ্যবান কে ? নিচ ডোমের অপবিত্র মাথা যদি মায়ের পূজায় লাগে, তাহ'লে মা রক্ষিণী আমার ষেখানে যে আছে সবার মাথা নিয়ে ভাই ছুটীকে বাঁচিয়ে রাখ ! সাবধান লক্ষ্মী ! একবার যা বলেছিল আর যেন সে কথা ফিরিয়ে নিস্নি, রাজা তাহ'লে মনে করবে যে এত দিন পরে দলুর ভেতরে ভয় প্রবেশ করেছে । লক্ষ্মী ! তাহলে জীবন মরণে প্রভেদ থাকবে না, ছেলে ধরে আছি সু ধরে থাক, চন্দ্র, সূর্য্যের অদর্শনে আর মৃত্যুতে কত প্রভেদ, লক্ষ্মী ! ছেলে ছুটীকে বুকে পুরে ধরে রাখ—ঐ রাজা আসছে

(নয়ন সেন মণিরাম ও রঞ্জা)

মণি ।—সরদার ! বৃদ্ধ রাজা মরণ কালে তোমাদের ও দেখতে চেয়েছেন ।

দলু ।—কি বলব হুজুর, যতদিন বেঁচে থাকবো ততদিন আর অস্বিকার বাইরে পা দেব না প্রতিজ্ঞা করেছি, আবার সত্যভঙ্গ করে নরকে যাব, বিড়াল কুকুর হয়ে ফিরে আসবো ?

লক্ষ্মী ।—রাজাকে আমরা নারায়ণ বলেই জানি তাঁর শ্রী-চরণে যদি আমাদের ভক্তি থাকে তাহ'লে এখানে থেকেই তাঁর চরণ দর্শন করবো ।

মণি ।—মহারাজ ! তাহ'লে আর বিলম্ব করবেন না ?

রঞ্জা ।—মা তুমিই এ ছুটি বালককে মায়ের স্নেহে প্রতিপালন করে আসছো, আমি শুদ্ধ গর্ভে ধারণ করেছি, প্রকৃত পক্ষে তুমিই এ ছুটি সন্তানের জননী, সুতরাং অধিক আর কি বলব, তোমারই এই পুত্র ছুটীকে তোমারই মমতার কোলে

বসিয়ে রেখে আমি নিশ্চিত হয়ে এ স্থান ত্যাগ করি। মা
রক্ষিনী তোমার মর্যাদা রক্ষা করুন।

নয়ন।—দলু! স্মৃতে দুঃখে আমার জীবন-পথের চির সহচর
তোমাকে আর আমি কি বলব, তোমারই সহায়তায়, তোমারই
প্রভুপরায়ণতায় আমার অধিকার ধনধান্যপূর্ণ রত্নকাঞ্চনময়ী
সুপ্রতিষ্ঠিতা নগরী। তোমারই পুণ্যে মৃত্যুর করাল গ্রাস হতে
ফিরে এসেছি, এই দুটি অমূল্য রত্ন লাভ করেছি! এ দুটি সাম-
গ্রীতে ত্রায়তঃ ধর্ম্মতঃ তোমারই সম্পূর্ণ অধিকার, এ অধিকার
হতে আমি মনে মনে ও তোমাকে বঞ্চিত করতে সাহস করি
না। আমার প্রাণের সমস্ত আশীর্ষাদের সঙ্গে তোমার এই দুটি
ভাইকে তোমার হাতে সমর্পণ করলুম। তুমি বলাইয়ের সঙ্গে চন্দ্র
সেন আর সূর্য্য সেনকে তোমার ধর্ম্মের সংসারে প্রতিষ্ঠা কর।

(নয়ন সেন, মণিরাম রঞ্জাবতীর প্রস্থান)

লক্ষ্মী।—অভয়ে! ভার দিলি, সঙ্গে সঙ্গে অভয় দে, ভয়
দেখাস্ নি মা ভয় দেখাস্ নি।

লক্ষ্মী।—

গীত।

বসনে ঢাক মা অঙ্ক।

দেখে কাপে কায়া, কেন মা অভয়া

কর তনয়ার সনে রঙ্গ ॥

নীল কমল দল, শ্রীমুখ মণ্ডল।

ঢল ঢল মৃদু হাসি সঙ্গ।

এবে কার সনে রণে মা, নীরদবরণী শ্রামা,

ত্রিনয়নে কুটীল ভ্রমঙ্গ ॥



চতুর্থ অঙ্ক ।

প্রথম—দৃশ্য ।

শিবির সম্মুখ ।

(দেওয়ান, মহীপাল ও মহাপাত্র)

দেও।—মহারাজ ! আমার প্রভু, আপনার একজন সামন্ত রাজা । তিনি আপনার কোপদৃষ্টি সহ করতেও অসমর্থ । তাঁর নাশে এরূপ সংহার মূর্তি ধারণ বঙ্গের সম্রাটের যোগ্য কার্য্য নয় । তিনি আপনার ক্ষমার পাত্র । মহারাজ ! দয়া করে এ প্রচণ্ড ক্রোধ সংহার করুন ।

মহা।—ক্রোধ সংহার ! কিসের ক্রোধ ! অধীন রাজার অপরাধের শাস্তিদান কোন রাজনীতিতে ক্রোধের কার্য্য বলে না । যে অহঙ্কৃত নরাধম তার প্রভুর অপমান করতে সাহস করে, পশু হয়ে গিরিলজ্বনের ধৃষ্টতা দেখায়, তার মূর্খতার শিক্ষা দেওয়াই রাজধর্ম্ম ।

দেও।—আমার প্রভু অহঙ্কৃত ও ন'ন, ধৃষ্টও ন'ন । তিনি জ্ঞান বৃদ্ধ, আতিথেয়, ধর্ম্মাত্মা, বঙ্গের সম্রাটের উপর ভক্তিমান । আপনি বঙ্গেশ্বরের প্রধান মন্ত্রী, অন্তর্দর্শন পটু । কোন একটা আকস্মিক ঘটনার জন্তু তাঁর উপর দোষারোপ করা কি আপনার কর্তব্য ।

মহা।—তোমার উপদেশ শোনবার জ্ঞ, আমার রাজ-
ধানী ছেড়ে, এই বানরের দেশে এসে উপস্থিত হই নি, আর
তোমার গায় খোঁড়া বৃহস্পতির উপদেশ-সুধা পান করাতে এই
লক্ষ সৈন্তকে এখানে নিমন্ত্রণ করে আনি নি। এসেছি অপ-
রাধীর দণ্ড দিতে ।

মহী।—অপরাধীর শাস্তি না দিলে, আমি প্রভুত্ব রক্ষা
ক'র্ব কেমন ক'রে ।

মহা।—পূর্ব মহারাজের দয়ার জ্ঞই ত এই সব নরাধমদের
ওদ্ধত্য বেড়ে গেছে ।

মহী।—আমার সঙ্গে রঞ্জাবতীর বিবাহের সম্বন্ধ, আমি
চলেছি বিবাহ করতে—

মহা।—রূপ গুণ যৌবন, অনন্ত শক্তি—রঞ্জাবতী সুন্দরী
অভিলাষিনী হয়ে মালা হাতে ক'রে অবস্থান ক'রছে—এমন
সময়ে, আমার এমন প্রভুর অধিকার অমান্য ক'রে,—নরাধম
চোর ভণ্ড বুড়ো জালিয়াত ছলনা করে বঙ্গের সেই ভাবী রাজ্যে
ধরীকেই অপহরণ করলে ! বাগ্দত্তা কণ্ঠা, বিবাহিতা স্ত্রীর সঙ্গে
তার কি প্রভেদ !

মহী।—সে ত এক রূপ রাজাস্তঃপুরকেই কলঙ্কিত
করেছে ।

মহা।—সে নরাধম বৃদ্ধ যোগী সেজে রাবণের মত সীতা
হরণ করেছে । তার কল পাবে না, রাক্ষস কুল নিশ্চূল হবে
না । আমাদের এক লক্ষ সৈন্ত এত দূর এসে অমনি অমনি
ঘরে ফিরে যাবে !

মহী।—শক্তি আছে, আমি সে অপমান সহ্য ক'র্ব কেন ?

মহা।—বার বৎসর কোন শাস্তি দিইনি, এই তার প্রতি যথেষ্ট অনুগ্রহ ।

দেও।—পূর্ক থেকে অবগত হলে, তিনি কখনও সেরূপ কার্য্য কর্তেন না ।

মহা।—অতিবিজ্ঞ বৃদ্ধ ! প্রভুর পক্ষ সমর্থন করতে এসেছ । কিন্তু কথায় মূর্থতার পরাকাষ্ঠা দেখাচ্ছ । বলি না জেনে তোমার প্রভু গোড়ের রাণীকেই না হয় অপহরণ করেছেন । বিষ্ণুপুরের বাগ্দীরাজার স্মৃথে গোড়েশ্বরের মহাপাত্রের যে অপমান, সেটাও কি তোমার প্রভু অগ্রমনস্কে না জেনে করে ফেলেছেন?

মহী।—মহাপাত্রের অপমান, সে ত আমারই অপমান ?

দেও।—মহাপাত্র ত আমার প্রভুর হাত পা বেঁধে তাকে জলে ফেলে দিয়েছিলেন ।

মহা।—বস্, তাহ'লে তুমি বলতে চাও, তোমার প্রভু যখন আমার ঘরে চুরি ক'রতে আস্বেন, তখন আমি জিনিষ পত্র গুলো তাঁর হাতের কাছে এগিয়ে দেব ; যখন আমাকে হত্যা করতে আস্বেন, তখন আমি আস্তে আজ্ঞা হয় বলে গলাটা বাড়িয়ে দেব । আমার স্ত্রীটীকে যখন বার করে নিয়ে যেতে ইচ্ছা ক'রবেন, আমিও অমনি তাড়াতাড়ি সিন্ধুক খুলে এক খালা মোহর না বার ক'রে, এক হাতে স্ত্রী, আর হাতে দক্ষিণে দিয়ে তাঁকে গলবস্ত্রে প্রণাম করব । মহারাজ ! সুন্দর যুক্তি ! বড় অগ্রায় কার্য্য করেছি ! তোমার প্রভুকে সেই সময়ে খোড় কুচি না ক'রে, ভদ্রলোকের মতন হাত পা বেঁধে আস্তে আস্তে জলে ফেলে দিয়েছি ।

মহী।—তার উচিত ছিল সেই সময়ে নীরবে জলের ভেতরে
চুকে যাওয়া ।

মহা।—এই—বলুন ত মহারাজ ।

মহী।—তাহ'লে বুঝতুম, সে রাজভক্ত—তাহ'লে তাকে
ক্ষমা করতে পারতুম ।

মহা।—এই—তাহ'লে সে নরাধমের ওপর ক্ষমার একটা
কারণ থাকতো ।

দেও।—(স্বগত) দেখছি এ নরাধমদের কাছে, শান্তির
কিছুমাত্র প্রত্যাশা নেই । (প্রকাশে) বুঝেছি—এখন তাহ'লে
আমাদের কি করতে আদেশ করেন ।

মহী।—আগে তোমার প্রভুকে দাঁতে তৃণ ক'রে রঞ্জা-
বতীকে এইখানে নিয়ে আসতে বল ।

মহা।—তারপর যে দু'বেটা ডোম আমার অপমান করেছে,
তাদের মুণ্ড কেটে এইখানে পাঠিয়ে দাও ।

মহী।—সেই সঙ্গে লক্ষ্মী বলে নাকি একটা ডুমুনী আছে,
সেটা নাকি সুন্দরী, সেটাকে পাঠিয়ে দাও । আর মান্দারগের
রাজার ছেলে তোমাদের ঘরে আবদ্ধ আছে । সে সামন্ত
রাজা । তোমরা তাকে ধরে রাখবার কে? তাকে পাঠিয়ে দাও ।

দেও। যুদ্ধ ক'রেই বা এর চেয়ে বেশী কি প্রত্যাশা করেন
মহারাজ ?

মহা।—বেশী প্রত্যাশার কি দরকার ! আমাদের এই
পেলেই হ'ল ।

দেও।—এই যদি রাজাকে দিতে হয়, রাজা অমনি দেবেন
কেন ?

মহা।—কে দিতে বল্ছে ! আমরা ভিক্ষে নিতে আসিনি ।

দেও।—তাহ'লে আর মীমাংসা হ'ল না । দোহাই মহা-
রাজ ! তিন দিন বিলম্ব করুন । রাজা বিষ্ণুপুরে গমন ক'রেছেন,
তাঁদের ফিরে আসার অপেক্ষা করুন ।

মহা।—ও ! কৌশল—কৌশল !

মহী।—কৌশল !

মহা।—বিষ্ণুপুর থেকে সৈন্ত সাহায্য এনে আমাদের সঙ্গে
লড়াই দেবে !

মহী।—বটে ! তুমি বৃদ্ধ ভারী চতুর !

মহা।—মহারাজ ! ওর সঙ্গে কথা কয়ে সময় নষ্ট করবেন
না । এখনি সব সৈন্তকে প্রস্তুত হ'তে আদেশ করুন । তারা
এখনি অধিকা অভিমুখে যাত্রা করুক । যাও, যাও বৃদ্ধ তোমা-
দের যে যেখানে শূরবীর আছে সবাইকে প্রস্তুত হ'তে বলগে ।
আমরা তোমাদের মুণ্ডপাত না ক'রে ঘরে ফিরছি না ।

(দেওয়ানের প্রস্থান)

মহী।—নয়ন সেন বিষ্ণুপুরে পালালো, তাকে ধরবার
এমন সুযোগটা ছেড়ে দিলে !

মহা।—অকুষ্ঠানের কিছুই ভ্রুটী করিনি মহারাজ ! ধরবার
সমস্ত আয়োজন করে ছিলুম, কিন্তু গোড় থেকে আসতে
আসতে বুড়ো হাত ফস্কে স'রে গেছে । তা যাক্—বুড়োকে
গ্রেপ্তার করতে আর ক'দিন ! অধিকার পাঠ উঠিয়েই,
বিষ্ণুপুরে সদল বলে হানা দিচ্ছি । একেবারে জালগুটিয়ে
যেখানকার যা সব টেনে আনছি ।

মহী।—শিগ্গির আনো, আমার দেরি স'ইছে না ।

মহী।—এসেছে, আপনি জেনে রাখুন না।

মহী।—আর দেখ, মান্দারণের রাজপুত্রকে মেরে ফেলতে হুকুম দিয়োনা।

মহা।—কেন মহারাজ ! শক্রর জড় রেখে দরকার কি ! থাকলে ভবিষ্যতে সে আপনার ছেলে পুলেদের সুখের পথে কণ্টক হয়ে দাঁড়াবে।

মহী।—না, না মহাপাত্র ! সে আমাদের ত কোন অনিষ্ট করেনি। তার ওপর আজ যুমুতে স্বপ্ন দেখেছি, এক সন্ন্যাসী এসে বলেছে, যদি মান্দারণের ছেলের গায়ে হাত দাও, তাহ'লে তোমাকে সপুরী এক গড় ক'রবো। অল্প সবাইকে তুমি মেরে ফেল তাতে আমার কোনও আপত্তি নেই।

মহা।—বেশ, আপনি যখন হুকুম করেছেন, তখন তাই হবে।

মহী।—বেশ।

(মহীপালের প্রস্থান)

(নিধি সর্দারের প্রবেশ)

মহা।—বলি বেটা, ছেলে ছ'টোকে বে এনে দিবি বল্লি, তার কি কর্লি !

নিধি।—শুধু ছেলে কেন ছজুর ! যদি সহরটাকে আপনার হাতে না দিতে পারি, তাহ'লে আমাকে একটু একটু ক'রে কেটে মেরে ফেলবেন।

মহা।—বেশ, তাহ'লে সহরটাই তোকে বক্‌সিস্ দেব। আর দেখ, মান্দারণের রাজপুত্রটাকে জ্যান্ত আন্বি। রজাবতীর ছেলেটাকে মেরে ফেলবি।

নিধি।—যো হুকুম।

(উভয়ের প্রস্থান)

দ্বিতীয় দৃশ্য ।

—*—

দুর্গ প্রাঙ্গন ।

(দেওয়ান, দলু ও সৈন্যগণ)

দেও ।—বার বৎসরের পর আবার ভগবানের সংহার-
লীলার পুনরভিনয় ! দলু ! আবার সেই কালরাত্রি সমস্ত
বিভীষিকা নিয়ে আমার চোখের ওপর জেগে উঠছে ।

দলু ।—তারপর এখন কি কর্তব্য উপদেশ দিন ।

দেও ।—তুমি ধর্মপরায়ণ বীর, তোমাকে আর আমি কি
উপদেশ দেবো । তোমার হিতাহিত জ্ঞান যা করতে পরামর্শ
দেবে তাই করবে ।

দলু !—আর দু'টী সন্তান ?

দেও ।—দু'টী সন্তান ? কি বলব বাপ ! একটা রাজার
বংশধর । মরুভূমির উত্তপ্ত অসীম বালুকা-প্রান্তর মধ্যে বিধাতা
রোপিত চিরছায়ায় বটবৃক্ষ । আর একটা ! দলু স্মরণেও
প্রাণ কেঁদে ওঠে ! চারটা অমূল্যরত্নের বিনিময়ে তাকে লাভ
করেছি । জিঘৎসু শত্রুর অস্ত্র প্রহার হ'তে, তার স্নেহময়ী
জননী, শুধু কোমল বকের আবরণে রক্ষা করেছে । তার পর
আমাদের রাজার হাতে দিয়ে নিশ্চিত মনে স্বামীর চিতা-শয্যা
শয়ন করেছে । কোথায় তাদের রক্ষা করবে ! যদি অস্বিকার
সব যায়, তখন তাদের লুকিয়ে রাখবে কে ? কে সাহস ক'রে
তাদের আশ্রয় দেয়—স্থান কোথায় ? ধর্ম—ধর্ম—ধর্ম ভিন্ন

তাদের প্রাণ রক্ষা করতে কেউ নেই । দলু ! ধর্মের আশ্রয়ে
তাদের রক্ষা কর ।

দলু ।—যো হুকুম (দেওয়ানের প্রশ্নান) ভাই সব ! ধর্ম—ধর্ম
রক্ষা কর । অম্বিকানগরের রাজার কৃপাতেই আমরা মানুষ বলে গণ্য
হয়েছি যেমন ক'রে পার, সেই আশ্রয়দাতার মর্যাদা রক্ষা কর ।

১ম সৈ ।—দেবতার দোরে জান উচ্ছুগু করে চলে এসেছি
স্ত্রীপুত্রের কাছে জন্মের মত বিদায় নিয়েছি, আর কি করব
হুকুম কর সরদার ।

দলু ।—এ যুদ্ধে জয় লাভ করা বড়ই কঠিন । তবে যদিই
দেবতার ইচ্ছায় আমাদের হারতে হয়, ত সহজে যেন আমরা
শত্রুকে সাধের অম্বিকায় প্রবেশ করতে না দিই ।

১ম সৈ ।—বেশ প্রথমে অস্ত্র নিয়ে যুদ্ধ করবো । অস্ত্র গেলে
ধর ভেঙ্গে ইট সংগ্রহ ক'রে, তাই দিয়ে নগর রক্ষা করবো ।
যখন তাও ফুরাবে, তখন দাঁতের সাহায্যেও যদি শত্রু নিপাত
করতে হয়, আমরা তাও করতে প্রস্তুত আছি ।

দলু ।—তার পর স্ত্রীপুত্রের প্রাণ । যখন সমস্ত যাবে,
অম্বিকা শ্মশান হবে, তখন ? নারায়ণ ! তখন ভাই ছটীকে
তোমার শান্তিময় কোলে স্থান দিও । যাও ভাই সকলে প্রাণ-
পণে ফটক রক্ষা করগে ।

২ম সৈ ।—যো হুকুম !

দলু ।—আর দেখ, যুদ্ধে এতটুকুও অধর্মাচরণ করো না ।
পলায়িত শত্রুর পিঠে অস্ত্র মেরো না, আশ্রয়প্রার্থী শত্রু হ'লেও
তাকে আশ্রয় দিতে কুণ্ঠিত হয়ো না । আর সত্যপথ থেকে
কদাচ বিচলিত হয়ো না ।

১ম সৈ ।—যো হকুম ।

(মৈন্যগণের প্রশ্নান)

(লক্ষ্মীর প্রবেশ)

দলু ।—লক্ষ্মী ! কি ঘোর অন্ধকার ।

লক্ষ্মী ।—আষাড়ে অমাবস্তার রাত্রি—এইরূপ অন্ধকার চিরদিনই হয় ।

দলু ।—এখনও কোথায় রাত্রি । সমস্ত দিনের মধ্যে একটা বার মাত্র মুখ দেখিয়ে এই মাত্র সূর্য্য অস্ত গেল । সমস্ত রাত্রিই এখনো আমাদের সামনে পড়ে আছে । প্রারম্ভেই এই অন্ধকার । এমন অন্ধকার আমার স্বরণে আসে না ।

লক্ষ্মী ।—আসল কথা দৃষ্টি প'ড়ে আছে সেই দু'টা বালকের উপর । কাজেই অতৃদিকে ভাল রকম দেখতে পাচ্ছি না ।

দলু ।—একটা একটা করে চারিদিক থেকে কাল মেঘ এসে অশ্বিকাকে আচ্ছন্ন করছে । মেঘের উপর মেঘ, তার উপর মেঘ—গ্রহতারা গুলো অশ্বিকার উপর রূপাদৃষ্টি দেবার জন্ত যতই আগ্রহ করছে, ততই যেন কোথা থেকে আচ্ছাদনের উপর আচ্ছাদন তাদের মুখ ঢেকে ফেলছে । লক্ষ্মী প্রাতঃসূর্য্যোদয় দেখবার আমার এত আকিঞ্চন হচ্ছে কেন ?

লক্ষ্মী ।—একি সরদার ! তুই কোথা আমাকে এ বিপৎকালে উৎসাহ দিবি, তা, না করে, তোর বলে যার বল, তার মুখের পানে চাইছি না কেন ?

দলু ।—জীবনের ভয়ত করি না লক্ষ্মী ! যে ভার কাঁধে নিয়ে বসে আছি, তাতে হাত পা আমার বাঁধা পড়েছে ।

লক্ষ্মী ।—যা বলেছি, সর্দার, বিষম ভার । রাজা রাণী ফিরলে, আবার তাদের ধন তাদের হাতে দিতে পারি ।

দলু ।—আবার তাদের ধন তাদের দিতে পারি । লক্ষ্মী ! অনিচ্ছায় বড় অনিচ্ছায় শুধু তোর আগ্রহে রাজা আমার হাতে ছেলে সমর্পণ করেছে ।

লক্ষ্মী ।—তারা জানে ও ছুঁটী আমাদেরই ধন । তা'রা শুধু দেখে বইত নয়, ভোগ করি আমরা সর্দার প্রাণ দিয়ে, পুত্র দিয়ে তোরে দিয়েও কি তাদের রক্ষা করতে পারব না ?

দলু ।—তাই বল্ লক্ষ্মী ! নিরাশায় আশা পাই, অন্ধকারে আলোকের মুখ দেখি । খুব সাবধানে তুই ছেলে ছুঁটীকে রক্ষা কর ।

লক্ষ্মী ।—নারায়ণ সহায় না হ'লে, মানুষে নিজে কতক্ষণ সাবধান হ'তে পারে ।

দলু ।—ভাই সব আমার এগিয়ে গেছে । আমিও চললুম । যদি কোনও বিভীষিকা দেখিস্ ত তখনি খবর দিস্ ।

লক্ষ্মী ।—সারা রাত্রি সজাগ থাক, আর ভগবানকে ডাক্ ভয় কি !

(লক্ষ্মীর প্রস্থান)

(বলাইয়ের প্রবেশ)

বলা ।—বাবা ! একজন লোক মহাপাত্রের অত্যাচারের হাত থেকে রক্ষা পাবার জন্ত, তোর আশ্রয় নিতে এসেছে ।

দলু ।—গড়ের ভেতরে সে এলো কেমন ক'রে ?

বলা ।—গড়ের বাইরে ক্ষত বিক্ষত দেহে পড়ে সে ব্যক্তি

আশ্রয় ভিক্ষা করছিল। তুমি বলেছ যে আশ্রয় চায়, সে শত্রু হ'লেও তাকে আশ্রয় দেবে।

দলু।—কই সে ?

বলা।—ওরে এদিকে আয়।

(নিধিরামের প্রবেশ)

দলু।—কে তুমি ?

নিধি।—য্যা আমি—সরদার আমাকে আশ্রয় দাও। মহাপাত্র আমাকে মেরে, গালে চূণ কালী দিয়ে, মাথায় ঘোল ঢেলে তাড়িয়ে দিয়েছে। এই দেখ সর্ব্বাঙ্গে প্রহারের দাগ। সরদার শুধু আমার প্রাণটী যেতে বাকী।

দলু—কি অপধাধে তোমাকে শাস্তি দিলে ?

নিধি।—অপরাধ ! কি বলব সরদার। তুমি কি বিশ্বাস করবে? আমি বিদেশী—আমার কথায় কি তোমার প্রত্যয় হবে।

দলু।—বল।

নিধি।—তোমরা ধার্মিক, তোমাদের ওপর অত্যাচার হচ্ছে দেখে, আমি বলে ফেলেছিলুম, ধর্ম এ অত্যাচার কখন সহ্য করবে না। এই অপরাধ। এই দেখ আমার কি দুর্দশা করেছে।

দলু।—আচ্ছা।

নিধি।—বিদেশী, জায়গা চিনি না; লোক চিনি না, অন্ধকারে নিরুপায়ে তোমার আশ্রয়ে এসেছি। তুমি যদি আমাকে মেরেও ফেল, তাহ'লেও আমার পাপের প্রায়শ্চিত্ত হয়।

দলু।—বলাই। এই নিরাশ্রয়কে স্থান দে।

(সৈন্যের প্রবেশ)

সৈন্য ।—সরদার শীঘ্র চলে এস । শত্রু এসে গড় ঘেরেছে ।

নিধি ।—ওই এল সরদার ওই আমাকে ধরতে এল ।

(সৈন্য ও দলুর প্রস্থান)

বলা ।—আয় আমার সঙ্গে আয় ।

নিধি ।—চল বাবা, স্থান দেবে চল—বস্তুকে পড়েছি
আর আমায় পায় কে । চোকে দেখছি অশ্বিকা শ্মশান—সেই
শ্মশানে রাশ রাশ মুণ্ডুর ওপর নিধিরামের সিংহাসন ।

(সকলের প্রস্থান)

তৃতীয় দৃশ্য ।

— * —

বিষ্ণুপুর—মদনমোহনের নাটমন্দির ।

(বীরমল্ল পদ্মাবতী)

বীর ।—এখনও তারা এলোনা পদ্মাবতী !

পদ্মা ।—আর তারা আসবে কেন মহারাজ ! আপনি শ্মশান
ভূমে বাগানের প্রতিষ্ঠা করেছেন । নির্ঝংশ হয়ে যখন রাজা
নয়ন সেন ভিখারীর বেশে সংসার ত্যাগ করে ছুটেছিল, তখন
আপনি কণ্ঠাস্নেহেপালিতা সোণার প্রতিমা রঞ্জাবতীকে
তাকে ভিক্ষা দিয়েছেন । আপনার আশীর্ষাদেই আবার তাঁর
বংশের প্রতিষ্ঠা । আপনি এত অশক্ত—মৃত্যুশয্যায়—সে
ব্যক্তি আর কি প্রত্যাশায় আসবে মহারাজ !

বীর ।—না রাণী ! ও কথা মুখেও এনোনা—রাজা নয়ন
সেনকে অকৃতজ্ঞ মনে করনা । তা হলে মরেও সুখ পাব না ।

পদ্মা।—আর না বলে কি বলব? এত করে তাদের আসতে বললেন; তবু তারা কেউ এলোনা! একবার দেখার সুখ, তাতেও কিনা তারা বঞ্চিত করলে!

বীর।—সম্মুখে যিনি বংশীধর পরমা প্রকৃতিকে নিয়ে লীলা করেছেন, তাঁকে দেখ—সকল প্রিয় সামগ্রী দেখবার সাধ মিটে যাবে।

(নয়ন সেন, রঞ্জাবতী ও মনিরামের প্রবেশ)

নয়ন।—মহারাজ! মহারাজ!

পদ্মা।—একি! একি তোমার দয়া মদনমোহন!

বীর।—দেখ রাণী, মদনমোহনের লীলা দেখ।

পদ্মা।—আমি এই মাত্র তোমার যে নিন্দা করছিলুম মহারাজ!

রঞ্জা।—এ আপনাকে কি দেখলুম মহারাজ!

বীর।—আমাকে দেখবার আর প্রয়োজন নেই। আমি সংসার ভোগে পরিতৃপ্ত। শ্রীমদনমোহনের শ্রীচরণের এক প্রান্তে একটু স্থানের ভিখারী হয়ে, এই স্থানে হত্যা মেরে পড়ে আছি। তোমার ছ'টি সন্তান কই? তাদের একটীকে আমি বিষ্ণুপুর দান করে নিশ্চিত হই। মণিরাম তার অভিভাবক হয়ে রাজ্য শাসন করবে—কই চুপ করে দাঁড়িয়ে রইলে যে! ছেলে কই?

পদ্মা।—তাইত মহারাজ! ছেলে কই?

মণি।—ছেলে! রাজা তাদের কালের মুখে সমর্পণ করে এসেছে।

বীর।—সেকি!

পদ্মা।—মহারাজ ! উঠবেন না, উঠবেন না। সে কি মণিরাম ! একি বল্ছ !

বীর।—চুপ করে থেকোনা—কি বল।

নয়ন।—কি বলব মহারাজ ! অকৃতজ্ঞ নরাধম আমি দু'দিন পূর্বে আসতে পারিনি। তার জন্ত আমাকে তিরস্কার করুন।

বীর।—সে পরে কর্বো। সে তিরস্কারের ঢের সময় আছে, এখন ছেলে কোথায় রেখে এলে ?

নয়ন।—যে দেবতা আপনার সম্মুখে আপনি যার প্রতি-মূর্তি স্বরূপ হয়ে আমাকে সংসারে পুনঃ প্রতিষ্ঠিত করে-ছিলেন, সেই মদনমোহনকে জিজ্ঞাসা করুন, আমার সন্তান কোথায় আমি বলতে পারবো না।

রঞ্জা।—সন্তান কোথায় ! উনি ভিন্ন আর কেউ এখন বলতে পারে না।

পদ্মা।—তবে কি ছেলে নেই।

রঞ্জা।—থাকে যদি উনি রক্ষা করেছেন, যায় যদি উনি নিয়েছেন।

বীর।—এসব পাগলের মত বকে সময় নষ্ট করে, আমার মৃত্যুর পথ পরিষ্কার করছ কেন ?

মণি।—মহারাজ, লক্ষ সৈন্য নিয়ে গৌড়েশ্বর ওঁর রাজ্য আক্রমণ করতে চলেছে। উনি সে সংবাদ শুনেও পুত্র পরি-তাগ ক'রে আপনাকে দেখতে এসেছেন।

পদ্মা।—বীর ! একি করলে মহারাজ।

বীর।—এখন এ কথা কেন রাণী। দেখতে এলো না বলে

এই যে একটু আগে তোমার ভগিনী ও ভগিনীপতির উপর অভিমান করছিলে। তার পর এখন কি কর্তব্য ?

নয়ন।—মহারাজ অনুমতি করুন। এতক্ষণ বোধ হয় অশ্বিকা সৈন্ত-সাগর হয়েছে। ক্ষুদ্র তরী বুঝি এতক্ষণ সেই প্রলয়তরঙ্গে ডুবে গেল।

(সৃষ্টিধরের প্রবেশ)

সৃষ্টি।—বুঝি কেন ঠিক গেল। তুফানের ওপর তুফান—রাজার তুফান, পাত্রেণের তুফান, ঢালীর তুফান, বন্দুকীর তুফান, —শেষ হাতী ঘোড়ার তুফান—এতক্ষণ বুঝি ভুস্ করে বুড়ে গেল। ক্ষুদ্র তরণীর মাঝী ভাল তাই এতক্ষণ যুঝছে। কিন্তু আমার রাখতে পারে না, তরীর তলা চিড় খেয়েছে।

নয়ন।—সে কি রকম ?

সৃষ্টি।—তরীর তলায় রাঘব বোয়াল দাঁত বসিয়েছে। একটা চোর নিঃশব্দে পুরী প্রবেশ করেছে। আপনার রত্নের ঘরে সিঁদ দিচ্ছে—বংশ বুঝি আর রইল না।

নয়ন।—মহারাজ ভৃত্যকে অনুমতি করুন।

বীর।—রাণী ! রত্নের ভাণ্ডার খুলে দাঁও, মণিরাম তাই নিয়ে তুমি এই মুহূর্তে সৈন্ত সংগ্রহ কর। যাও, রাজাকে সঙ্গে নিয়ে এখনি যাও। মুহূর্তমাত্র বিলম্ব হ'লে, আয়োজন ব্যথা হবে।

(বীরমল্ল ব্যতীত সকলের প্রস্থান)

বীর।—কি করি ! আমি এখন কি করি ! মদনমোহন ! আমিত তোমার কাছে কখন কিছু চাইনি। তুমি যে, যা

দেবার আপনিই দিয়েছো। নিজে ছুই বগলে দল-মাদল ধরে
আমার শত্রুর সঙ্গে যুদ্ধ করেছ। আমি প্রভাতে নিদ্রোখিত
হয়ে দেখি যে, আমি শত্রু-বিজয়ী। তবে এ বৃদ্ধ বয়সে আবার
কামনা জেগে ওঠে কেন ?

(ধর্ম্মানন্দের প্রবেশ)

ধর্ম্ম ।—জাগবে না ! এখন যে তুমি নিষ্কর্মা। যে নিজে
কিছু করতে পারে না—অলস—সেই কেবল দেহি দেহি করে।

বীর ।—আপনি কে প্রভু !

ধর্ম্ম ।—আমি ভিখারী। তোমার মদনমোহন দর্শন
করতে এসেছিলুম। কিন্তু এসে আমি বিপন্ন। ঠাকুরের
দৃষ্টি দেখে আমি চোখের জল রাখতে পারছি না।

বীর ।—সে কি ঠাকুর।

ধর্ম্ম ।—আজন্ম বীরধর্ম্মা, যুদ্ধব্যবসায়ী তুমি ; এখন ধর্ম্ম
ছেড়ে মৃত্যুপ্রতীক্ষায় ঠাকুরের শ্রীচরণ চেপে পড়ে আছ।
তোমার কর্কশ দেহের সংঘর্ষে ঠাকুরের কোমল চরণ ক্ষতবিক্ষত।
ঠাকুরের মুখে যাতনার রেখা—শ্রীরাধা মলিনমুখী। মহারাজ
ভিক্ষুকের উপর লোকে ধর্ম্মভয়ে দয়া করে, সে দয়া মৃত্যু-
প্রবৃত্তি নয়। এখানে প'ড়ে প'ড়ে ভিখারীর মত মৃত্যুর প্রতীক্ষা
করছ, কিন্তু ধর্ম্মপথে অগ্রসর হয়ে মৃত্যুকে হা'তে ধরে
জোর করে টেনে আনলে ত এত বিলম্ব হত না।

বীর ।—ঠিক বলেছ দেবতা ! লাঠীর সাহায্যে এখনও আমি
উঠতে সমর্থ—ঠিক বলেছ দেবতা ! দল-মাদল তোলবার শক্তির
কণাও আর আমাতে নেই। কিন্তু তাতে কি ! এখন ও ত
আমার দেহনির্ভর যষ্টি আছে ! ঠিক বলেছ দেবতা।

ধর্ম ।—আজ্ঞা বীরধর্মা তুমি । স্বধর্মে তোমার মৃত্যুও ভাল । জ্ঞানী হয়ে বৃদ্ধ বয়সে ভয়াবহ পরধর্ম অবলম্বন করেছ কেন ? আমি ভিখারী এস মহারাজ ! তোমার তীর্থ-মৃত্যু ভিক্ষা করি ।

বীর ।—এই ত তীর্থ দেবতা ?

ধর্ম ।—ঠাকুরের চরণ (হাঁশু) দেখবে এস, তোমার চেয়ে কত বলবান কতদিক থেকে ওই শ্রীপাদ-পদ্ম নিয়ে টানাটানি করছে । ভিক্ষুক আর্ধ্যসন্তানের টানাটানিতে ঠাকুর হস্তপদ-বিহীন জগন্নাথ হয়ে পড়েছেন, তুমিও যদি টানো তাহলে সমুদ্রে ঝাঁপ দেওয়া ভিন্ন তাঁর আর উপায় নাই । ওঠ, জাগো, স্বধর্ম পালন কর । ভিখারীর জন্তে ভিক্ষা রেখে দাও বন্ধের সে দুঃসময় আসতে বিলম্ব নেই বীরবর ! তুমি সে হতভাগ্যদের পথ প্রদর্শক হ'য়ো না ।

(ধর্ম্যানন্দের প্রস্থান)

বীর ।—হাত কাঁপছে, পা কাঁপছে—সর্বশরীর টলছে, আমি ধর্মপালন করব ? বেশ বেশ মদনমোহন । সমস্তই তোমারই ইচ্ছা । অচল-মূর্তি ধারণ করে দল-মাদল আমার গড়ের দেউড়ী জুড়ে বসে আছে । গিরিধারি ! তাদের স্থান-চ্যুত করতে তুমি ভিন্ন আমার আর কেউ নেই । আমি পাস দিয়ে কাঁপতে কাঁপতে যাব, তারা হাসবে । হাসুক—সমস্ত তোমারই ইচ্ছা !

(রাখালবেশী বালকের প্রবেশ)

বালক ।—কি রাজা কাঁপচো যে ! কোথায় যাবে ?

বীর ।—য্যা—কে তুমি? রাখালরাজ ! কোথা থেকে ?

রাখাল ।—বন থেকে ।

বীর ।—বন থেকে বেরুলে টিয়ে, সোণার টোপের মাথায়
দিয়ে । তাহ'লে দেখছি তুমি আনারস ।

রাখাল ।—যা বন ।

বীর ।—কি মনে ক'রে ?

রাখাল ।—তুমি উঠলে কি মনে ক'রে ?

বীর ।—আমি যুদ্ধে যাব বলে উঠেছি ।

রাখাল ।—আমি তোমার সঙ্গে যাব বলে উঠেছি ।

বীর ।—তুমি যে বালক !

রাখাল ।—তুমি যে বুড় ।

বীর ।—বেশ, আমার লাঠী ধরতে পারবে ?

রাখাল ।—দাঁও ।

বীর ।—বেশ, আমার দল-মাদল তুলতে পারবে ?

রাখাল ।—চল না দেখি ।

বীর ।—রাখালরাজ ! এ বৃদ্ধ গরুটীকে তাহ'লে তুমিই
চালিয়ে নাও ।

(উভয়ের প্রস্থান)

(পদ্মাবতী রঞ্জাবতী ও নয়ন সেনের প্রবেশ)

পদ্মা ।—মহারাজ ! মহারাজ ! কই মহারাজ !

নয়ন ।—মদনমোহন—তাহ'লে এই স্থান থেকেই তোমাকে
প্রণাম করি । দয়া কর প্রভু ! আবার যেন আমার বংশলোপ
না হয় ।

রঞ্জা । — দোহাই দেবতা ! ছুটী ছেলেকে তোমার (মণি-
রামের প্রবেশ) পায়ে তলায় রেখে এসেছি ।

মণি ।—আশ্চর্য্য ! আশ্চর্য্য ! মহারাজ দেখবেন আস্থন !
মরণোন্মুখ রাজা ঐশ্বরিক শক্তি বলে দল-মাদল সঙ্গে নিয়ে রণ-
ক্ষেত্রে চলেছেন । বালকের উৎসাহ, মত্ত মাতঙ্গের শক্তি !
দেখবেন আস্থন !

চতুর্থ দৃশ্য

—*—

ভূর্গ—প্রাঙ্গণ ।

(দলু ও লক্ষ্মী)

দলু । —তিন দিন সমভাবে যুদ্ধ করেছি । শত্রুকে আবার
কালিনী পার করে এসেছি । গড়ের ভেতরে একটা প্রাণীকেও
চুকতে দিই নি । অস্ত্রে আমার শরীর ক্ষতবিক্ষত । তাহোক,
কিন্তু এই কাল যুদ্ধে অধিকা বীরশূন্য । আমি আর তোর পুত্র
অবশিষ্ট । কিন্তু উভয়েই মৃত প্রায় । তিন দিন তিন রাত জেগে
ঘুমের ভারে চোক জড়িয়ে আসছে । বলাই অবসন্নদেহে
গড়ের প্রাচীরে গুয়েই ঘুমিয়ে পড়েছে ।

লক্ষ্মী ।—তুই ও একটু ঘুমিয়ে নে ।

দলু ।—তারপর ? লক্ষ্মী সেদিন সূর্য্যোদয় দেখতে ইচ্ছা হয়ে-
ছিল, আজ আর ইচ্ছা নেই কেন ?

লক্ষ্মী ।—শত্রু কি আর ফিরবে মনে করিস্ ?

দলু ।—তা কেমন করে বলবো । তবে তারা আমাদের

ভেতরের অবস্থা কিছু জানে না । তারা জানে আমরা সবাই
বেঁচে আছি । লক্ষ্মী ! যদি কেউ বিশ্বাসঘাতকতা না করে,
তাহলে অশ্বিকার আর কোন ভয় নেই ।

লক্ষ্মী ।---বেশ, তুই একটু ঘুমোগে ।

দলু ।--আর তুই ?

লক্ষ্মী ।—আমি সারারাত অশ্বিকায় পাহারা দিই । আর
বিধবা গুলো যে যার স্বামীপুলের নাম ধ'রে কেঁদে কেঁদে
মরবে কেন ? যতক্ষণ বেঁচে থাকে তারা মনিবের অশ্বিকা রক্ষা
করুক ।

দলু ।—নারায়ণ ! অশ্বিকা রক্ষা কর ! মনিবের আমার
বংশ রক্ষা কর ।

(উভয়ের প্রস্থান)

(নিধিরামের প্রবেশ)

নিধি—উঃ ! কি সজাগ পাহারা ! কালী মন্দিরের ভেতরেও
তিন দিন চেষ্টা ক'রে প্রবেশ করতে পারলুম না ! আজ পেরেছি
যুদ্ধ ক'রে সব মরেছে । অশ্বিকা ফাঁকা । বাদবাকী যা আছে,
তাদের আমিই শেষ করি—যারা আছে, তারা যুদ্ধ জয় ক'রে
একটু বিশ্রাম নিতে শুয়েছে । মনে করেছে, শত্রু আর আস-
বেনা । এমন সুবিধে আর পাব না । কালী পায়ে ফুল রেখে-
ছেন । এ সময় আর আসবে না । রাজার ছেলেকে মারবো
মান্দারগের ছেলোটাকে কাঁধে ক'রে নেগে রাজাকে দেব, তার-
পর সব মারবো । তার পর ? আমিই অশ্বিকার রাজা । মহা-
পাত্রকে ফিরতে বলেছি, চার ফটক খুলে রেখেছি । এতক্ষণ
তার দল এসে পড়েছে । আর আমাকে পায় কে ?

পঞ্চম—দৃশ্য ।

—*—

দুর্গ—প্রাচীর ।

(লক্ষ্মী, প্রাচীরোপরি নিদ্রিত দলু)

লক্ষ্মী—এরই মধ্যে মাগের মন্দিরে প্রবেশ করে কে পূজা করে গেল ! নরকপাল, মদ, নৈবিদ্যি পাঠার মুড়ী—কে দিলে ! কে এসে পূজা করলে । তবে আমাকে লুকিয়ে এমন অসময়ে দেবী পূজা করলে কে ? একি কারও ছুরভিসন্ধি বুঝতে পারছি না যে ! সরদার ! সরদার ! একবার এক মুহূর্তের জন্ত জেগে থাকবি ? সরদার ! সরদার—তিন দিন তিন রাত্রি সরদার এক লহমার জন্ত চোকের পাতা বোজেনি । যুদ্ধ জয় ক'রে রণজয়ী বীর একটু খানি বিশ্রাম নিচ্ছে । কোন প্রাণে ঘুমন্ত স্বামীকে জাগাই । একটা বারের জন্ত উঠে বসবি ! আমি একবার রাজবাড়ীর কাছটা ঘুরে আসি । আমার মনটায় কেমন সন্দেহ হচ্ছে । মনে হচ্ছে যেন কোন বিশ্বাসঘাতক অধিকায় প্রবেশ করেছে । একবার ওঠ । না, তুলতে প্রাণ চায় না, তবে ঘুমো ।

(প্রস্থান)

(নিধিরাম ও চরের প্রবেশ)

চর ।—চারটে ফটকই খুলেছিস ?

নিধি ।—দুপ ! লক্ষ্মী বেটা এখনও জেগে । অধিকা ঘুমলো, সংসার ঘুমলো, তবু বেটা ঘুমলো না । কি প্রাণ ! কি প্রাণ ! বেটা তিন দিন তিন রাত জেগে পাহারা দিচ্ছে ।

চোখের পলক নেই । কালী মন্দিরে যাই, দেখি বেটা সেখানে ;
রাজবাড়ীতে যাই, দেখি বেটা সেখানে ; বাগানে, বনে
যেখানে যাই দেখি বেটা মূর্তিমতী হয়ে দাঁড়িয়ে রয়েছে ।

চর ।—ছেলে ছোটোর সন্ধান পেলি ?

নিধি ।—এখন, বাপ ! আগে সবাই না এলে কিছু নয়,
কিছু করতে পারবো না । ওই ঝাণিনীর মুখে পড়লে—বাপ !
এখন ছেলের কথাও মুখে নয় । ওই দেখ ঘুমন্ত বাঘ । সাব-
ধান এখন জাগাস্ নি । আগে মহাপাত্র সৈন্ত নিয়ে আসুক ।
জাগলে পাঁচ হাজারেও ও বাঘকে কায়দা করতে পারবি নি ।
সাবধান—পা টিপে—পা টিপে ।

দলু ।—নারায়ণ ! রক্ষা কর ।

নিধি ।—ইস্ ।

চর ।—কি বিভীষিকা !

নিধি ।—তবু ঘুমন্তের চীৎকার । চলে আয়, চলে আয় ।
আড়ালে থেকে পাহারা দে । যদি জাগে, কোথায় যায় না যায়
সন্ধান রাখ । (লক্ষ্মীর পুনঃ প্রবেশ)

লক্ষ্মী ।—কই কিছুইত বুঝতে পার্‌লুম না । তবু মনটা
কেমন করছে কেন ? (প্রাচীরে আরোহণ) য্যা ! একি !
আবার সৈন্ত ! হাজার হাজার—লাখ লাখ—কাতারে কাতারে
দৃষ্টি চলে না এত সৈন্ত কেবল সৈন্ত । একি ! আবার শত্রু !
ওমা মঙ্গলচণ্ডী ! কি হবে ! আবার শত্রু !—ওখানে কে তুমি ?
পালিওনা—পালিওনা, তাহলে প্রাণে বাঁচবে না—দাঁড়াও—
অভয় দিচ্ছি দাঁড়াও—তবু—শুনলিনি । (আরোহণ ও চরের
কেশাকর্ষণ করিয়া পুনঃ প্রবেশ)—কে তুই ?

চর।—হত্যা ক'রনা—আমি গোড়েশ্বরের দূত।

লক্ষ্মী।—তুই এলি কেমন করে।

চর।—গড় ডিঙ্গিয়ে এসেছি।

লক্ষ্মী।—মিথ্যা কথা—এ গড় ডিঙ্গিয়ে মানুষ আসতে পারে এমন মানুষ আমি দেখিনি। সত্যি বল, নইলে মুণ্ডুছিঁড়ে ফেলবো।

চর।—দূত অবধ্য।

লক্ষ্মী।—কিন্তু চোরের দূত অবধ্য নয়। চুরি ক'রে কারও নগরে প্রবেশ করবার অধিকার নেই।

চর।—অভয় দাও—ক্ষমা করবে বল।

লক্ষ্মী।—বল—সত্য বল—তাহ'লে তোকে হত্যা করবো না।

চর।—আমাদের লোক এই নগরে গুপ্তভাবে ছিল, সে ফটক খুলে দিয়েছে।

লক্ষ্মী।—ওই সব বাইরের সৈন্ত ?

চর।—সব গোড়েশ্বরের। তারা সেই খোলা ফটক দিয়ে নগরে প্রবেশ করছে।

লক্ষ্মী।—নে, আয়—

চর।—কোথায় যাব ?

লক্ষ্মী।—তোরা চোর, তোদের বিশ্বাস নেই। আমার স্বামী এখানে নিদ্রিত আমি তোকে এখানে রেখে যেতে পারবো না। তোকে কোন স্থানে আবদ্ধ রাখি, সে সময় ও আমার নেই। আমি তোকে পাঁচিলের ওপর থেকে গড়ের বাইরে ফেলে দেবো। মরবিনি। কিন্তু খোঁড়া হয়ে পড়ে থাকবি, সংবাদ দিতে পারবিনি। যদি অক্ষত দেহে পড়িস্ তোর অদৃষ্ট

(চরের কেশাকর্ষণ করিয়া, প্রাচীরোপরি আরোহণ । চরের
 আর্তনাদ)—মা কালী ! দূত হাজার দোষের আকর হ'লেও
 অবধা । তুমি এই হতভাগ্যের জীবন রক্ষা কর । (নিষ্ক্রেপ)
 সর্দার ! সর্দার ওঠ । উঠে অশ্বিকার বিপদ নিরীক্ষণ কর ।
 অশ্বিকার শত্রু প্রবেশ করেছে । বিশ্বাসঘাতকে তাকে গ্রাস
 করছে । ওঠ—উঠে পাপিষ্ঠদের মুখ থেকে আহাৰ ছিনিয়ে নে-
 একি কাল নিদ্রা ! এত ডাকছি, তবু শুনিছিস্ না । সর্দার—
 সর্দার—ওঠ । একি হ'ল ! হে ভগবান ! একি করলে ! ওঠ
 সর্দার ! অশ্বিকা যায়, চন্দ্রসূর্য্য জন্মের মত অস্ত যায়, ধর্ম
 যায়—ওঠ ।

(বলাইয়ের প্রবেশ)

বলা ।—কেও মা ! কেন মা বাবাকে তিরস্কার করছিস্ ।
 শত্রু হারিয়ে, তাকে দেশ ছাড়া করে, বাবা একটু বিশ্রাম
 করেছে, তুলিস্ নি মা তুলিস্ নি ।

লক্ষ্মী ।—শত্রু মরে নি—সে ঘরে ঢুকেছে ।

বলা ।—য়্যা ! সেকি !

লক্ষ্মী ।—কথা কবার সময় নেই । অস্ত ধর ।

বলা ।—বাবা ! বাবা !

লক্ষ্মী ।—ও আজ কাল নিদ্রায় আচ্ছন্ন । মানুষের কাছে
 আর সে জাগবে না ।

বলা—দেখ কি মা ! তোব সম্মান জেগে আছে ।
 তাকে আশীর্বাদ কর । সে একাই তোব সমস্ত
 শত্রু সংহার করবে যাক ।

লক্ষ্মী ।—তাহ'লে শিগ্গির যা—শত্রু কোন্ ফটকদে নগরে
তুকেছে, সন্ধান কর্—প্রাণপণে বাধা দে ।

(বলার প্রশ্নান)

লক্ষ্মী ।—সর্দার সর্দার ।

দলু ।—তবেরে মাগী ! সর্দার— সর্দার । আমি সোণার
পালকে শুয়ে কোথায়—কতদূরে—কোন সোণার সহরে চলেছি
—অপ্সরারা বীণাযন্ত্রে সুর দিয়ে গান কর্ছে—গানে আমাকে
আবাহন কর্ছে । আর মাগী পেছন থেকে সর্দার—সর্দার ।

লক্ষ্মী ।—সর্দার অধিকা যায় ।

দলু ।—যাকনা—একি তুচ্ছ অধিকা ।

লক্ষ্মী ।—চন্দ্রসূর্য্য জন্মের মত অন্ত যায় ।

দলু ।—যাকনা এ চাঁদ সূর্য্যের দিকে চায় কে ? যেখানে
আমার পালক উড়ে চলেছে, সেখানে সূর্য্য যেতে পায় না,
চাঁদ হাস্তে সাহস করে না—আলো, কেবল আলো—শত শত
চাঁদের আলো । পালকে তোরও স্থান আছে—নে ঘাস্ত
আয় । (পুনঃ শয়ন)

লক্ষ্মী ।—দোহাই সর্দার পায়ে ধরি সর্দার, জেগে দেখ ।
না, আশা ভরসা সব শেষ । (দলুর অঙ্গ আচ্ছাদন করিতে
করিতে) মা তন্ত্র জানিনা যন্ত্র জানিনা—কি চাইব তাও বুঝতে
পারছি না—পাবার মত সামগ্রী সব দিয়েছিলে, বুঝি কপাল
পাশে রাখতে পারলুম না । নইলে সমরজয়ী বীর আজ
চলে যাবার ভয় দেখায় কেন ? রেখে গেলুম, তোমার পায়ের
তলায় রেখে গেলুম । (~~সমরজয়ী~~)

(~~লক্ষ্মীর প্রশ্নান~~)

(ডুমুনিগণের প্রবেশ)

১ম ।—সরদারণী—কোথায় তুই ?

লক্ষ্মী ।—এই যে বোন ।

১ম ।—আর কি করব সরদারনী ? পূর্ব ফটক থেকে শত্রু হটিয়ে, আবার আমরা ফটক বন্ধ করে এসেছি ।

লক্ষ্মী ।—তবেত কার্য্য সিদ্ধি করেছিস্ বোন ! স্বামীপুত্রের মর্যাদা রেখেছিস্ । তবে বিরস মুখে মাথা হেঁট করে তোরা এসে দাঁড়ালি কেন ?

১ম ।—(পরস্পরের মুখ চাহিয়া) কি বলব সরদারনী !

লক্ষ্মী ।—মুখ চাওয়া চাওয়া করছিস্ কেন ? কি হয়েছে বলনা ! আমার ছেলে মরেছে ?

১ম ।—তোমার ছেলে বুঝি আর আসবে না ।

লক্ষ্মী ।—তাতে কি ! বীর-ধর্ম পালন করে ছেলে মরেছে । না বেঁচেছে । তার জন্তু ছুঃখ কি ! কার জন্তু শোক করবি ! তোদের স্বামীপুত্র তারা কোথায় ?

১ম ।—তোমার ছেলে বেঁচে থাকলে, বুঝি আমাদের সকল জালা জুড়তো ।

লক্ষ্মী ।—নে ছুঃখ রাখ ! মান রক্ষা করেছিস্, মাকে ধন্যবাদ দে । ছেলে কি মরেছে ?

১ম ।—বিলম্ব নেই । অন্ধকারে এক বেটা চোর তার পেটে শড়কী মেরেছে—আমি বেটার মুণ্ডপাং করেছি কিন্তু তাতে কি সরদারনী ! অমূল্যধন আর ফিরে এলোনা—ছেলে বাঁচলো না ! তার পেটের নাড়ী ভুড়ি বেরিয়ে পড়েছে ।

(জনৈক্য ডুমুনীর স্কন্ধে ভরদিয়া বলাইয়ের প্রবেশ)

বলা।—মা মরেও ত সুখ হ'ল না ! শত্রুর ত শেব হল না !
এক ফটকে শত্রুর গতি রোধ করলুম, কিন্তু মা চার ফটক
খোলা। পিল পিল ক'রে, চার দিক দে লোক ঢুকছে ।

লক্ষ্মী।—তবে টলতে টলতে এখানে এলি কেন বাপ !
এখানে আসতে যতক্ষণ তোর সময় গেল ! ততক্ষণ যে অন্ততঃ
ছোটো পাপিষ্ঠকে নিপাত করতে পারতিসু !

বলা।—তাই যাচ্ছি—যাবার সময় তোকে একবার দেখে
যাচ্ছি ।

১ম।—আবার শত্রু ! তবে আমরাই বা আর থাকি কেন ?
আয় বোন আমরাও বলাইয়ের সঙ্গে পতিপুত্রের শোকে জল
দিয়ে আসি ।

লক্ষ্মী।—নারায়ণ রক্ষা কর ।

সকলে।—কালী রক্ষা কর ।

ডুমুনীগণ।—

গীত ।

হান্ হান্ খর সান্ তরোয়ার ।

সময় নাইরে সময় আর ॥

প্রলয় গর্জন, ঘন ঘন ঘন,

বজ্র বরষণ লাথ ধার ।

ধ্বনিত শত্রু শিরে শমন দণ্ড সম,

অসী ঝন ঝন ঝনাৎ কার ।

শত্রু মাররে শত্রু মার ॥

(সকলের প্রস্থান)



পঞ্চম অঙ্ক ।

প্রথম দৃশ্য ।

(অধিকা—দুর্গমধ্যস্থ কক্ষসম্মুখ ।

(লক্ষ্মী)

লক্ষ্মী ।—কি করলুম ! কেন করলুম ! রাজা ছেলে নিয়ে যেতে চাইলে কেন রাখলুম ? পুত্র শোক ! উঃ অসহ—অসহ—চোকের ওপর ছেলের মৃত্যু নিজে ডেকে আনলুম—উঃ—নানা—একি ! একি বিভীষিকা—একি করালমূর্তি—না দেবতা সব যাক্ । আমার সব যাক্ । তুমি রাজার ছেলে-টিকে রক্ষা কর । না—না—এ আমি কি বলছি—দুটি দুটি দোহাই ধর্ম দুটি পুত্র চন্দ্র সেন—সূর্য সেন—এক বোঁটাতে দুটি ফুল ঝাঁচিয়ে রাখো—ঝাঁচিয়ে রাখ (দলুর প্রবেশ) য্যা—য্যা সর্দার—জেগেছ—জেগেছ—তবে আর কি—তবে আমার সব আছে—সব আছে ।

দলু ।—কি কাল ঘুমেই আমি আচ্ছন্ন হয়েছিলুম লক্ষ্মী ! কোথায় আমি কি ক'রে পড়েছিলুম, কিছু বুঝতে পারি নি । যদি এই সময়ে শত্রু এসে নগর প্রবেশ করত তাহলে কি সর্বনাশ হ'ত লক্ষ্মী !

লক্ষ্মী ।—সর্বনাশ হ'ত কি সর্দার ! সর্বনাশ হয়েছে ।

দলু।—সে কি !

লক্ষ্মী।—অধিকার আর কিছু নেই, অধিকার স্বাধীনতা পর্য্যন্ত লোপ পেয়েছে ।

দলু।—সে কি ! একি পাগলের মত বক্চিস্ । স্পষ্ট ক'রে বল—আমি কিছুই বুঝতে পারছি নি । এখনও আমার ঘুমের ঘোর ছাড়ে নি । শুধু দারুণ পিপাসায় ছেগে উঠেছি ।

লক্ষ্মী।—শত্রুর চর অধিকায় কোন রকমে প্রবেশ ক'রে ফটক খুলে দিয়েছে । পিল পিল ক'রে চারদিক দিয়ে শত্রু ঢুকেছে । স্ত্রীলোককটা অবশিষ্ট ছিল, তারাই প্রাণ পণে তাদের বাধা দিচ্ছে । (নেপথ্যে কোলাহল) ওই শোন—শত্রুর উল্লাস । অবলা কতক্ষণ হাজার হাজার শত্রুর গতি রোধ করতে পারে ! সরদার ! তোর এক ঘুমেই আজ আমাদের সর্বনাশ হ'ল ! চন্দ্র সূর্য্যা বুঝি বাঁচাতে পারলুম না । তুই নেই কেউ নেই জেনে, আমি প্রাণপণে দোর আগলে প'ড়ে আছি । আমি গেলে কি হবে সরদার ।

দলু।—বলাই ।

লক্ষ্মী।—বলাই—বলাই ! সরদার বলাই আমার নেই ।

দলু।—হা ভগবান, একি করলে আমার এত পরিশ্রম পণ্ড হ'ল ! এত গুলো প্রাণ বৃথা গেল ! শুধু আমার দোষে—হা ভগবান ।

লক্ষ্মী।—কি এখন করবি সরদার ?

দলু।—আর টিট্কারি দিস্নি লক্ষ্মী !—কি করব ? শত্রু ফেরাব—পুত্র হত্যার শোধ নেব—লক্ষ্মী । দারুণ পিপাসা আজ আমার অস্থূধের কাজ করেছে ।—তুই জল আন—আমি

চলনুম—ধর্মকে আশ্রয় করে চিরদিন পথ চলেছি । ধর্মের সহায়
পেলে একজন মানুষ কত লক্ষ পিশাচের সঙ্গে যুঝতে পারে
দেখবি আয় । আমি চলনুম ।

(নেপথ্যে কোলাহল)

লক্ষ্মী ।—জল চাইলি যে ?

দলু ।—এখানে অপেক্ষা করতে পারি না—এখানে আর
এক লহমা থাকলে যা একটু আশা অবশিষ্ট তাও যাবে—ছেলে
রক্ষার আর উপায় থাকবে না । তুই জল সঙ্গে নিয়ে আয়—

(প্রস্থান)

দ্বিতীয় দৃশ্য ।

—*—

দুর্গ—প্রাচীর ।

(নিধিরামের প্রবেশ)

নিধি ।—যা—সর্বনাশ হ'ল এত করেও কিছু হ'ল না—কিছু
করতে পারলুম না । কে এল—কোথা থেকে এলো—ওবাবা ।
ওই যে দলু আসছে ওবাবা । তাহ'লে ত গেলাম । আর ত
বাঁচলুম না । এগুতে পারবো না এগুলেই ধরা পড়বো
পড়লেই প্রাণ যাবে—কোথায় যাই কোথায় যাই—এলো যে
এলো যে—(দলুর প্রবেশ) তাহ'লে এইখানেই এক জায়গায়
মুখ গুঁজড়ে পড়ে থাকি ।

দলু ।—একি হ'ল ! কে রক্ষা করলে ! আমি কি একা
তা নয়—দেবতা—দেবতা কিন্তু আর প্রাণ বাঁচে না—জল—জল

লক্ষী ! এলিনি এলিনি—জল নিয়ে এলিনি—প্রাণ যায়—
—পিপাসা—পিপাসা—আর চলতে পারিনি—অন্ধকার—যে
দিকে চাই—সেই দিকেই অন্ধকার—জল—জল ।

(ভূমিতলে শয়ন)

নিধি ।—য়্যা গুলো যে ! তাইত—তাই—তাইত, গুলো
যে—একেবারেই গুলো যে—

দলু ।——জল—জল এক বিন্দু জল—কে কোথায় আছ—
এক বিন্দু জল দাও—যা চাইবে তাই দেবো—যা মূল্য চাইবে—
যদি সর্ব্বদা দিলেও একবিন্দু জল পাই—আমি আজ তাও দিতে
প্রস্তুত আছি । জল জল ।

নিধি ।—দেবে—যদি জল দিতে পারি দেবে—যা চাইব দেবে ?

দলু ।—আমার আয়ত্তে থাকে দোবো ।

নিধি ।—বস্—তাহ'লেই হ'লজানি তুমি সত্যবাদী ।

(নিধির প্রশ্ন)

দলু ।—তাইত কি করলুম ! কি চাইবে ? একবিন্দু জলের
বদলে কি চাইবে ? য্যা মনে একটা ভয় আসছে কেন ? মহা-
পাত্রে ভয়ে প্রাণরক্ষার জন্ত ওব্যক্তি আমার কাছে আশ্রয়
ভিক্ষা করতে এসেছে । এমন লোক সামান্য জলের জন্ত
আমার কাছে কি দাম চাইবে । কিন্তু জল ত এখন আমার
কাছে সামান্য নয়—জল যে এখন আমার প্রাণ—তাইত কি
ক'রলুম, ভগবান, সত্যপাশে আবদ্ধ হয়ে এ আমি কি
ক'রলুম, কিছুই যে বুঝতে পারছি না ! আজীবন সত্যপালন
করে এসেছি । জল এনে যদি রাজ্য চায়—যদি চন্দ্র সূর্য্যি দুই

ভাইকে চায় ও ভগবান, কি করলুম, কিন্তু জল এক বিন্দু
জল। লক্ষ্মী, এখনও এলিনি কি করলি, এখনও আয়
এখনও আয়, নইলে বুঝি সর্বস্ব বিকিয়ে যায়—এখনও আয় ।
না এলো না—কি যেন বিকিয়ে গেল। ওই আস্ছে--জল
নিয়ে আস্ছে--দোহাই ভগবান। এইটে কর, যেন রাজ্য
না চায়, ছেলে না চায় ।

(নিধির প্রবেশ)

নিধু।—এই নাও দলু জল খাও । (দলুর জল পান) নাও,
এইবার যা চাইব দাও ।

দলু ।—তুমি কি চাও ?

নিধি ।—দলু ! আমি তোমার মাথা চাই ।

দলু ।—য্যা !

নিধি ।—জানি তুমি সত্যবাদী, জানি তুমি জীবনে কখন
মিথ্যা কও নি। সত্যরক্ষার জন্ত তুমি প্রাণকেও তুচ্ছজ্ঞান
কর। দলু ! আমার এই জলের মূল্যস্বরূপ তোমার মাথা দিয়ে
সত্যরক্ষা কর ।

দলু ।—মা রক্ষিনী কি করলে !

নিধি ।—দাও, দলু মাথা দাও ।

দলু ।—তা হ'লে তুইই বিশ্বাসঘাতক ! তোকে নিরাশ্রয় মনে
ক'রে আশ্রয় দিয়েই কি আমি মনিবের, নিজের সর্বনাশ
করলুম ।

নিধি ।—তুমি মনিবের নেমক খেয়ে তার রাজ্যরক্ষা করছ—
আমি মনিবের নেমক খেয়ে তোমাকে মারতে এসেছি । দাও
দলু শিগগির তোমার মাথা দাও ।

দলু ।—সত্য করিছি আর ভয়কি ভাই, মাগাই তোমাকে দান করব । তবে একটু ইষ্ট দেবতাকে স্মরণ করতে সময় দাও ।

নিধি ।—তা দেব না ! অবশ্য দেবো । তুমি ইষ্টদেবতার স্মরণ কর, আমি অস্ত্র নিয়ে আসি ।

(নিধিরামের প্রস্থান)

দলু ।—হে কৃষ্ণ ! হে মদনমোহন ! আমি শাস্ত্র জানি না—মন্ত্র জানি না—জ্ঞাতির অধম, কি ভাল, কি মন্দ, কি ধর্ম, কি অধর্ম কিছুই বুঝি না । তবে গুরুমুখে শুনেছি সত্যের জয় । গুরুবাক্য হৃদয়ে ধরে আমার মনিবের মর্যাদা রাখতে, হে দেবতা তোমার শ্রীচরণে মাথা রাখলুম ।

(লক্ষ্মীর প্রবেশ)

লক্ষ্মী ।—সরদার । সরদার ! এই যে সরদার ! বড় বিলম্ব হয়ে গেছে জল আনতে মরা ছেলের গায়ে পা ঠেকে পড়ে গিয়েছি । তাই আসতে বিলম্ব হয়ে গেছে । এই নে সরদার—জল খা । বলাই আমার পথের মাঝে প'ড়ে আছে । শত্রুর বৃকে মাথা দিয়ে ছেলে আমার চিরদিনের মতন ঘুমিয়েছে । চারিধার বেড়ে মরণের পথে সঙ্গিনী ডোম রমণী । চল সরদার, জল খেয়ে দেখবি চল—ছেলের বৃকে পেটে অস্ত্র চিহ্ন, পিঠ পরিষ্কার !

দলু —আর জল ! লক্ষ্মী ! পিপাসা আমার মিটে গেছে । : জল পেয়েছি—কিন্তু প্রাণের বিনিময়ে পেয়েছি । লক্ষ্মী আর আমার পানে চাসুনি—ফিরে যা । চন্দ্র সূর্যকে রক্ষা কর । আমি পদার্থ হীন বন্দী ।

লক্ষ্মী ।—তুই যে কখনও মিথ্যে বলিস না সরদার ! এ দারুণ দুঃসময়ে তুইও সত্য ধর্ম পরিত্যাগ করলি। আমার সঙ্গে তামাসা করতে লাগলি ।

দলু । তামাসা নয় লক্ষ্মী ! যথার্থই আমি বন্দী । আমি পিপাসায় উন্মত্ত হয়ে একবিন্দু জলের জন্ত সব দিতে চেয়ে ছিলাম । এক ছুরাখ্যা অবকাশ বুঝে, আমাকে জল দিয়ে, মূল্য-স্বরূপ আমার মাথা প্রার্থনা করেছে । সে অস্ত্র আনতে গেছে, আমি সত্যবদ্ধ বন্দী হয়ে এখানে বসে আছি ।

লক্ষ্মী ।—কি আমি বেঁচে থাকতে, আমার স্মৃথে তোর মাথা নেবে । কে ? কোন পিশাচ কোথায় সে ?

দলু —শান্ত'হ —শান্ত'হ—আমার আর কি আছে লক্ষ্মী । শুধু ধর্ম আছে, সে ধর্ম রক্ষা না করলে, কে করবে লক্ষ্মী ।

লক্ষ্মী ।—তাইত এ কি হ'ল । কোথায় চললি । কেন চললি ? তোকে দেখে যে আমি সব ভুলে ছিলাম ।

দলু ।—সত্যের বন্ধনে যদি ভগবানকে বাঁধা যায়, তাহ'লে ঠিক বলছি লক্ষ্মী, পরপারে গিয়ে ভগবানকে আয়ত্ত ক'রে, তাঁকে অশ্বিকা রক্ষার জন্ত, রাজপুত্রদের রক্ষার জন্ত প্রহরী নিযুক্ত করবো । নতুবা প্রাণ—কিসের তুচ্ছ প্রাণ । আকাশে নীল পদ্মাসনে মেঘের গর্জনে বংশীর সুর মিশিয়ে, সত্যময় ভগবান আমাকে সত্য রক্ষার আদেশ করছেন । দেবতারা সিংহাসন ঘেরে দাঁড়িয়ে আছে । (মাথা দেখাইয়া) এই ফুলে তারা নারায়ণের শ্রীচরণে অঞ্জুলি দেওয়া দেখবে । দে লক্ষ্মী ! নীচ ডোম রমণীর পক্ষে এমন শুভদিন আর আসবে না । দে লক্ষ্মী ! তোর এই প্রিয় পুষ্প ভগবানের পাদপদ্মে অঞ্জুলি দে ।

তৃতীয় দৃশ্য ।

—*—

অম্বিকা—দুর্গমধ্যস্থ কক্ষসম্মুখ ।

(সামুলা)

সামুলা ।—ও ভগবান্ ! একি করলে ! এ কালঘুম কোথা থেকে আমার চোখে এনে দিলে । ঘুম, ঘুম—এত ঘুম ! কেন এলো ? কে দিলে ? আরও ত কতকাল এমনি ক'রে জেগে পাহারা দিয়েছি, অম্বিকায় আরও কতবার ত শত্রুতে ঘেবে ছিল—ছেলে আমার হাতে পাহারার ভার দিয়ে নিশ্চিত্ত হয়ে ঘুমিয়েছে—দিন রাত, হপ্তা হপ্তা, পক্ষ পক্ষ জেগেছি, কিন্তু এমন বিপদে ত কখন পড়িনি ! ছেলে আগলে তিন দিন তিন রাত জেগে আছি—একটা দণ্ডের জন্তুও ত পলক পড়েনি ! তবে আজ একি ! ও ভগবান্ ! একি করলে ! লক্ষ্মী যে আমার হাতে সর্বস্ব সমর্পণ করে গেছে । নিশ্চিত্ত হয়ে সে দেশ রক্ষা করছে । বড় বিশ্বাস—আমার ওপরে যে তার বড় বিশ্বাস । কে কোথায় আছ—এই ঘুমের হাত থেকে আমাকে রক্ষা কর ! কি করি—চোক দুটো উপড়ে ফেলি । না, তাতেও ত ফল হবে না । অন্ধ হ'লে কেমন করে বাছাড়টীকে রক্ষা করব ? বিশ্বাস ! হে ঠাকুর, বিশ্বাস—রক্ষা কর—রক্ষা কর—ঘুম ঘুম (ক্রমে নিদ্রা ক্রমে জাগরণের অভিনয়) হ'লনা—গেল—গেল (নিদ্রা) ।

নিধি ।—বস্, কাজ শেষ । বাপ, খুঁজে খুঁজে হায়রাণ । অম্বিকার সমস্ত ঘর আলোড়ন করেছি । লক্ষ্মীবোটা কি গোপন

স্থানেই লুকিয়ে রেখেছে । বুড়ী বেটীকে লাঠী মেরে নিকেশ করে দিই । আর ওতে কি পদার্থ আছে—লাঠীর গুতোয় বেটীকে সরিয়েই দেওয়া যাক না । (সামুলাকে পদাঘাত) (সামুলা কর্তৃক নিধির পদ ধারণ) এই বুড়ী পা ছাড় । আরে মর, কি বজ্রমুষ্টিতেই পা ধরলে । এই বুড়ী, পা ছাড় ।

সামুলা । কে তুই ?

নিধি ।—তোর যম ।

সামুলা ।—আমার যম ।

নিধি ।—পা ছাড়—নইলে এখনি তোর গলায় ছুরি দেব ।

সামুলা ।—ছুরি,—আমার গলায়—তুই, (পদ আকর্ষণ ও নিধির পতন) ।

নিধি ।—এই—এই তবেরে শয়তানী ।

সামুলা ।—তবেরে চোর শয়তান (সামুলা কর্তৃক নিধির গলদেশ ধারণ) ছেলে চুরি করতে এসেছ, ছেলের কাছে তোমাকে আর পৌছিতে দিচ্ছি নি । তোমায় কালে ধরেছে ।

নিধি ।—রক্ষে, রক্ষে, দোহাই রক্ষে হুজুর ! যাই—প্রাণ—
যায়—

সামুলা ।—আমি যে ঘরে পাহারা, বেটা সে ঘরে চুরি । (মহাপাত্র ও সৈন্তের প্রবেশ) (সামুলাকে অস্ত্রাঘাত) লক্ষ্মী !
মা আমার, রক্ষে কর, রক্ষে—(মৃত্যু)

মহা ।—সরিয়ে ফেল্—সরিয়ে ফেল্—ছ'টোকেই সরিয়ে ফেল্ । এখনও বিশ্বাস নেই, এখনও লক্ষ্মী বেঁচে, এখনও সে সিং দরজায় পাহারা দিচ্ছে । সরিয়ে ফেল্ । যাক, নিধেও মরেছে, বক্‌সিসের দায় থেকে নিস্তার পেয়েছি । দরজায় সব

পাহারা দে, লক্ষ্মী এলে সকলে এক সঙ্গে অন্ধকারে আক্রমণ করবি । বসু আর আমাকে পায় কে, এই বাবে শোধ, অপ-
মার্গের শোধ, অশ্বিকা শ্মশান—নয়ন সেনের বংশ এইবারে
নির্কংশ । কিন্তু দরজা কই, ঘরের দরজা কই, কই কিছুইত
দেখতে পাচ্ছিনে, একি অন্ধকার । ঘরের পর ঘর, তারপর
আবার ঘর, ছেলে ছটোকে তবে কোন ঘরে লুকিয়ে রেখেছ ।
খোঁজ খোঁজ, চারিদিকে খোঁজ ।

(নিদ্রিত চন্দ্রসেন ও সূর্যসেন)

(চন্দ্র সেনের মাতার প্রেতাঙ্গার আবির্ভাব)

মাতা ।—চন্দ্রসেন !

চন্দ্র ।—(উঠিয়া) য্যা ! কে ? মা ? না-না—কে তুমি ?

মাতা ।—আমি তোমার গর্ভধারিনী ।

চন্দ্র ।—তা কেন—য্যা, তা কেন ! তা হ'লে আমার মা—

মাতা ।—তিনি তোমার পালিকা মা । আমারই গর্ভে
তুমি জন্ম গ্রহণ করেছ । তুমি মান্দারগরাজ লক্ষণ সেনের
পুত্র ।

চন্দ্র ।—তবে মা আমি এখানে কেন !

মাতা ।—ভগবানের ইচ্ছায় । প্রায় বার বৎসর পূর্বে এক
দম্বা কর্তৃক তোমার পিতার রাজ্য আক্রান্ত হয় তোমার পিতা
তার সঙ্গে যুদ্ধে নিহত হন । তুমি তখন ছয় মাসের শিশু ।
আমি অনাথিনী, তোমাকে রক্ষা করবার উপায় না দেখে,
তুমি যাকে পিতা বল, সেই মহাপুরুষের শরণাপন্ন হই । তিনিই
তোমাকে ভীষণ মৃত্যুর হাত থেকে রক্ষা করেন । তোমাকে
নিরাপদ দেখে আমি স্বামীর সহমৃত্যু হই ।

চন্দ্র ।—ম্যা, মা তুমি মা ! এতদিন পরে সন্তানকে কেন দেখা দিতে এলে মা ! আমি যে পূর্ণমাত্রায় মায়ের আদর লাভ করেছি মা !

মাতা ।—বাপ, সেই বার বৎসর পূর্বে রাজার মহোপকার—
তোমার জনক জননী ঋণবন্ধনে আবদ্ধ । আজ সে মহাকাৰ্য্যের
মূল্য দেবার সময় এসেছে । মান্দারণরাজ ! আজ তুমি
তোমার পরলোকগত পিতাও মাতাকে ঋণ মুক্ত কর ।

চন্দ্র ।—কি করব । আজ্ঞা করুন ।

মাতা ।—নিষ্ঠুর ঘাতক তোমার ভাইটাকে হত্যা করতে
আসছে । রাজা নয়ন সেনের বংশলোপ করতে আসছে ।
তোমাকে সে হত্যা করবে না । অথচ নরাধম তোমাদের
কাউকে ও চেনে না ।

চন্দ্র ।—বুঝতে পেরেছি—আশীর্বাদ কর, যেন জীবন দিখে
ভাইয়ের জীবন রক্ষা করতে পারি ।

মাতা ।—বাপ ! তোমার পরলোকগতা গর্ভধারিনী
তোমায় আশীর্বাদ করে তোমা হতে তোমার পিতার মর্যাদা
রক্ষা হোক । (অন্তর্দ্বান)

চন্দ্র ।—কি করব ? বিনা বাধায় প্রাণ দেব ! দলু ভাই,
আমাকে যে প্রাণপণে রণকৌশল শিখিয়েছে । তার শিক্ষা
পণ্ড করবো বিনা, বাধায় প্রাণ দেবো, কাপুরুষের মতন দেহ
ত্যাগ করবো । কি করি ? না, আত্মরক্ষা করতে গেলে যদি
ভাই আমার জেগে ওঠে । তা'হলে যে সব রহস্য প্রকাশ হয়ে
পড়বে, ভাইত তাহলে বাঁচবে না—পিতৃঋণত শোধ হবে না ।
মায়ের আদেশ ত রক্ষা হবে না । অস্ত্র হাতে থাকলে আত্মরক্ষা

প্রবৃত্তি আসবে—(অস্ত্র নিক্ষেপ) মদনমোহন ! আমাকে জীবন
দানের বল দাও । আর ভাইকে আমার রক্ষা কর—পিতাকে
ঋণ মুক্ত কর—ঋণ মুক্ত কর—

(মহাপাত্রের প্রবেশ)

মহা।—কে তুই—বসে আছিস কে তুই ?

চন্দ্র।—আমি মহারাজ নয়ন সেনের পুত্র—আমার নাম
সূর্য্য সেন ।

মহা।—পাশে শুয়ে যে ঘুমুচ্ছে ও কে ?

চন্দ্র।—ওটা মান্দারণের রাজার পুত্র । আমার মা ওটাকে
পালন করেছেন ।

মহা।—ঠিক হয়েছে—নে এই সময় একবার জন্নের মতন
মা বাপকে ডেকে নে ।

চন্দ্র।—নারায়ণ—নারায়ণ—

মহা।—ডাক—ডাক—ডেকেনে—যাকে পারিস্ এই বেলা
ডেকেনে । আরে ম'ল তরোয়াল খাপ থেকে বেরুতে চায় না
কেন, আরে মল একি হল ।

চন্দ্র।—মদনমোহন—মদনমোহন—

(রাখালবালকের প্রবেশ)

রাখাল।—এই যে ভাই — (অস্ত্রক্ষান)

চন্দ্র। ষ্যা ষ্যা তুমি মদনমোহন মদনমোহন—(মূর্ছা)

মহা। আর মদনমোহন ! আর কোন মোহনই তোমাকে
রক্ষা করতে পারছেন না । (অস্ত্রাঘাত, নেপথ্যে কামান শব্দ)
ষ্যা একি হল ! কি কঠোর দেহ অস্ত্র ভেঙ্গে গেল, ইস্ কি বিভী-
ষিকা কি অন্ধকার !!

(লক্ষ্মীর প্রবেশ)

লক্ষ্মী ।—পিশাচ ! এত ক'রে ও তোর পাপ কার্যের স্পৃহা
মিটল না । (মাহাপাত্ৰকে অস্ত্রাঘাত, মহাপাত্ৰের পতন)

(বেগে মণিরামের প্রবেশ)

মণি ।—চন্দ্র সেন—সূর্য সেন ।

সূর্য ।—(উঠিয়া) দাদা ! দাদা !

মণি ।—ও লক্ষ্মী কি হ'ল ! চন্দ্র সেনের গায়ে রক্তশ্রোত ।

মক্ষো ।—ব্যা—নেই—চন্দ্র সেন নেই—(মূর্ছা)

সূর্য ।—দাদা ! দাদা !

মণি —(~~সূর্যকে~~ ধরিয়া) নরাধম ! কি করলি ! রাজা নরেন
সেনের ওপর রাগ—মান্দারণের নিরপরাধ রাজপুত্রকে হত্যা
করলি কেন ?

মহা ।— কি বললে, চন্দ্র সেন— তবে হ'ল'না— এত ক'রেও
হ'ল না, — বংশ লোপ হ'ল না— জালা— ~~নরকের~~ জালা (মৃত্যু)

— —

পঞ্চম দৃশ্য ।

—*—

অম্বিকা—দুর্গমধ্যস্থ রাজপ্রাসাদ-সম্মুখ ।

(বীরমল্ল, নয়ন সেন, রঞ্জাবতী)

বীর ।—সন্ধান কর—সন্ধান কর ।

পদ্মা ।—হত্যা হবেন না মহারাজ সন্ধান করুন ।

নয়ন ।—আর সন্ধান—কাকে সন্ধান— কে আছে মহারাজ,

অধিকায় রক্ত—নদীর বন্যা। চারিদিকে কবকের মূর্তি—শিশু
বৃদ্ধ রমণী তারাও পর্য্যন্ত এক এক করে অধিকার জন্ত প্রাণ
দিয়েছে। দেখতে পাচ্ছেন না—শ্মশান অধিকায় শুধু ভূত
প্রেতের তাণ্ডব-নৃত্য দেখতে পাচ্ছেন না—খল খল হাসি শুনতে
পাচ্ছেন না।

বীর।—পাচ্ছি—কিন্তু তার ভেতরেই আশা পাচ্ছি—শ্মশান
ভূমিই মৃত্যুঞ্জয়ের প্রিচ-নিবাস। রাখালরাজ আমাকে পুত্রশোক-
সন্তপ্ত করবার জন্ত মৃত্যুর হাত থেকে টেনে আনেন নি। সন্ধান
কর—সন্ধান কর।

(খালায় মুগুদ্বয় লইয়া ও এক হস্তে সূর্য্য

সেনকে লইয়া লক্ষ্মীর প্রবেশ)

লক্ষ্মী।—মহারাজ, আমার স্বামী-পুত্র—আপনার সাজান
বাগানের ছ'টা ফুল—প্রকাণ্ড ঝড়ে ঝরে গেছে—এই পুষ্পাঞ্জলি
নিন। আর এই নিন আপনার বংশধর।

রঞ্জা।—আর আমার চন্দ্র সেন।

লক্ষ্মী।—মা, কি বলব তাকে রক্ষা করতে পারিনি। স্বামী
দিয়েছি পুত্র দিয়েছি আপনার বলবার যেখানে ধূলি গুঁড়ি যা
ছিল—সব ধর্ম্মের পায়ে—ঢেলে দিয়েছি, তবু চন্দ্র সেনের প্রাণ
বাঁচাতে পারি নি।

(ধর্ম্মানন্দের প্রবেশ)

বীর।—যাঁ মদনমোহন ! তুমিও কি ছলনা কর।

ধর্ম্ম। করেন—স্থানবিশেষে লোকবিশেষে করেন তা
বলে এখানে করবেন কেন ? এই যে ধর্ম্মপরায়ণা সতী প্রভুর

জন্ম সর্বস্ব ধর্মের চরণে দান করলে তার কি কিছুই পুরস্কার নাই
সতী ওঠ, দেখ মহাদান কখন ব্যর্থ হয় না। ওই তোমার চন্দ্র
সেনকে নিরীক্ষণ কর।

(চন্দ্রসেন ও মনিরামের প্রবেশ)

মণি ।—বেঁচেছে বেঁচেছে—

চন্দ্র ।—দিদি ! দিদি ! (লক্ষ্মীকে বেষ্টন)

লক্ষ্মী ।—য্যা একি একি !

বীর ।—পুল্লশোক ! এ বয়সে পুল্লশোকে জর্জরিত হয়ে
মরব বলেই কি ভগবান আমাদের দল-মাদল ধরবার শক্তি দান
করেছেন। মদনমোহনের জয় ঘোষণা কর। এ সমস্তই মদন-
মোহনের লীলা। লক্ষ্মী ! ধর্ম রক্ষা ক'রতে স্বামী দিয়েছিস মদন
মোহন তোর পুল্ল হয়ে মর্যাদা রক্ষা করেছেন।

মণি ।—যথার্থই মদনমোহন রক্ষা করেছেন। মৃত মনে
করে বালককে নেড়ে চেড়ে দেখি যে গায়ে অস্ত্র চিহ্ন নেই।
পাষণ্ড মহাপাত্র ছেলেকে মারতে অন্ধকারে পাথরে অস্ত্রের
ঘা মেরেছে। অস্ত্র তার চুরমার হয়ে গেছে।

লক্ষ্মী ।—কে করলে ঠাকুর ! আমি যে চখের ওপর রক্তের
নদী দেখে এলুম।

ধর্ম ।—কে রক্ষা করলে দেখবে ?

(পট পরিবর্তন)

(কবন্ধ-রচিত সিংহাসনে বিদ্ধবন্ধ

মদনমোহন-মূর্তি)

ওই দেখ, রাখালরাজ তোমার ধর্মরক্ষা করতে নিজের বকে ~~অর্ধ~~ ধরেছেন । ওই দেখ তোমার স্বামী, পুত্র । ওই দেখ তোমার আত্মীয় সজ্ঞান পার্শ্বদ করে ভগবান তাদের পাশেতে বসিয়েছেন । তুচ্ছ দেহের বিনিময়ে অনন্তজীবন--ক'জন এ জীবন পায় লক্ষ্মী !

“নজায়তে মুয়তে বা কদাচিৎ
নারং ভূত্বা ভবিতা বা ন ভূয়ঃ
অজো নিত্যঃ শাশ্বতোহয়ং পুরাণো
ন হন্ততে হন্তমানে শরীরে ।

সৃষ্টি--

গীত ।

এমন দিন কি হবে ভ্রম যাবে ফুটবে যবে আঁধি ।
খুলে যাবে হৃদয়ের দ্বার, দেখবো সর্ব একাকার,
উঠবে নেচে প্রাণ আমার কৃষ্ণময় সন দেখি ॥
চলবো আমি যথা তথা, কৃষ্ণ সনে কইব কথা,
কৃষ্ণ বসন, কৃষ্ণ ভূষণ, কৃষ্ণরূপে ঢাকি ।
সমীরণে কৃষ্ণ গান, কৃষ্ণ-সিন্ধু-নীরে প্রাণ,
উনিরে দেন সদাই রব কৃষ্ণ রসে মাগা মাখি ।

যবনিকা পতন



গ্রন্থকারের অন্যান্য পুস্তক ।

আলিবাবা	(রঙ্গ-নাট্য)	১০
প্রমোদ রঞ্জন	(নাটিকা)	১০
কুমারী	... (নাটিকা)	১০
বক্রবাহন	... (নাটক)	১০

বক্রবাহন নাটকাস্তর্গত চরিত্রগুলি 'বঙ্গবাসী'র মতে সেক্ষ-
ন্যপিয়রের নাটকীয় চরিত্রের সঙ্গে তুলনীয়। প্রত্যেক শিক্ষিত
বাঙ্গালীর পাঠ্য।

জুলিয়া	... (নাটক)	৫০
---------	--------------	-----	-----	----

'জুলিয়া'র চরিত্রগুলি সম্পূর্ণ নূতন ধরণের।

সপ্তম প্রতিমা	(নাটক)	১০
সাবিত্রী	... (নাটিকা)	১০

'সাবিত্রী'ও বক্রবাহনের ঞায় প্রত্যেক শিক্ষিত বাঙ্গালীর পাঠ্য।

বেদোরা	... (রঙ্গ-নাট্য)	১০
বৃন্দাবন বিলাস	১০

মহাজনদিগের পদাবলীর এক একটা পদ অমূল্য মণি।

'হাতে সেই মণিগুলি যত্নের সহিত গ্রথিত।

রঘুবীর	... (নাটক)	৫০
প্রতাপ-আদিত্য	(নাটক)	১১
কবি কাননিকা	১১

কবি কাননিকা নূতন ধরণের উপন্যাস। বাঙ্গালায় এরূপ
ধরণের হাশ্বরস পূর্ণ উপন্যাস কচিং বাহির হইয়াছে। বুদ্ধিমান
পাঠক ইহা পাঠ করিয়া নিশ্চয়ই মুগ্ধ হইবেন। "কমলাকান্তের
পর্কিবিজয়ী কবি কাননিকা।" — বঙ্গবাসী।

'ভারতী'তে আংশিক প্রকাশিত উপন্যাস 'নারায়ণী' যন্ত্রস্থ।

